

यूहन्नासे भिबा थार्बा पिन्बा समाचार चु किताबला बारेरी पाड्तोःमा

भिबा म्हि: येशूला मुल चेला यूहन्नासे भिबा मुबा। चु यूहन्ना येशूसे माया लबा चेला हिन्ना (यूहन्ना २१:७)। थे जब्दियाला झा ओच्छे याकूबला आले हिन्ना (मत्ती ४:२१)।

भिबा ग्ला: एफिसस शहररी भिबा मुबा।

भिबा साल: ओस्पन ईश्वी संवत् ८०-९५ (विक्रम संवत् १३७-१५२) सालला गुडरी भिबा मुबा। चु जम्मान भन्दा लिच्छा भिबा थार्बा पिन्बा समाचार हिन्ना।

खाल्दा भिबा: यहूदी धर्म तेन्बा अर्गु यहूलला म्हिगदेदा येशू ख्रीष्टनोन परमेश्वर हिन्ना भिसी उन्बाला लागिरी भिबा मुबा।

चु थार्बा पिन्बा समाचाररी येशू जुकजुकधोनाला जुनी पिन्बा बचन हिन्ना। ओच्छे थे बचन म्हि दोसी जम्बुलिडरी मुबा म्हिगदेला गुडरी धन्छ्याजी भिसी भिबा मुला। येशू परमेश्वरला झादेन कबुल लबा थार्बा पिन्बा ग्ले हिन्ना भिसी चु थार्बा पिन्बा समाचार पढब लबागदेसे येशूदा विश्वास लगै ओच्छे थेनीगदेसे जुकजुकधोनाला जुनी याङ्गै भिसी भिबा हिन्ना (यूहन्ना २०:३१)।

चु किताबरी बचनदेन येशू गिकनोन हिन्ना भिसी भिबा मुला। चु थार्बा पिन्बा समाचारला डाच्छाला भोरी येशूसे लबा उदेकला गेगदेला बारेरी पाड्बा मुला। ओच्छे येशून परमेश्वरला झादेन कबुल लबा थार्बा पिन्बा ग्ले हिन्ना भिसी पाड्बा मुला। डाच्छाला भोरी प्रभुसे लबा उदेकला गेगदेग्याम तिग उन्बा मुला भिबा ताम येशूसे सुड्बा बचनग्यामनोन ज्यना लसी घोबारी

खम्ला। चु भोरी चा म्हिगदेसे खाहड्ड लसी येशूदा विश्वास लसी चेला दोजी ओचछे स्यूहान्दोसे थेदा बिरोध लसी विश्वास आलनी भिबा तामला बारेरी पाड्बा मुला। जमाहेन्से १३ अध्यायहेन्से १७ अध्याय न्हडरी येशूसे हाडदा चुड्बाकुनु म्हुनड हाडला चेलागदेदेन छ्याम संगती लबा तामदेन हाड कुसरी सिबा भन्दा डाचछा हाडला चेलागदेदा होशियार तना लबान आँट पिन्बा तामगदेला बारेरी भिबा मुला। लिचछाला अध्यायगदेरी चा येशूदा चुड्बा तामला बारेरीदेन येशूला सेम च्याबा तामला बारेरी भिबा मुला। थेहड्ड लसीन येशू कुसरी सिबा तामला बारेरीदेन सिबाग्याम सोबा तामला बारेरी ओचछे येशू हाडला चेलागदे मुबा ग्लारी फेपूखबा तामला बारेरीनोन भिबा मुला।

यूहन्नासे जुकजुकधोनाला जुनी चा ख्रीष्टग्याम याड्मुला ओचछे येशूदा परमेश्वर मुबा ग्लारी भोर्बा ग्यामदेन सत्यू ओचछे जुनी हिन्ना भिसी विश्वास लसी थे मुबा ग्लारी खबागदेसे जे याड्ला भिसी लोपबा मुला। चु थार्बा पिन्बा समाचाररी उदेकला ताम तिग मुला भिसम म्हिगदेदा आत्माला ताम घोना लबाला लागिरी क्युडदेन गेड ओचछे य्हाल, गोठालोदेन ग्यु, थेहड्ड लसीन अडगुरला दोडदेन रोगदे हड्बा जम्मासेन घोबारी खम्बा उखानगदेग्याम सुड्बा मुला।

मुल तामगदे

बचन म्हि दोसी न्हबा १:१-१८

बपूतिस्मा पिन्बा यूहन्नादेन येशूला चेलागदे १:१९-५१

येशूसे म्हिगदेला गुडरी लबा गे २:१-१२:५०

येशू सिबा भन्दा डाचछा हाडला चेलागदेदेन छ्याम लबा तामगदे १३:१-१७:२६

येशूदा कुसरी टांगब लबा १८:१-१९:४२

येशू सिबाग्याम सोसी हाडला चेलागदे मुबा ग्लारी फेपूखबा

२०:१-२१:२५

यूहन्नासे भिबा थाबा पिन्बा समाचार

बचन म्हि दोसी न्हबा

1 जम्बुलिड सहोबा भन्दा डाच्छान बचन भिबा मुबा, थे बचन परमेश्वरदेन छ्याम मुबा, ओच्छे बचननोन परमेश्वर मुबा।

2 जम्बुलिड सहोबा भन्दा डाच्छाहेन्सेन थे परमेश्वरदेन छ्याम मुबा।

3 परमेश्वरसे जम्मान सहे थेनोन बचनग्याम सहोजी। परमेश्वरसे सहोबा सहेगदे न्हडरी बचनग्याम आसहोबा सहे तिगैनोन आरे। 4 बचनसे सहोबा जम्मान सहेगदेसे थेनोन बचनग्याम जुनी याड्जी। थेनोन जुनी जम्मान म्हिगदेला य्हाल हिन्ना। 5 थे य्हाल धोपधोपरी य्हाल य्हाल तला, ओच्छे धोपसे थे य्हालदा खाइमै साइबारी आखम।

6 परमेश्वरसे म्हि गिक पुइखबा मुबा, थेला मिन यूहन्ना मुबा।*

7 थेग्यामसेन जम्मान म्हिगदेसे थे य्हालदा विश्वास लगै भिसी परमेश्वरसे थेदा थे य्हालला बारेरी पाड्बाला लागिरी पुइखबा मुबा। 8 थे चा थे य्हाल आहिन्बा मुबा। तर थे य्हालला बारेरी म्हिगदेदा घोना लबारी थे खबा मुबा।

9 जम्मान म्हिगदेदा ज्ञान बुद्धि पिन्बा सत्य य्हाल चा जम्बुलिडरी फेपखबान मुबा। 10 थे जम्बुलिडरी मुबा, जम्बुलिड थेग्यामसेन सहोबा हिन्ना। तसैनोन जम्बुलिडला म्हिगदेसे थेदा डोआसेनी। 11 थे हाडलान म्हिगदे मुबा ग्लारी फेपखजी। तर थेदा हाडलान म्हिगदेसे मान आलनी। 12 तर जुन म्हिसे थेदा मान लसी थेथोरी विश्वास लजी, थेनीगदेदा थेसे परमेश्वरला सन्तान दोबा हक पिन्जी। 13 थेनीगदे महिला सेमसे म्हन्बा अन्छार खजिबै

* 1:6 मत्ती ३:१; मर्कु १:४; लूका ३:१-२

म्हिला ल्हुइग्याम न्हबा आहिन। थेनीगदे परमेश्वरसे सहोबा परमेश्वरलान कोलागदे हिनना।

14 चुनोन बचन म्हि दोसी न्हजी, ओच्छे दयामायादेन सत्यसे प्लिङ्सी थे य्हाडला गुडरी धन्छ्याजी। डन्से थेला घेन य्हालदेन शक्ति म्राङ्जी, थे य्हालदेन शक्ति परमेश्वरला गिकजेन झाला मुबा।

15 यूहन्नासे थेला बारेरी चुहङ् भिसी क्रिङ्बान पाङ्जी, “डा भन्दा लिच्छा फेप्खबा चा डा भन्दा घेन म्हि हिनना। तिग्दा भिसम थे डा भन्दा डाच्छाहेन्सेन मुबा। थे महिला बारेरी डाइ डाच्छान पाङ्बा मुबा।”

16 थे दयामायासे प्लिङ्बा मुला। थेतबासेलमा थेग्यामसेन य्हाडसे दयामायाथोरी दयामाया याङ्बा मुला। 17 तिग्दा भिसम परमेश्वरसे य्हाडदा मोशाग्याम ठिम पिन्मुबा। तर येशू ख्रीष्टग्याम चा दयामायादेन सत्य ताम पिन्बा मुला। 18 परमेश्वरदा खालैसेन खाइमै म्राङ्बा आरे। तर परमेश्वर आबादेन छ्याम मुबा थेला गिकजेन झा परमेश्वरसेन य्हाडदा परमेश्वर आबा खाहङ्बा मुला भिसी उन्बा मुला।

बप्तिस्मा पिन्बा यूहन्नासे पाङ्बा ताम

मत्ती ३:१-१२; मर्कूस १:१-८; लूका ३:१-१८

19 यरूशलेम शहरग्याम यहूदीगदेसे परमेश्वरला मन्दिररी पूजा लबागदेदेन लेवीगदेदा यूहन्ना मुबा ग्लारी थे खाल चीम? भिसी ड्योइबारी पुइमा यूहन्नासे थेनीगदेदा चुहङ् भिसी पाङ्मुबा। 20 थेसे थेनीगदेदा “डा थार्बा पिन्बा ख्रीष्ट हिनोन आहिन” भिसी सत्य ताम पाङ्जी।

21 जमाहेन्से थेनीगदेसे यूहन्नादा “थेहङ् भिसम ए खाल हिनना? तिग ए एलिया हिनना” भिसी ड्योइजी।

तर यूहन्नासे “डा आहिन” भिसी जोहाब पिन्जी।

दोःसी थेनीगदेसे “तिग ए थेनोन अगमवक्ता हिन्ना?” भिसी ड्योइमा,

यूहन्नासे “डा थे अगमवक्ताएनोन आहिन” भिसी जोहाब पिन्जी।†*

22 जमाहेन्से दोःसीनोन थेनीगदेसे यूहन्नादा “ए खाल हिन्ना? उन्दा पाङ्गो। उन्दा चुरी पुइखबा म्हिगदेदा एला बारेरी पाङ्तोःबा मुला। थेतबासेलमा ए खाल हिन्ना? उन्दा पाङ्गो” भिसी भिमा,

23 यूहन्नासे थेनीगदेदा “यशैया अगमवक्तासे पाङ्बा हङ्गोन ‘परमप्रभु भ्रबाला लागिरी थेला ग्याम सोजो सहोउ’ भिसी तोडतोडबा ग्लारी क्रिङ्बा म्हि गिकला काइ डानोन हिन्ना” भिसी पाङ्जी।*

24 थेनीगदे न्हडला कोइ कोइ फरिसीगदेसे 25 यूहन्नादा “ए थाबा पिन्बा ख्रीष्टएनोन आहिन, एलियाएनोन आहिन, ओच्छे थे अगमवक्ताएनोन आहिन भिसम तिग्दा बपत्तिस्मा पिन्बा?” भिसी ड्योइजी।

26 जमाहेन्से यूहन्नासे थेनीगदेदा “डाइ क्युडसे बपत्तिस्मा पिन्बा मुला, तर एनीगदेला गुडरी खालै गिक मुला थेदा एनीगदेसे डोसेबा आरे। 27 डा भन्दा लिच्छा फेपूखबा चा थेनोन हिन्ना। डा थेला लखमला तुना बलबाधोनाला आरे” भिसी भिजी।

28 चु ताम यर्दन स्योडला क्यामसडपट्टि बेथानिया भिबा नाम्सारी तबा मुबा, थेरीन यूहन्नासे म्हिगदेदा बपत्तिस्मा पिन्बान मुबो।

परमेश्वरला झा

29 न्हडगरदड येसू हाड मुबा ग्लारी फेपूखबान लबा म्राङ्सी यूहन्नासे चुहङ्गु भिजी, “च्यागो, जम्बुलिडरी मुबा जम्मान म्हिदा

† 1:21 चु पदरी “थे अगमवक्ता” भिबा चा ठिमला किताबरी यहूदीगदेदा पुइखला भिसी पाङ्बा अगमवक्ताला बारेरी हिन्ना। * 1:21 वयव १८:१५, १८; मला ४:५ * 1:23 यशै ४०:३

पापग्याम फेबा परमेश्वरसे पुइखबा ग्ले!† 30 थेला बारेरी डाइ डाच्छान पाइबा मुबा, ‘डा भन्दा लिच्छा म्हि गिक फेप्वबान मुला, थे डा भन्दा शक्तिशाली मुला। तिग्दा भिसम थे डा न्हबा भन्दा डाच्छाहेन्सेन मुबा।’ 31 थे खाल हिन्ना भिबा ताम डादा था आरेबा, तर इस्राएलीगदेसे थेदा डोसेगै भिसीन डाइ क्युइग्याम बपत्तिस्मा पिन्बान खबा हिन्ना।”

32 यूहन्नासे अझ हाडसे म्राइबा ताम चुहड् भिसी पाइजी, “डाइ परमेश्वरला आत्मा ढुकुर हड् लसी स्वर्गग्याम फेप्वसी थेशोरी धन्छ्याबा म्राइजी। 33 डाइ अझ थेदा डोसेबा आरेबा, तर क्युइग्याम बपत्तिस्मा पिन्गो भिसी डादा पुइखबासेन, ‘एसे जुन म्हितोरी परमेश्वरला आत्मा फेप्वसी धन्छ्याबा म्राइला, थेसेन परमेश्वरला आत्माग्याम बपत्तिस्मा पिन्ना’ भिसी सुइजी। 34 थेशोरी परमेश्वरला आत्मा फेप्वबा डाइ म्राइबा मुला। थेतबासेलमा डाइ पाइबा चु ताम सत्य हिन्ना, परमेश्वरला झा चा थेनोन हिन्ना।”

येशूसे डाच्छा धम्बा चेलागदे

35 दोःसी न्हडगरदड यूहन्ना हाडला चेलागदे न्हडला न्हीदेन छ्याम राप्सी चिबा मुबा। 36 येशू फेप्वबान लबा म्राइसी यूहन्नासे, “च्यागो, परमेश्वरसे पुइखबा ग्ले!” भिसी पाइजी। 37 चु ताम थेःसी यूहन्नाला चेला न्ही येशूला लिच्छा लिच्छा निजी।

38 येशूसे फ्लिक दोःसी स्हीमा, थेनीगदे लिच्छा लिच्छा खबान लबा म्राइसी येशूसे थेनीगदेदा “एनीगदेसे तिग म्हाइबा?” भिसी ड्योइजी। जमाहेन्से थेनीगदेसे येशूदा “गुरु हाड खानड धन्छ्यामुला?” भिसी ड्योइमा,

† 1:29 “परमेश्वरसे पुइखबा ग्ले” भिसी भिबा तामदा ग्रीक बाइबलरी परमेश्वरसे पुइखबा ग्यु बोगो भिसी भिबा मुला। चु ताम १:३६ पदरीनोन मुला।

39 येशूसे थेनीगदेदा “डादेन छ्याम खउ, एनीगदेसे म्राड्ला” भिसी सुड्जी। जमाहेन्से थेनीगदे येशूदेन छ्याम निजी, ओच्छे येशू धन्छ्याबा ग्ला म्राड्जी। जमाकुनु ओस्पन ड्यसेला चार बजब तसी जिन्बासे लमा थेनीगदे येशूदेन छ्याम चिजी।

40 यूहन्नासे पाड्बा ताम थे:सी येशूदेन छ्याम निबा थे चेला न्ही न्हडला गिक चा सिमोन पत्रुसला आले अन्द्रियास मुबा। 41 थेसे डाच्छा हाडला ज्योज्यो सिमोनदा स्याप्सी, “डन्से मसीहदा स्याप्जी,” भिसी पाड्जी। हिबू ग्योइरी “मसीह” भिबा चा “थार्बा पिन्बा ख्रीष्ट” भिबा हिन्ना। 42 थेसे सिमोनदा येशू मुबा ग्लारी भजी।

येशूसे सिमोनदा स्हीसी, “ए योनाला झा सिमोन हिन्ना, एला मिन केफास हिन्ना” भिसी सुड्जी। केफास भिबा चा ग्रीक ग्योइरी पत्रुस भिबा हिन्ना।†

फिलिपदेन नथानेल

43 न्हडगरदड येशू गालील अञ्चलरी नितो:जी भिसी फेप्मा फिलिपदा स्याप्जी। ओच्छे येशूसे थेदा “डादेन छ्याम भ्रउ” भिसी सुड्जी। 44 फिलिपएनोन पत्रुसदेन अन्द्रियासलान शहर बेथसेदाला मुबा। 45 जमाहेन्से फिलिप नथानेलदा हुप तबारी निजी। ओच्छे नथानेलदा चुहड् भिसी पाड्जी, “मोशासे भिबा ठिमदेन अगमवक्तागदेसे जुन म्हिला बाररी पाड्बा मुबा, डन्से थे म्हिदा स्याप्बा मुला। थे योसेफला झा नासरतला येशू हिन्ना।”

46 नथानेलसे थेदा “तिग नासरतग्यामसेनोन तिगै ज्यबा स्हे खला?” भिसी ड्योइमा, फिलिपसे थेदा “खसी च्यागो” भिसी जोहाब पिन्जी।

† 1:42 “पत्रुस” भिबा चा युडबाला पहरा भिबा हिन्ना।

47 नथानेल हाड मुबा ग्लारी खबान लबा म्राड्सी येशूसे थेला बारेरी “तिगै लुसीला ताम आलबा पक्का इस्राएलीदा च्यागो” भिसी सुड्जी।

48 नथानेलसे येशूदा “हाडसे डाला बारेरी खाहड् लसी था याड्जी?” भिसी ड्योइमा, येशूसे थेदा “फिलिपसे एदा ड्योइबारी निबा भन्दा डाच्छान डाइ एदा अञ्जीरला दोड टारी म्राड्मुबा” भिसी जोहाब पिन्जी।

49 जमाहेन्से नथानेलसे येशूदा “रब्बी, हाडनोन परमेश्वरला झा इस्राएलला ग्ले हिन्ना” भिसी भिजी।

50 येशूसे थेदा “डाइ एदा अञ्जीरला दोड टारी म्राड्जी भिबासे लमा एसे विश्वास लबा आहिन? एसे अझ चु भन्दान घेन घेन तामगदे म्राड्ला” भिसी सुड्जी। 51 दोःसी येशूसे थेनीगदेदा “च्यागो, एनीगदेसे डाला ताम ड्यानगो, एनीगदेसे स्वर्ग ठोड्बादेन परमेश्वरला दूतगदे परमेश्वरसे पुइखबा म्हिथोरी फापखबान लबा तोर निबान लबा म्राड्ला” भिसी सुड्जी।*

2

काना भिबा नाम्सारी लबा ब्याह

1 सोमरेमाकुनु गालील अञ्चलला काना भिबा नाम्सारी ब्याह गिक मुबा। थेरी येशूला आमाएनोन मुबा। 2 थे ब्याहरी येशूदेन येशूला चेलागदेदाएनोन निम्तो पिन्बा मुबा। 3 अडगुरला निडगु जिनमाहेन्से येशूला आमासे येशूदा “थेनीगदेदेन छ्याम अडगुरला निडगु आरे” भिसी भिजी।

4 चु ताम थेःसी येशूसे “चु य्हाडला गे आहिन। डाइ गे लबा धुइ अझ तबा आरे” भिसी सुड्जी। 5 जमाहेन्से येशूला आमासे नोकरगदेदा “येशूसे एनीगदेदा जे लउ भिसी कुल्ला, थेनोन लउ” भिसी पाड्जी।

* 1:51 उत्प २८:१२

6 ओच्छे थेरी युडबा ठ्वाइसी सहोबा ओस्पन बोगल बलिहेन्से ग्यार्जा गिक लिटर क्युइ वाड्बा गोर हु युडबाला फुम्बा मुबा। थे फुम्बारी चा यहूदीगदेला ठिम अन्छार चोख्याब लबाला लागिरी क्युइ थान्मुबा। 7 येशूसे थेरी मुबा नोकरगदेदा “चु जम्मान फुम्बारी क्युइ प्लिङ्ना लउ” भिसी कुल्जी। जमाहेन्से थेनीगदेसे थे जम्मान फुम्बा नाड नाड क्युइ प्लिङ्ना लजी।

8 ओच्छे येशूसे थेनीगदेदा “चु जजाकर भोर्सी भोजला मुल म्हिदा म्यहाड्पुङ्गो” भिसी कुल्जी। जमाहेन्से थेनीगदेसे भोर्सी मुल म्हिदा पिन्जी। 9 मुल म्हिसे म्यहाड्बा धुइरी थे क्युइ अडगुरला निडगु दोसी जिन्बा मुबा। थेदा थे निडगु खानडग्याम भजी भिबा ताम था आरेबा, तर थे क्युइ युबा नोकरगदेदा चा था मुबा। जमाहेन्से थे मुल म्हिसे म्हाछारदा ड्योइसी, 10 “जम्मान म्हिसे डाच्छा अडगुरला ज्यबा निडगु पिन्मुला। ओच्छे डोन्बोगदे ड्योइमाहेन्से लिच्छा अडगुरला आज्यबा निडगु पिन्मुला। तर एसे मी दान्दे धोनान ज्यबा निडगु पिन्बान मुला” भिसी भिजी।

11 येशूसे लबा उदेकला गेगदे न्हडरी गालील अञ्चलला काना भिबा नाम्सारी लबा उदेकला गे चा जम्मान भन्दा डाच्छा लबा हिन्ना। चु उदेकला चिनुग्याम येशूसे ह्याडला शक्ति उन्जी। चु म्राड्सी थेला चेलागदेसे थेदा विश्वास लजी।

12 जमाहेन्से येशू ह्याडला आमा, आले, चेलागदेदेन छ्याम कफर्नहुम भिबा शहररी फेपजी। ओच्छे तिगै धिनधोना थेनीगदे थेरीन धन्छ्याजी*।

येशू परमेश्वरला मन्दिररी फेपबा

मत्ती २१:१२-१३; मर्कूस ११:१५-१७; लूका १९:४५-४६

13 यहूदीगदेसे मिश्र यहूल्साग्याम फेसी खबा धिनदा ढन्सी धड्बा चाड खबारी छ्याइबा मुबा। थे धुइरी येशू यरूशलेमरी

* 2:12 मत्ती ४:१३

फेपूजी।* 14 येशूसे म्हिगदेदा परमेश्वरला मन्दिररी† ग्यु, बहर, दुकुर चूड्बा किन्बा लबादेन टेबुलरी टाडगा थान्सी टाडगा देप्सी चिबा म्राड्जी। 15 जमाहेन्से येशूसे छोला कोर्ग स्होसी मन्दिररी मुबा ग्युगदेदेन बहरगदे जम्मादान तापूजी, ओच्छे टाडगा देप्सी चिबागदेला टाडगागदे भ्याड्सी टेबुल प्लाड प्लिड लसी पिन्जी। 16 दुकुर चूड्बागदेदा येशूसे “चु जम्मान सहे चुग्याम भोर्गो। डाला आबाला दिमदा व्यापार लबा दिम थास्होउ” भिसी सुड्जी।

17 थे धुइरी येशूला चेलागदेसे परमेश्वरला बचनरी, “परमेश्वर! हाडला दिमला लागिरी डाइ लबा मायासे लमा डा सिबा तेबान तबा मुला” भिसी भिबा ताम ढन्जी।*

18 यहूदी नेतागदेसे येशूदा “हाडदा चु गे लबाला लागिरी अधिकार मुबा हिन्सम डन्दा हाडसे तिग चिनु उन्बारी खम्ला?” भिसी भिजी।

19 येशूसे थेनीगदेदा “एनीगदेसे चु मन्दिर फुपूगो, डाइ चु सोमरेरी स्होला” भिसी सुड्जी।* 20 जमाहेन्से यहूदी नेतागदेसे येशूदा “परमेश्वरला चु मन्दिर स्होबारी डन्दा बोगल न्हीसे ढु दिड लगब तजी भिसम हाडसे चा खाहड् लसी सोमरेरी स्होखम्ला?” भिसी इयोइजी। 21 तर येशूसे जुन मन्दिरला बारेरी सुड्बा मुबा, थे मन्दिर चा हाडलान ल्हुड मुबा। 22 येशू सिबाग्याम सोमाहेन्से येशूसे सुड्बा चु ताम चेलागदेसे ढन्जी। जमाहेन्से थेनीगदेसे परमेश्वरला बचनरी भिबा तामदेन येशूसे सुड्बा तामरी विश्वास लजी।

23 मिश्र यहूलसाग्याम फेसी खबा धिनदा ढन्सी धड्बा चाडला धुइरी येशू यरूशलेमरी मुबा। थेरी येशूसे लबा उदेकला गे म्राड्सी ल्हानान म्हिगदेसे येशूदा विश्वास लजी। 24 तर थेनीगदेसे लबा विश्वासदा येशूसे पत्याब आतनी। तिग्दा भिसम जम्मान

* 2:13 प्रस्था १२:१-२७ † 2:14 यरूशलेमरी परमेश्वरला मन्दिर गिक जे मुबा।

* 2:17 भजन ६९:९ * 2:19 मत्ती २६:६१; २७:४०; मर्कू १४:५८; १५:२९

म्हिंगदेला सेमला ताम येशूदा था मुबा। ²⁵ जम्मान म्हिला सेमला ताम था मुबासे लमा खालै म्हिला बारेरी येशूदा खालैसेन पाड्तोःबा आरेबा।

3

निकोदेमस येशूदा स्यापबारी निबा

¹ फरिसीगदे न्हडला निकोदेमस भिबा म्हि गिक मुबा। थे यहूदी नेतागदे न्हडला गिक मुबा। ² थे तिरिकुनु म्हणुड येशू मुबा ग्लारी निसी येशूदा “गुरु, ह्वाड डन्दा लोपबारी परमेश्वरग्याम फेपखबा हिन्ना भिबा डन्दा था मुला। तिग्दा भिसम परमेश्वरसे ह्यो आलनी भिसम ह्वाडसे लबा ह्वाडबा शक्तिशाली गेगदे खालैसेन लबारी आखम” भिसी भिजी।

³ येशूसे थेदा “च्यागो, एसे डाला ताम ड्यानगो, खालै म्हि तोरग्यामा आन्हतेधोना परमेश्वरला यहुल्सादा म्हाडबारी आखम” भिसी सुड्जी।

⁴ चु ताम थेःसी निकोदेमससे येशूदा “खेपबा दोसीनोन म्हि खाहड लसी दोःसी न्हबारी खम्ला? तिग थे दोःसी आमाला फो न्हडरी वाड्सी न्हबारी खम्ला?” भिसी भिजी।

⁵ जमाहेनसे येशूसे थेदा चुहड भिसी सुड्जी, “च्यागो, एसे डाला ताम ड्यानगो, खालै म्हि क्युइदेन आत्माग्याम आन्हतेधोना परमेश्वरला यहुल्सारी वाड्आम्याड्। ⁶ ल्हुडग्याम न्हबा ल्हुड हिन्ना, तर परमेश्वरला आत्माग्याम न्हबा आत्मा हिन्ना। ⁷ डाइ एदा तोरग्याम न्हतोःला भिसी पाड्मा ए उदेक थातड। ⁸ लाबा खानडपट्टि निम्हन्जी थेनोनपट्टि निमुला। लाबा खबा एसे था याड्मुला, तर थे खानडग्याम खजी खानडपट्टि निजी भिबा एदा

† 3:3 “तोरग्याम” भिबा चा ग्रीक बाइबल अन्छार दोःसीनोन भिबा हिन्ना। चुला अर्थ चा परमेश्वरला आत्माग्याम भिबा हिन्ना। चु ताम ३:७ देन ३१ रीनोन मुला।

था आरे। परमेश्वरला आत्माग्याम न्हबा म्हिगदेएनोन थेहड्बान तमुला।”

9 निकोदेमससे येशूदा “चु खाहड् लसी तखम्ला?” भिसी ड्योइजी।

10 जमाहेनसे येशूसे थेदा चुहड् भिसी सुड्जी, “ए इस्राएलीगदेला गुरु तसीनोन चु ताम आघोनी? 11 च्यागो, एसे डाला ताम ड्यानगो, डन्से मी हाडसे म्राड्बा तामदेन था याड्बा ताम जे पाड्मुला। तर डन्से पाड्बा ताम एनीगदेसे विश्वास आलमुला। 12 डाइ जम्बुलिडरी मुबा सहेला बारेरी पाड्मा मी एनीगदेसे विश्वास आलमुला भिसम स्वर्गला बारेरी पाड्मा एनीगदेसे खाहड् लसी विश्वास लबारी खम्ला? 13 “स्वर्गग्याम खबा परमेश्वरसे पुइखबा म्हि बाहेक स्य्हान्दो खालैनोन स्वर्गरी निबा आरे। 14 यहूदीगदे तोडतोडबा ग्लारी मुबा धुइरी मोशासे पित्तलला पुखी सहोसी सिडरी ठोक्सी च्योबा हड् परमेश्वरसे पुइखबा म्हिदाएनोन च्योला।* 15 ओच्छे जुन जुन म्हिसे थेदा विश्वास लला, थेनीगदेसे जुकजुकधोनाला जुनी याड्ला।

16 “तिग्दा भिसम परमेश्वरसे जम्बुलिडदा ल्हानान माया लसी हाडला गिक जेन झा पुइखजी। थेदा विश्वास लबागदे खालै नाश थातगै, तर जुकजुकधोनाला जुनी याड्गै भिसीन चुहड् लबा हिन्ना। 17 तिग्दा भिसम परमेश्वरसे हाडला झादा जम्बुलिडदा सजाय पिन्बारी पुइखबा आहिन। तर थेग्याम जम्बुलिडसे थार्बा याड्गै भिसी पुइखबा हिन्ना। 18 जुन म्हिसे परमेश्वरला झाथोरी विश्वास लला, थेला दोष आउन। तर विश्वास आलबा महिला चा डाच्छान दोष उन्सी जिन्बा तला। तिग्दा भिसम थेसे परमेश्वरला झादा विश्वास आलनी। 19 दोषी खाहड् लसी तला भिसम य्हाल जम्बुलिडरी खसी जिन्सैनोन म्हिगदेदा य्हाल भन्दा धोपधोपनोन

* 3:14 गन्ती २१:९

सेम निजी। तिग्दा भिसम थेनीगदेसे लबा गेनोन आज्यबा मुबा।
 20 आज्यबा गे लबागदेसे य्हालदा हेला लमुला। तिग्दा भिसम
 य्हालरी खमाहेन्से थेनीगदेसे लबा आज्यबा गे जम्मासेन म्राङ्गला
 भिसी थेनीगदे य्हालरी आखबा हिन्ना। 21 तर थेसे लबा जम्मान गे
 परमेश्वरदेन छ्याम गिक तसी लबा हिन्ना भिसी जम्मासेन म्राङ्गै
 भिसी सत्य तामदा तेन्बा म्हि य्हालरी खबा हिन्ना।”

बपतिस्मा पिन्बा यूहन्नासे येशूला बारेरी दोःसी पाङ्बा

22 जमाहेन्से येशू हाडला चेलागदेदेन छ्याम यहूदिया अञ्चलरी
 फेप्सी तिगै धिनना लागिरी थेनीगदेदेन छ्याम थेरी धनछ्याबा
 धुइरी म्हिगदेदा बपतिस्मा पिन्बान मुबा। 23 यूहन्नासेनोन सालीम
 भिबा ग्लाला डामरी मुबा एनोन भिबा ग्लारी बपतिस्मा पिन्बान
 मुबा। तिग्दा भिसम थेरी ल्हानान क्युइ मुबा, ओच्छे म्हिगदे
 थेरी खसी बपतिस्मा किन्बान मुबा। 24 थे धुइधोना यूहन्ना
 झ्याल्खानरी परब तबा आरेमुबा।*

25 थेनोन धुइरी यूहन्नाला चेलागदे यहूदी गिकदेन छ्याम चोखो
 तबाला बारेरी ताम लबान मुबा। 26 जमाहेन्से थेनीगदे यूहन्ना मुबा
 ग्लारी खसी, “गुरु, यर्दन क्याम्सड मुबा धुइरी हाडसे डन्दा म्हि
 गिकला बारेरी सुङ्मुबा, थे म्हि हाडदेन छ्यामनोन मुबा। दान्दे
 थेसेनोन बपतिस्मा पिन्बान मुला, ओच्छे जम्मान म्हिगदे थे मुबा
 ग्लारी निबान मुला” भिसी भिजी।

27 यूहन्नासे थेनीगदेदा चुहङ् भिसी जोहाब पिन्जी, “परमेश्वरसे
 आपिन्तेधोना म्हिसे तिगै सहे आयाङ्। 28 ‘डा थार्बा पिन्बा ख्रीष्ट
 आहिन, तर थे भन्दा डाच्छा पुइखबा म्हि जे हिन्ना’ भिसी डाला
 बारेरी पाङ्बा ताम एनीगदेदान था मुला।* 29 जुन म्हिदेन छ्याम
 चाडछार चिला थेनोन म्हाछार हिन्ना। म्हाछारदेन छ्याम राप्बा

* 3:24 मत्ती १४:३; मर्कू ६:१७; लूका ३:१९-२० * 3:28 यूह १:२०

म्हि म्हाछारला काइ थेःसी ल्हानान ताड्मुला। थेह्ङ् लसीन डाएनोन ल्हानान ताड्बा मुला। ³⁰ दाहेन्से ख्रीष्ट चा बढब तबान नितोःला, तर डा चा घटब तबान नितोःला।

स्वर्गग्याम फेप्खबा परमेश्वरला झा

³¹ “तोरग्याम फेप्खबा चा जम्मान भन्दा घेन मुला। जम्बुलिडरी न्हबा म्हिगदे चा जम्बुलिडलान हिन्ना, ओच्छे जम्बुलिडलान ताम लमुला। तर स्वर्गग्याम फेप्खबा चा जम्मान भन्दा घेन मुला। ³² थेसे हाडसे म्राड्बादेन थेःबा तामनोन सुड्मुला, तर थेला ताम खालैसेन विश्वास आलमुला। ³³ जुन म्हिसे थेला तामदा विश्वास लला, थेसे चा परमेश्वर सत्य हिन्ना भिबा तामला प्रमाण उन्ना। ³⁴ परमेश्वरसे पुइखबा म्हिसे परमेश्वरलान ताम पाड्ला। तिग्दा भिसम परमेश्वरसे थेदा हाडला पूरान आत्मा पिन्बा मुला। ³⁵ परमेश्वरसे हाडला झादा माया लबा मुला, ओच्छे थेदा जम्मानथोरी शासन लबा अधिकार पिन्बा मुला।* ³⁶ थेतबासेलमा जुन म्हिसे परमेश्वरला झादा विश्वास लला थेसे जुकजुकधोनाला जुनी याड्ला। तर जुन म्हिसे परमेश्वरला झासे कुल्बा ताम आड्यान थेसे जुकजुकधोनाला जुनी आयाड्। बरु थेसे परमेश्वरग्याम खबा सजाय नातोःला।”

4

येशूदेन सामरी यूहुलला प्रिडम्हेमे

¹ यूहन्नासे भन्दा येशूसे ल्हानान चेलागदे सहोबा मुला, ओच्छे बप्तिस्माएनोन पिन्बान मुला भिसी फरिसीगदेसे थेःजी भिबा ताम येशूदा था मुबा। ² बप्तिस्मा पिन्बा चा चेलागदेसे पिन्मुबा तर येशू हाडसेन चा आहिन मुबा। ³ फरिसीगदेसे थेःबा ताम था याड्माहेन्से येशू यहूदिया अञ्चल ख्लासी गालील अञ्चलरी दोःसी फेपजी।

* 3:35 मती ११:२७; लूका १०:२२

4 येशू गालील अञ्चलरी फेप्मा सामरिया अञ्चलग्याम फेप्तोःमुबा। 5 थेतबासेलमा येशू सामरिया अञ्चलला सुखार भिबा शहररी धोखजी। चु शहर चा याकूबसे हाडला झा योसेफदा पिन्बा बुला डामरी मुबा।* 6 थेरी याकूबला इनार मुबा। भ्रना भ्रना बल्पबासे लमा येशू थे इनारला कुनीरी धन्छ्याबा मुबा। थे धुइरी ओस्पन धिनी गडसल तबा मुबा।

7 थेनोन धुइरी सामरी यहुलला म्रिडम्हेमे गिक थे इनाररी क्युइ किन्बारी खजी। येशूसे थेदा “डादा क्युइ थुइबारी भउ” भिसी सुइजी। 8 येशूला चेलागदे चा चबा सहे ग्लुबारी शहररी निबा मुबा।

9 सामरी यहुलला म्रिडम्हेमेसे येशूदा “हाड यहूदी यहुलला म्हि तसीनोन डा हड्बा सामरी यहुलला म्रिडम्हेमेदेन छ्याम तिग्दा क्युइ हीबा?” भिसी भिजी। तिग्दा भिसम यहूदीगदेसे सामरीगदेदेन छ्याम संगतनोन आलमुबा।†

10 येशूसे थेदा “एसे परमेश्वरसे पिन्बा मोलमदेन दान्दे एदेन छ्याम क्युइ हीबा म्हिदा डोसेबा हिन्सम एसे थे म्हिदेन छ्याम क्युइ हीसेला मुबा। जमाहेन्से थे म्हिसे एदा जुकजुकधोनाला जुनी याइबा क्युइ पिन्सेला मुबा” भिसी सुइजी।

11 थे म्रिडम्हेमेसे येशूदा “लास्सो, हाडदेन छ्याम क्युइ तेःबारी ताड आरे, ओच्छे इनारएनोन नुपबा मुला। हाडसे खानडग्याम थे जुकजुकधोनाला जुनी याइबा क्युइ भला? 12 तिग हाड डन्ना म्हेमे याकूब भन्दा घेन हिन्ना? थेसेन डन्दा चु इनार स्होसी पिन्बा हिन्ना। थेदेन थेला सन्तानसे ओच्छे थेला म्हे मुइगदेसेनोन चुनोन इनारला क्युइ थुइमुबा” भिसी भिजी।

13 जमाहेन्से येशूसे थेदा चुहड् भिसी सुइजी, “चु क्युइ थुइबा म्हिगदेदा दोःसी क्युइ फुइला। 14 तर जुन जुन म्हिसे डाइ पिन्बा

* 4:5 उत्प ३३:१९; यहो २४:३२ † 4:9 “यहूदीगदेसे सामरीगदेदेन छ्याम संगतनोन आलमुबा” भिबा चु ताम कोइ कोइ ग्रीक बाइबलरी आरे।

क्युइ थुङ्ला थे म्हिदा दोःसी क्युइ आफुइ। डाइ थेदा जुन क्युइ पिन्ना, थे क्युइ चा थेला लागिरी जुकजुकधोनाला जुनी पिन्बा क्युइला मुहान दोला!” भिसी सुङ्जी।

15 थे म्रिडम्हेमेसे येशूदा “लास्सो, डादाएनोन थे क्युइ भउ, थेहङ् भिसम डादा दोःसी क्युइ आफुइ ओच्छे चुधोना क्युइ किन्बारीनोन खआतोः” भिसी भिजी।

16 जमाहेन्से येशूसे थेदा “निउ, एला हेम्बोदा ड्योइसी भउ” भिसी सुङ्जी।

17 थेसे “डाला हेम्बो आरे” भिसी भिजी।

तर येशूसे थेदा “एसे डाला हेम्बो आरे भिसी भिबा ठीक हिन्ना। 18 तिग्दा भिसम एला गोर डा हेम्बो तसी जिनबा मुला। दान्दे ए जुन म्हिदेन छ्याम चिबा मुला, थे म्हि एला हेम्बो आहिन। एसे पाङ्बा ताम सत्य हिन्ना” भिसी सुङ्जी।

19 जमाहेन्से थे म्रिडम्हेमेसे, “लास्सो, ह्वाड अगमवक्ता हिन्बा चीम भिसी डाइ था याङ्जी। 20 डन्ना आखे म्हेमेगदेसे चु गडरी परमेश्वरदा तेन्जी, तर ह्वाडनी यहूदीगदेसे चा परमेश्वरदा तेन्बा ग्ला यरूशलेम जे हिन्ना भिसी सुङ्मुला” भिसी भिजी।

21 येशूसे थे म्रिडम्हेमेदा चुहङ् भिसी सुङ्जी, “एसे डादा विश्वास लउ, दाहेन्से खालैनोन परमेश्वरदा तेन्बारी चु गडरीदेन यरूशलेमरी निआतोःबा धुइ खबान मुला। 22 एनी सामरीगदेसे आसेनान परमेश्वरदा तेन्जी, तर डनी यहूदीगदेसे चा सेसी तेन्जी। तिग्दा भिसम थार्बा याङ्बा चा यहूदीगदे न्हङ्ग्यामनोन तला। 23 तर चुहङ्बा धुइएनोन खबान मुला, थे धुइ चा चुनोन हिन्ना, सेसी सेमहेन्सेन परमेश्वरदा तेन्बा म्हिगदेसे चा सत्यदेन आत्माग्याम परमेश्वर आबादा तेन्मुला। परमेश्वर आबासे चुहङ् लसी तेन्बा म्हिगदे म्हाइमुला। 24 तिग्दा भिसम परमेश्वर आत्मा हिन्ना। थेतबासेलमा थेदा तेन्बागदेसे सत्यदेन आत्माग्याम तेन्तोःला।”

25 जमाहेनसे थे म्रिडम्हेमेसे येशूदा “थार्बा पिन्बा ग्ले फेप्खला भिबा ताम डादाएनोन था मुला, थेदा ‘थार्बा पिन्बा ख्रीष्ट’ भिसी भिला। थे फेप्खमाहेनसे थेसेन डन्दा जम्मान ताम घोना लला” भिसी भिजी।

26 येशूसे थेदा “एदेन छ्याम ताम पाङ्बा म्हि, डा थेनोन हिन्ना” भिसी सुङ्जी।

27 थे धुइरी येशूला चेलागदेएनोन थेरी धोखजी। येशू म्रिडम्हेमे गिकदेन छ्याम ताम लसी चिबा म्राङ्सी थेनीगदे उदेक तजी। तर “हाडसे तिग म्हाइबा?” अथवा “हाड थे म्रिडम्हेमेदेन छ्याम तिग्दा ताम लबा” भिसी खालैसेन आङ्योइनी।

28 जमाहेनसे थे म्रिडम्हेमे दर्बुड थेरीन ख्लासी नाम्सापट्टि निसी म्हिगदेदा, 29 “म्हि गिकदा च्याबारी खउ, डाइ लबा जम्मान गे थेसे डादा पाङ्जी। थेनोन थार्बा पिन्बा ख्रीष्ट मी आहिन?” भिसी भिजी। 30 चु ताम थेःसी शहरला जम्मान म्हिगदे येशूदा च्याबारी थेरी खजी।

31 थेनोन धुइरी चेलागदेसे येशूदा “रब्बी, सोल छ्योइगो” भिसी बिन्ती लजी।

32 तर येशूसे थेनीगदेदा “डादेन छ्याम चबा सहे मुला, थे ताम एनीगदेदा थानोन आरे” भिसी सुङ्जी।

33 थेतबासेलमा चेलागदेसे “खालैसे येशूदा सोल भसी पिन्जी कि तिग?” भिसी हाड हाड न्हडरी ताम लजी।

34 येशूसे थेनीगदेदा चुहङ् भिसी सुङ्जी, “डादा पुइखबासे कुल्बा ताम ड्यानसी थेला गे पूरा लबान डाला चबा सहे हिन्ना। 35 एनीगदेसे ‘बाली मिन्बारी अङ्ग ला बलि बाँकी मुला भिसी भिमुला।’ तर एनीगदेसे डाला ताम ड्यानगो, बु वारीरी च्यागो, बाली मिन्सी दुइबा धुइ तसी जिन्बा मुला। 36 जुन म्हिसे बाली दुइबान मुला, थेसे ज्यला याङ्बान मुला। ओच्छे जुकजुकधोनाला जुनी याङ्बा बाली हुप लबान मुला। ओच्छे ब्लु ढ्वबादेन बाली

दुइबा न्हीनोन ताड्म्याड्ला। ³⁷ तिग्दा भिसम चु ताम सत्य हिनना। 'गिकसे ब्लु ढ्वला, ओच्छे स्य्हान्दोसे बाली दुइला।' ³⁸ डाइ एनीगदेदा एनीगदेसे बलुनोन आढ्वबा ग्लारी बाली दुइबारी पुइजी। स्य्हान्दोसे दुख लसी ब्लु ढ्वबा ग्लारी एनीगदेसे बाली दुइम्याड्बा मुला।”

³⁹ “डाइ लबा जम्मान गे थेसे डादा सुड्जी” भिसी थे सामरी म्रिडम्हेमेसे पाड्बासे लमा थे नाम्साला ल्हानान सामरीगदेसे येशूदा विश्वास लजी। ⁴⁰ थेनीगदे येशू मुबा ग्लारी खसी येशूदा “हाड डन्देन छ्याम धन्छ्यागो” भिसी बिन्ती लजी। जमाहेन्से येशू थेनीगदेदेन छ्याम न्हीरेधोना धन्छ्याजी। ⁴¹ येशूला ताम थे:सी झन ल्हानान सामरीगदेसे येशूदा विश्वास लजी। ⁴² थेनीगदेसे थे म्रिडम्हेमेदा “दान्दे एसे पाड्बा ताम थे:सी जे डन्से विश्वास लबा आहिन, तर डन्सेन येशूला ताम थे:सी विश्वास लबा हिनना। ओच्छे पक्कान जम्बुलिडला जम्मान म्हिदा थार्ना लबा थेनोन हिनना भिसी डन्से था याड्जी” भिसी भिजी।

येशूसे हाकिमला झादा खम्ना लबा

⁴³ थे ग्लारी न्हीरेधोना धन्छ्यासी येशू गालील अञ्चलरी फेपजी। ⁴⁴ अगमवक्तादा हाडलान नाम्सारी मान आल भिसी येशूसेन सुड्बा मुबा।* ⁴⁵ येशू गालील अञ्चलरी धोखमाहेन्से थे ग्लाला म्हिगदेसे येशूदा मान लजी। तिग्दा भिसम मिश्र यहुल्साग्याम फेसी खबा धिनदा ढन्सी धड्बा चाडला धुइरी येशूसे यरूशलेम शहररी लबा जम्मान उदेकला गेगदे थेनीगदेसे म्राड्बा मुबा। थे धुइरी थेनीगदेएनोन यरूशलेम शहररी चाड धड्बारी निबा मुबा।*

⁴⁶ दो:सी येशू गालील अञ्चलला काना भिबा शहररी फेपजी। थेनोन शहररी येशूसे क्युइदा अड्गुरला निड्गु दोना लबा मुबा।

* 4:44 मत्ती १३:५७; मार्कू ६:४; लूका ४:२४ * 4:45 यूह २:२३

कफर्नहुम शहररी चिबा हाकिम गिकला झा ल्हानान आखम्बा मुबा।* 47 येशू यहूदिया अञ्चलग्याम गालील अञ्चलरी फेप्वखजी भिबा ताम थे:सी थे हाकिम येशू मुबा ग्लारी खजी। ओच्छे थेसे हाड फेप्वखसी डाला झादा खम्ना लसी पिन्गो भिसी बिन्ती लजी। तिग्दा भिसम थेला झा ल्हानान आखम्ना सिबारीन छ्याइबा मुबा।

48 थेतबासेलमा येशूसे थेदा “उदेकला गेदेन चिनु आम्राड्तेथोना एनीगदेसे खाइमै विश्वास आल” भिसी सुड्जी।

49 थे हाकिमसे येशूदा “लास्सो, डाला झा सिबा भन्दा डाच्छान हाड फेप्वखउ” भिसी पाड्जी।

50 येशूसे थेदा “निउ, दाहेन्से एला झा सोला” भिसी सुड्जी।

जमाहेन्से येशूसे सुड्बा तामरी विश्वास लसी थे दिमरी निजी।

51 ओच्छे थे ग्यामरी निबान लमा थेला नोकरगदे खसी, “हाडला झा खम्जी” भिसी भिजी। 52 जमाहेन्से थेसे नोकरगदेदा “थे गाते धुइहेन्से खम्जी?” भिसी इयोइमा, थेनीगदेसे “तिल्मा धिनना एक बजेहेन्से थेला छवा म्हाजी” भिसी भिजी। 53 चु ताम थे:माहेन्से येशूसे थेदा “एला झा सोला” भिसी सुड्बा धुइरीन खम्जी भिबा ताम थेसे था याड्जी। थेतबासेलमा थेदेन थेला म्हेमेक्योड्सेन येशूदा विश्वास लजी।

54 चु गे चा यहूदिया अञ्चलग्याम गालील अञ्चलरी फेप्वखसी येशूसे लबा अर्गु उदेकला गे हिन्ना।

5

येशूसे कुज्या म्हिदा खम्ना लबा

1 जमाहेन्से यहूदीगदेला चाडला धुइरी येशू यरूशलेमरी फेप्वजी।

2 यरूशलेम शहर न्हडरी निबारी ग्यु भिबा म्नाप मुबा। थे म्नापला डामरी गोर डा दलान मुबा घ्योइ गिक मुबा। थे घ्योइदा हिब्रू

* 4:46 यूह २:१-११

ग्योइरी बेथेसदा भिसी भिमुबा। 3 थे दलानरी आखम्बा ल्हानान म्हिगदे, मी आम्राड्बा म्हि, कुज्या म्हिदेन काड या चलब आतबा म्हि चिमुबा। थे घ्योइला क्युड गाते धुइरी ल्हिड्ळा भिसी थेनीगदे जम्मासेन च्यासी चिमुबा। 4 तिग्दा भिसम धुइ धुइरी परमप्रभुला दूत गिक मार खसी थे घ्योइला क्युड ल्हिड्डी पिनमुबा। घ्योइरी क्युड ल्हिड्मैछ्याम जुन म्हि डाच्छा घ्योइरी वाड्जी थे म्हि जस्तोन आखम्बा मुसैनोन थे खम्मुबा।†

5 थेरी बोगल गिकसे च्युक भ्रः दिड्धोना आखम्बा म्हि गिकएनोन मुबा। 6 येशूसे थे थेरीन म्हेर्सी चिबा म्राड्जी। ओच्छे थे ल्हानान दिड्हेनुसे आखम्बा चीम भिबा था याड्सी येशूसे थेदा “तिग एदा खम्बा सेम मुला?” भिसी ड्योइमा, 7 थे आखम्बा म्हिसे, “लास्सो, घ्योइला क्युड ल्हिड्बा धुइरी डादा घ्योइरी झाड्डी पिनबा डाला खालै आरे। थेतबासेलमा डा घ्योइरी वाड्बारी निना निनान डा भन्दा डाच्छा स्य्हानदो म्हि वाड्मुला” भिसी भिजी।

8 जमाहेनुसे येशूसे थेदा “रे:गो, ओच्छे हाडला तीबा नान्बा पुइसी भ्रउ” भिसी सुड्जी।

9 येशूसे थेहड् सुड्मैछ्याम थे म्हि खम्जी। जमाहेनुसे थे हाडला तीबा नान्बा पुइसी भ्रजी। जमाकुनु ब्लप्बा न्हबा धिन मुबा।† 10 थेतबासेलमा यहूदी धर्मगुरुगदेसे थे म्हिदा “तिनी ब्लप्बा न्हबा धिन हिन्ना, एसे तीबा नान्बा पुइबारी आत” भिसी भिजी।

11 जमाहेनुसे थेसे “जुन म्हिसे डादा खम्ना लजी थेसेन डादा तीबा नान्बा पुइसी भ्रउ भिसी सुड्बा हिन्ना” भिसी भिजी। 12 थे म्हिगदेसे थेदा “एदा तीबा नान्बा पुइसी भ्रउ भिबा म्हि खाल हिन्ना?” भिसी ड्योइजी। 13 तर हाडदा खम्ना लबा म्हि खाल

† 5:4 “थे घ्योइला क्युड...थे म्हि जस्तोन आखम्बा मुसैनोन थे खम्मुबा।” चु ताम ल्हानान हड्बा ग्रीक बाइबलरी आरे। † 5:9 यहूदीगदेला ठिम अन्छार ब्लप्बा न्हबा धिनकुनु तिगै गे लबारी आतमुबा।

हिन्ना भिसी थेसे डोसेबा आरेमुबा। तिग्दा भिसम थेरी म्हिगदे ल्हानान पोप तबासे लमा म्हिला हुल न्हडग्याम येशू सुटुकक फेप्सी जिन्बा मुबा।

14 लिच्छा येशूसे थेदा परमेश्वरला मनदिररी स्याप्सी, “च्यागो, ए खम्सी जिन्बा मुला। थेतबासेलमा एसे दोःसी पाप थालउ, चुदे पाप लजी भिसम एदा चु भन्दा आज्यबा तला” भिसी सुड्जी। 15 थे निसी हाडदा खम्ना लबा म्हि येशू चीम भिसी यहूदी धर्मगुरुगदेदा पाड्जी।

परमेश्वरला झाग्याम याड्बा जुनी

16 येशूसे चु गे बलपबा न्हबा धिनकुनु लबासे लमा यहूदी धर्मगुरुगदेसे येशूदा बिरोध लबारी छ्याइजी। 17 तर येशूसे “डाला आबासे सदन गे लमुला। ओच्छे डाइनोन सदन गे लला” भिसी सुड्जी। 18 थेतबासेलमा यहूदी धर्मगुरुगदेसे झन येशूदा साइबारी म्हाइजी, तिग्दा भिसम थेसे ठिम अन्छार बलपबा न्हबा धिनकुनु लबारी आतबा गे जे लबा आहिन, तर थेसे हाडसे हाडदान परमेश्वर हड्बान सहोसी परमेश्वरदा हाडला आबा भिसी सुड्मुबा।

19 येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, आबासे जुन जुन लबा म्राड्ला झासेनोन थेनोन गे जे लला, तर झासे जे तिगै गे लबारी आखम। तिग्दा भिसम आबासे जुन गे लला झासेनोन थेनोन गे लला। 20 तिग्दा भिसम आबासे झादा माया लसी हाडसे लबा जम्मान गे उन्ना। ओच्छे थेसे अझ चु भन्दान घेन घेन गे हाडला झादा उन्ना। ओच्छे एनीगदे उदेक तगै भिसी थेसे अझ चु भन्दा घेन घेन गे लला। 21 आबासे सिबागदेदा सोना लसी जुकजुकधोनाला जुनी पिन्बा हड् लसी झासेनोन जुन म्हिदा सेम निला थेदा जुकजुकधोनाला जुनी पिन्ना। 22 आबासे खालैलान निसाफ आल। तिग्दा भिसम

जम्मादान निसाफ लबा अधिकार आबासे झादा पिन्बा मुला।
 23 आबादा मान लबा हड्ड लसी झादाएनोन मान लगै भिसीन आबासे
 चुहड्ड लबा हिन्ना। तिग्दा भिसम जुन म्हिसे झादा मान आल थेसे
 झादा पुइखबा आबादाएनोन मान आल।

24 “थेतबासेलमा एनीगदेसे डाला ताम ड्यान्गो, जुन म्हिसे
 डाला ताम ड्यान्सी डादा पुइखबादा विश्वास लला थेसे
 जुकजुकधोनाला जुनी याड्डला। ओच्छे थेदा दोषएनोन आल, बरु
 थे सिबाला तहग्याम थोन्ना। जमाहेन्से थेसे जुकजुकधोनाला
 जुनी याड्डला। 25 च्यागो, एनीगदेसे डाला ताम ड्यान्गो, थे धुइ
 खबान मुला, थे धुइ डाचछान खसी जिन्बा मुला। थेतबासेलमा
 सिबागदे न्हडला जुन जुन्से परमेश्वरला झाला काइ थेःला थेनीगदे
 सोला। 26 तिग्दा भिसम परमेश्वर आबा हाडदेन छ्यामनोन
 जुकजुकधोनाला जुनी मुला, थेहड्ड लसीन थेसे हाडला झादाएनोन
 जुकजुकधोनाला जुनी पिन्बा अधिकार मुबा म्हि सहोबा मुला।
 27 ओच्छे निसाफ लबा अधिकार थेदान पिन्बा मुला। तिग्दा
 भिसम परमेश्वरसे पुइखबा म्हि थेनोन हिन्ना।

28 “डाला ताम थेःसी एनीगदे उदेक थातउ। तिग्दा भिसम
 चुहड्डबा धुइ खबान मुला, थे धुइरी परमेश्वरसे पुइखबा महिला
 काइ थेःसी सिबागदे जम्मान दोःसी सोला। 29 ज्यबा गे लबागदे
 जुकजुकधोनाला जुनी याड्डबारी दोःसी सोला ओच्छे आज्यबा गे
 लबागदे सजाय नाबाला लागिरी दोःसी सोला।*

30 “डाइ हाडसेन तिगै लबारी आखम, परमेश्वर आबासे सुड्डबा
 अन्छार निसाफ लबासे लमा डाइ लबा निसाफ ठीक तमुला।
 तिग्दा भिसम डाइ म्हन्बा अन्छार आहिन, तर डादा पुइखबासे
 म्हन्बा अन्छार डाइ गे लमुला।

31 “चुदे डाइ डाला बारेरी जे पाड्जी भिसम एनीगदेसे डाइ पाड्डबा
 ताम सत्य हिन्ना भिसी था आयाड्ड। 32 तर डाला बारेरी परमेश्वर

* 5:29 दानि १२:२

आबासेन सुड्ला, थेसे डाला बारेरी जुन ताम सुड्ला थे जम्मान ताम सत्य हिनना भिसी डादा था मुला।

33 “एनीगदेसे ताम घोबाला लागिरी हाडला म्हिगदेदा बपत्तिस्मा पिन्बा यूहन्ना मुबा ग्लारी पुइजी। ओच्छे थेसे थेनीगदेदा सत्य ताम पाइजी।* 34 डाइ म्हिगदेसे डाला बारेरी तिग ताम पाइमुला भिसी भर लबा आहिन, तर एनीगदेदा थार्ना लबाला लागिरीन डाइ चु ताम पाइबा हिनना। 35 यूहन्ना मी लुइसी य्हाल तना लबा नाडसल हड्बान मुबा, तर थेसे पिन्बा य्हालरी एनीगदे छिन्नड जे ताइबारी म्हाइजी।

36 “तर डाला बारेरी ताम पाइबा यूहन्ना भन्दाएनोन घेन ताम चुरी मुला। तिग्दा भिसम जुन गेगदे पूरा लबारी आबासे डादा पिन्बा मुला, थे गेगदे डाइ लबान मुला। चु गेसेन डादा परमेश्वरसे पुइखबा हिनना भिसी उन्बा मुला। 37 डादा पुइखबा आबासेनोन डाला बारेरी सुड्बा मुला। तर एनीगदेसे थेला काइ खाइमै थेःबा आरे, ओच्छे थेदा म्हाइबाएनोन आरे।* 38 थेसे सुड्बा बचन एनीगदेला सेमरी आचि। तिग्दा भिसम थेसे पुइखबा म्हिदा एनीगदेसे विश्वास आलनी। 39 एनीगदेसे जुकजुकधोनाला जुनी याइला भिसी बचनरी म्हाइमुला, थे बचनसेनोन डाला बारेरी पाइमुला। 40 तसैनोन जुकजुकधोनाला जुनी याइबाला लागिरी एनीगदे डा मुबा ग्लारी खबारी आम्हाइमुला।

41 “म्हिगदेसे डादा जयजयकार लगै भिसी डाइ म्हन्बा आरे। 42 तर एनीगदे परमेश्वरदा माया आलबा खाहड्बा खाल्ला म्हि हिनना भिबा ताम डादा था मुला। 43 डा हाडलान आबाला मिन किन्सी खमाएनोन एनीगदेसे डादा मान आलनी। तर स्य्हान्दो खालै म्हि हाडलान मिन किन्सी खजी भिसम एनीगदेसे थेदा मान लला। 44 एनीगदेसे डादा खाहड् लसी विश्वास लखम्ला? एनीगदे

* 5:33 यूह १:१९-२७; ३:२७-३० * 5:37 मत्ती ३:१७; मर्कू १:११; लूका ३:२२

हाड हाड न्हडरी चा गिकसेम गिकदा मान लगै भिसी म्हन्बा, तर परमेश्वरग्याम जे याड्बा मान चा किन्बारी आमहाडबा।

45 “परमेश्वर आबाला ओन्छाडरी डाइ एनीगदेला दोष उन्ना भिसी थाम्हन्गो। तर थार्बा पिन्ना भिसी एनीगदेसे विश्वास आश लबा मोशाला ठिमरी मुबा तामसेन एनीगदेला दोष उन्ना। 46 च्यागो, एनीगदेसे मोशादा विश्वास लबा हिन्सम दान्दे डादाएनोन विश्वास लसेला मुबा। तिग्दा भिसम थेसे डालान बारेरी भिबा मुबा! 47 तर मोशासे भिबा तामनोन एनीगदेसे विश्वास लबारी आखमनी भिसम डाइ पाड्बा ताम इन खाहड् लसी विश्वास लखम्ला?”

6

येशूसे हजार डा म्हिगदेदा चबा सहे पिन्बा

मत्ती १४:१३-२१; मर्कूस ६:३०-४४; लूका ९:१०-१७

1 जमाहेन्से येशू गालील समुन्द्रला क्याम्सडपट्टि फेपूजी। थे समुन्द्रदा तिबेरियास समुन्द्र भिसीनोन भिमुबा। 2 ओच्छे ल्हानान म्हिला हुलएनोन येशूला लिच्छा लिच्छा निजी। तिग्दा भिसम आखम्बा म्हिगदेदा येशूसे ल्हानान रेम खमना लबा उदेकला चिनुगदे थेनीगदेसे म्राड्बा मुबा। 3 ओच्छे येशू गडरी फेपूसी हाडला चेलागदेदेन छ्याम थेरीन धन्छ्याजी। 4 थे धुडरी यहूदीगदेला मिश्र यहुल्साग्याम फेसी खबा धिनदा ढन्सी धड्बा चाडएनोन खबारी छ्याड्बा मुबा।

5 येशूसे क्युर्सीन सहीमा हाड मुबा ग्लारी ल्हानान म्हिगदे खबान लबा म्राड्सी फिलिपदा “चु म्हिगदेदा पिन्बाला लागिरी यह्याडसे खानडग्यामसे गेड ग्लुसी भसे?” भिसी सुड्जी। 6 येशूसे थेला सेम च्याबाला लागिरी थेहड् भिसी सुड्बा मुबा। तिग्दा भिसम हाडसे तिग लबारी छ्याड्बा मुबा, थे ताम येशूदा था मुबा।

7 फिलिपसे येशूदा “य्हाडसे ग्यार्जा न्ही म्हइला डबलसे गेड ग्लुसी भसैनोन चुरी मुबा म्हिगदेदा जजाकर सुत्तै आथोप” भिसी भिजी।†

8 येशूला चेला सिमोन पत्रुसला आले अन्द्रियाससे येशूदा, 9 “चुरी कोला गिकदेन छ्याम जौला गोर डा गेडदेन गोर न्ही तार्डा मुला। तिग चुदेसे चु जम्मान म्हिगदेदा छ्योला?” भिसी भिजी।

10 येशूसे चेलागदेदा “म्हिगदेदा चिपुङ्गो” भिसी सुङ्गी। थेरी घेन पाङ्ग्याल मुबा, थेरी हजार डा ते चा हेम्फेबे जे मुबा। 11 जमाहेन्से येशूसे गेड छ्यारी थोसी परमेश्वरदा धन्यवाद पिन्माहेन्से जम्मान म्हिदा भो लसी पिन्जी, ओच्छे तार्डाएनोन भो लसी पिन्जी। थेरी मुबा जम्मान म्हिसे प्रेन्ना चजी।

12 थेनीगदे जम्मासेन प्रेन्ना चसी जिन्माहेन्से येशूसे हाडला चेलागदेदा “लेड्बा टगलटोगोल खेरो थानिगै, जम्मान पोप लउ” भिसी सुङ्गी। 13 थेतबासेलमा थेनीगदेसे चसी लेड्बा गोर डा जौला गेडला टगलटोगोल दुइमा च्युक न्ही सोली तजी।

14 येशूसे लबा चुहड्बा उदेकला गे म्राङ्सी म्हिगदेसे “जम्बुलिडरी फेपखला भिसी बचनसे य्हाडदा पाङ्बा अगमवक्ता† चा पक्कान चुनोन चीम” भिसी भिजी।* 15 थेतबासेलमा म्हिगदे खसी हाडदा जबरजस्ती ग्ले सहोबारी म्हाडबा मुला भिबा ताम था याङ्सी येशू दोःसी हाड गिकनोन गडरी फेपजी।

येशू समुन्द्रथोरी भ्रबा

मत्ती १४:२२-२३; मर्कूस ६:४५-५२

16 ड्यसे तमाहेन्से येशूला चेलागदे समुन्द्रपट्टि निजी। 17 ओच्छे थेनीगदे दौंगारी क्रेःसी समुन्द्रला क्याम्सड कफर्नहुम भिबा शहरपट्टि निजी। थे धुइरी धोप तसी जिन्बा मुबा, तसैनोन अझ

† 6:7 थे धुइरी धिन गिक गे लमा सिगा गिक म्हइला डबल गिक याङ्मुबा। † 6:14 “पाङ्बा अगमवक्ता” भिबा चा यूहन्ना हिन्ना (१:२१ सहीगो)। * 6:14 व्यव १८:१५

येशू थेनीगदे मुबा ग्लारी फेप्खबा आरेमुबा। 18 घेन लाबा खबासे लमा समुन्द्ररी छाल रेःबारी छ्याइजी। 19 चेलागदे दोंगा चलब लसी ओस्पन कोस गिक-न्ही ते थारेड धोमा, थेनीगदेसे येशू समुन्द्र थोथोरी भ्रसी हाडगदे मुबापट्टि फेप्खबान लबा म्राङ्जी। चु म्राङ्सी थेनीगदे लोङ्जी। 20 तर येशूसे थेनीगदेदा “डानोन हिन्ना, थालोङ्गो” भिसी सुङ्जी। 21 चु ताम थेःसी थेनीगदे ल्हानान ताङ्जी, ओच्छे येशूदा दोंगारी धन्छ्यापुङ्जी। जमाहेन्से तुरुन्तन थेनीगदे धोतोःबा ग्लारी धोजी।

22 ओच्छे समुन्द्रला क्याम्सडपट्टि मुबा म्हीगदेसे न्हडगरदड थेरी दोंगा गिक जेन म्राङ्जी। डाच्छाकुनु येशू चेलागदेदेन छ्याम दोंगारी फेप्बा आरेमुबा, तर थेला चेलागदे जे निमुबा भिबा ताम थेनीगदेदा था मुबा। 23 जमाहेन्से तिबेरियास भिबा शहरग्याम अर्गु दोंगागदे येशूसे परमेश्वरदा धन्यवाद पिन्सी थेनीगदेदा गेड पिन्बा ग्लाला डामरी धोखजी। 24 थेरी येशूदेन छ्याम चेलागदे आरेबा था याङ्सी थेनीगदे दोंगागदेरी क्रेःसी येशूदा म्हाइबान कफर्नहुम शहररी निजी।

जुनी पिन्बा गेड

25 थेनीगदेसे येशूदा समुन्द्रला क्याम्सडपट्टि स्याप्माहेन्से “गुरु, हाड चुरी खाइमा फेप्खजी?” भिसी ड्योइजी।

26 जमाहेन्से येशूसे थेनीगदेदा चुहङ् भिसी सुङ्जी, “एनीगदेसे डाला ताम ड्यानगो, डाइ लबा उदेकला गे म्राङ्सी आहिन, तर म्रेनना गेड चम्याङ्बासे लमान एनीगदेसे डादा म्हाइबा हिन्ना। 27 च्यागो, नाश तसी निबा चबा सहेला लागिरी जे दुख लसी गे थालउ, तर जुकजुकधोना चिबा चबा सहेला लागिरी दुख लसी गे लउ। चु चबा सहे एनीगदेदा परमेश्वरसे पुइखबा म्हीसे पिन्ना। तिग्दा भिसम चु गे लबाला लागिरीन परमेश्वर आबासे थेदा धम्बा मुला।”

28 जमाहेन्से थेनीगदेसे येशूदा “थेह्ण्ड् भिसम परमेश्वरसे म्हन्बा अन्छारला गे लबाला लागिरी डन्से तिग लतोःला?” भिसी ड्योडमा, 29 येशूसे थेनीगदेदा “परमेश्वरसे पुइखबा म्हिदा विश्वास लउ, एनीगदेसे लगै भिसी परमेश्वरसे म्हन्बा गे चा थेनोन हिन्ना” भिसी सुड्जी।

30 जमाहेन्से थेनीगदेसे येशूदा भिसी भिजी, “डन्से हाडदा विश्वास लबाला लागिरी हाडसे डन्दा खाह्ण्ड्बा उदेकला चिनु उन्खम्ला? हाडसे तिग लखम्ला? 31 यहाडला आखे म्हेमेगदेसे मी तोडतोडबा ग्लारीएनोन मनर्ना चजी। चु ताम बचनरीन ‘परमेश्वरसे थेनीगदेदा स्वर्गग्याम गेड पिन्जी’ भिसी भिबा मुला।”*

32 येशूसे थेनीगदेदा चुह्ण्ड् भिसी सुड्जी, “च्यागो, एनीगदेसे डाला ताम ड्यान्गो, एनीगदेदा स्वर्गग्याम गेड पिन्बा मोशा आहिन। तर स्वर्गग्याम सत्य गेड पिन्बा चा डाला आबा हिन्ना। 33 तिग्दा भिसम परमेश्वरसे पिन्बा गेड चा चुनोन हिन्ना, थे स्वर्गग्याम खसी जम्बुलिडला म्हिगदेदा जुनी पिन्मुला!”

34 थेनीगदेसे येशूदा “प्रभु, चु गेड डन्दा सदन पिन्गो” भिसी भिजी।

35 जमाहेन्से येशूसे थेनीगदेदा चुह्ण्ड् भिसी सुड्जी, “जुकजुकधोनाला जुनी पिन्बा गेड चा डानोन हिन्ना। डा मुबा ग्लारी खबागदे खाइमै आखेन, ओच्छे डादा विश्वास लबागदेदा खाइमै क्युइ आफुइ। 36 तर डाइ एनीगदेदा पाड्सी जिन्बा मुबा, एनीगदेसे डादा म्राड्सैनोन विश्वास आलनी। 37 आबासे डादा पिन्बा जति जम्मान डा मुबा ग्लारी खला, डा मुबा ग्लारी खबागदेदा डाइ तिगै लसीन आख्ला। 38 डा हाडसे म्हन्बा अन्छारला गे लबारी खबा आहिन, तर डादा पुइखबासे म्हन्बा

† 6:31 “मनर्ना” भिबा चा परमेश्वरसे स्वर्गग्याम पिन्बा गेड हिन्ना। * 6:31 प्रस्था १६:१५, ३१; भजन ७८:२४

अन्छारला गे लबारी डा स्वर्गग्याम खबा हिन्ना। 39 डादा पुइखबासे म्हन्बा ताम चा थेसे डादा पिन्बा म्हिगदे डाग्याम गिकनोन थाम्हागै, तर चु जम्बुलिडरी डा दोःसी खबा धुइरी डाइ थेनीगदेदा सोना लबारी खमगै भिसी हिन्ना। 40 तिग्दा भिसम डाला आबासे म्हन्बा ताम चा चुनोन हिन्ना, झादा म्राड्सी थेदा विश्वास लबागदे जम्मासेन जुकजुकधोनाला जुनी याड्गै, ओच्छे डा दोःसी खबा धुइरी डाइ थेनीगदेदा सिबाग्याम सोना लला।”

41 “स्वर्गग्याम खबा गेड डानोन हिन्ना” भिसी येशूसे सुड्बासे लमा यहूदी गन्बागदेसे येशूला बिरोध लसी ताम लबारी छ्याइजी। 42 थेनीगदेसे, “तिग चु योसेफला झा येशू आहिन?, चुला आबा आमादा यहाडसे डोसेबा आरे?, खाहड् लसी चुसे ‘डा स्वर्गग्याम खबा हिन्ना’ भिसी पाड्बा” भिसी भिजी।

43 जमाहेनसे येशूसे थेनीगदेदा चुहड् भिसी सुड्जी, “एनीगदेसे हाड हाड न्हडरी डाला बिरोध लसी ताम थालउ। 44 तिग्दा भिसम डादा पुइखबा आबासे डा मुबा ग्लारी खबा सेम आपिन्तेधोना खालैनोन डा मुबा ग्लारी खबारी आखम। डा मुबा ग्लारी खबागदे जम्मादान डा दोःसी खबा धुइरी डाइ सोना लला। 45 अगमवक्तागदेसेनोन परमेश्वरला बचनरी ‘परमेश्वरसेन जम्मान म्हिगदेदा लोप्ला’ भिसी भिबा मुबा। परमेश्वर आबाला ताम थेःसी थेग्यामसेन लोप्ला म्हिगदे जम्मान डा मुबा ग्लारी खला।* 46 परमेश्वर आबाग्याम खबा म्हिसे जे परमेश्वरदा म्राड्बा मुला। तर स्य्हान्दो खालैसेन थेदा म्राड्बा आरे। 47 थेतबासेलमा एनीगदेसे डाला ताम ड्यानगो, जुन म्हिसे विश्वास लला थेसे जुकजुकधोनाला जुनी याड्बा मुला। 48 च्यागो, जुकजुकधोनाला जुनी पिन्बा गेड डानोन हिन्ना। 49 एनीगदेला आखे म्हेमेगदेसे तोडतोडबा ग्लारी मनन् चजी, तसैनोन थेनीगदे सिजी। 50 तर

* 6:45 यशै ५४:१३

स्वर्गग्याम खबा गेड चुनोन हिन्ना, जुन म्हिसे चु गेड चला थे खाइमै आसि। 51 स्वर्गग्याम खबा छोन्बो गेड चा डानोन हिन्ना, जुन म्हिसे चु गेड चला थे खाइमै आसि। चु गेड चा डाइ जम्बुलिडला म्हिगदेसे जुकजुकधोनाला जुनी याङ्गै भिसी पिन्ना। थे गेड चा डालान ल्हुइ हिन्ना।”

52 चु ताम थे:सी यहूदीगदेदा बोमो रे:सी हाड हाड न्हडरी चुहड् भिसी ताम लबारी छ्याइजी, “चु म्हिसे खाहड् लसी हाडला ल्हुइ य्हाडदा चबारी पिन्खम्ला?”

53 जमाहेन्से येशूसे थेनीगदेदा चुहड् भिसी सुङ्गी, “च्यागो, एनीगदेसे डाला ताम ड्यानगो, चुदे एनीगदेसे परमेश्वरसे पुइखबा महिला ल्हुइ आचनी भिसम, का आथुङ्नी भिसम एनीगदेदेन छ्याम जुकजुकधोनाला जुनी आत। 54 तर डाला ल्हुइ चबा, डाला का थुङ्बा म्हिदेन छ्याम जुकजुकधोनाला जुनी तला। ओच्छे डा दो:सी खबा धुइरी डाइ थेदा सिबाग्याम सोना लला। 55 तिग्दा भिसम चनोन तो:बा स्हे चा डाला ल्हुइ हिन्ना ओच्छे थुङ्गोन तो:बा स्हे चा डाला का हिन्ना। 56 डाला ल्हुइ चबा, डाला का थुङ्बा म्हि डादेन छ्याम तला, ओच्छे डा थेदेन छ्याम तला। 57 छोन्बो परमेश्वरसे डादा पुइखबासे लमा डा थेग्यामसे सोला, थेहड् लसीन डादा चबा म्हिएनोन डाग्यामसेन सोला। 58 स्वर्गग्याम खबा गेड चुनोन हिन्ना। चु गेड एनीगदेला आखे म्हेमेगदेसे चबा गेड हड्बा आहिन। थेनीगदेसे थे गेड चजी तसैनोन थेनीगदे सिजी। तर चु गेड चबा म्हिगदे चा खाइमै आसि।” 59 चु ताम चा येशूसे कफर्नहुम भिबा शहररी यहूदीगदे हुप तबा दिमरी म्हिगदेदा लोप्बा धुइरी सुङ्बा मुबा।

ल्हानान चेलागदेसे येशूदा ख्लाबा

60 चु ताम थे:माहेन्से येशूला चेलागदे न्हडला ल्हानानसे “चुहड्बा गाहो बचन खाल्से ड्यान्खम्ला?” भिसी भिजी।

61 तर चेलागदेसे चु तामला बारेरी ताम लबान मुला भिबा था याड्सी येशूसे थेनीगदेदा चुहड् भिसी सुड्जी, “तिग डाइ पाड्बा तामसे लमा एनीगदेला विश्वास म्हाबा हिन्ना? 62 थेहड् भिसम एनीगदेसे परमेश्वरसे पुइखबा म्हिदा स्वर्गरी दो:सी निबा म्राड्मा एनीगदेला सेमरी खाहड्बा छोर्ला? 63 जुकजुकधोनाला जुनी पिन्बा चा परमेश्वरला आत्मासेन हिन्ना। चु गे चा महिला शक्तिसे लबारी खम्बा गे आहिन। डाइ एनीगदेदा पाड्बा ताम चा परमेश्वरला आत्मासे पिन्बा जुकजुकधोनाला जुनीला बारेरी हिन्ना। 64 तर एनीगदे न्हडरी गातेसे मी चु ताम विश्वास लबा आरे।” तिग्दा भिसम खाल्से विश्वास आल, खाल्से हाडदा धोका पिन्ना भिबा ताम येशूदा डाच्छाहेन्सेन था मुबा। 65 जमाहेन्से दो:सी येशूसे थेनीगदेदा “थेतबासेलमान डाइ एनीगदेदा चु ताम पाड्बा हिन्ना, चुदे डाला आबासे डा मुबा ग्लारी खआपुड्नी भिसम खालै म्हि डा मुबा ग्लारी खबारी आखम” भिसी सुड्जी। 66 चु तामसे लमा जमाकुनुहेन्से चेलागदे न्हडला ल्हानान चेलागदे येशूदेन छ्याम भ्रबारी ख्लाजी।

67 थेतबासेलमा येशूसे हाडला च्युक न्ही चेलागदेदा “तिग एनीगदेएनोन डादा ख्लासी निबा हिन्ना?” भिसी सुड्जी। 68 जमाहेन्से सिमोन पत्रुससे येशूदा भिसी भिजी, “प्रभु, जुकजुकधोनाला जुनी पिन्बा बचन मी हाडदेन छ्याम मुला भिसम डनी खाल मुबा ग्लारी निसे?”* 69 हाड परमेश्वरसे पुइखबा परमेश्वरला म्हि हिन्ना भिबा ताम डन्से था याड्सीन हाडदा विश्वास लबा हिन्ना।”

70 येशूसे थेनीगदेदा “एनीगदे च्युक न्हीदान डाइ धम्बा हिन्ना,

* 6:68 मती १६:१६; मर्कू ८:२९; लूका ९:२०

तसैनोन एनीगदे न्हडला गिक चा शैतान हिन्ना” भिसी सुड्जी।
71 चु ताम येशूसे सिमोन इस्करियोतला झा यहूदाला बारेरी सुड्बा
मुबा। तिग्दा भिसम च्युक न्ही चेला न्हडला तसीनोन थेसे लिच्छा
येशूदा धोका पिन्बारी छ्याइबा मुबा।

7

यहूदीगदेसे छाप्रोरी चिसी धड्बा चाड

1 जमाहेन्से येशू गालील अञ्चललान नाम्सा नाम्सारी फेप्जी,
तर यहूदिया अञ्चलरी चा फेप्बा सेम आलनी। तिग्दा भिसम
यहूदीगदेसे येशूदा साइबारी म्हाइमुबा। 2 थे धुइरी यहूदीगदेसे
छाप्रोरी चिसी धड्बा चाडां खबारी छ्याइबा मुबा।* 3 थेतबासेलमा
येशूदा हाडला आलेगदेसेनोन खिसी लसी चुहड् भिसी भिजी,
“चु ग्ला ख्लासी हाड यहूदिया अञ्चलरी फेपनोन फेप्गो,
थेरीनोन हाडसे लबा गेगदे हाडला चेलागदेसे म्राड्गै। 4 हाडदा
जम्मासेन डोसेगै भिसी म्हन्बा म्हिसे खाइमै लासी गे आलमुला।
हाडसेनोन थेहड्बान गेगदे लबा मुसम हाड खाल हिन्ना भिबा
ताम जम्बुलिडला म्हिगदेदा डोसेना लउ।” 5 तिग्दा भिसम येशूला
आलेगदेसेनोन येशूदा विश्वास आलमुबा!

6 थेतबासेलमा येशूसे थेनीगदेदा चुहड् भिसी सुड्जी, “डाला
लागिरी धुइ तबा आरे। तर एनीगदेला लागिरी मी खजिबै धुइ मुसै
ठीक मुला। 7 एनीगदेदा जम्बुलिडला म्हिगदेसे हेला आलमुला,
तर डादा चा हेला लमुला। तिग्दा भिसम थेनीगदेला बानीबेहोर
आज्यबा मुला भिसी डाइ पाड्मुला। 8 एनीगदे चा चाड धड्बारी
निउ, डा दान्दे आनि। तिग्दा भिसम डाला धुइ तबा आरे।” 9 थेहड्
सुड्सी येशू गालीलरीन धन्छ्याजी।

† 7:2 चु चाड यहूदीगदेसे हाडला आखे म्हेमेगदे बोगल न्ही दिडधोना तोडतोडबा
ग्लारी चिबा धुइदा ढन्बाला लागिरी छाप्रोरी चिसी धड्मुबा। * 7:2 लेवी २३:३४;
व्यव १६:१३

10 तर येशूला आलेगदे चाड धड्बारी निमाहेन्से येशूएनोन खालैसे था आयाड्ना लसी थेरी फेपूजी।

11 थेरी यहूदी नेतागदेसे येशूदा म्हाइबान, “थे म्हि खानड मुला?” भिसी म्हिगदेदा ड्योइजी।

12 ल्हानान म्हिगदेसे येशूला बारेरी चुहड् भिसी ताम लबान मुबा, कोइ कोइसे “थे ज्यबा म्हि हिन्ना” भिसी भिमुबा। तर कोइ कोइसे चा “आहिन, थेसे ल्हानान म्हिगदेदा न्होड्ना लबा मुला” भिसी भिमुबा। 13 तसैनोन यहूदी नेतागदेदेन छ्याम लोड्सी खालैसेन येशूला बारेरी स्य्हान्दो म्हिसे था याड्ना लसी ताम आलमुबा।

चाडला धुइरी येशूसे म्हिगदेदा लोपबा

14 चाडला गुडरी परमेश्वरला मन्दिररी फेपूसी येशूसे म्हिगदेदा लोपबारी छ्याइजी। 15 यहूदी नेतागदे उदेक म्हन्बान, “चुसे तिगै पढब आलना चुहड्बा ज्ञान बुद्धि खानडग्याम याड्जी?” भिसी भिजी।

16 जमाहेन्से येशूसे थेनीगदेदा चुहड् भिसी जोहाब पिन्जी, “डाइ डाला ताम लोपबा आहिन, तर डादा पुइखबा परमेश्वरला ताम लोपबा हिन्ना। 17 चुदे खालै म्हिसे परमेश्वरसे म्हन्बा अन्छार लबारी म्हाइजी भिसम थेसे जे डाइ लोपबा ताम परमेश्वरग्याम हिन्ना कि डालान सेमला ताम लोपबा हिन्ना भिसी था याड्ला। 18 जुन म्हिसे हाडलान ताम पाड्ला थेसे हाडदान मान लगै भिसी म्हन्मुला। तर हाडदा पुइखबादा मान लगै भिसी म्हन्बा म्हिसे चा सत्य ताम पाड्मुला, थेसे तिगै लुसीला ताम आलमुला। 19 मोशासे एनीगदेदा ठिम पिन्बा मुला, तसैनोन एनीगदेसे मोशासे पिन्बा ठिम अन्छार गे आलनी। एनीगदेसे डादा तिग्दा साइबारी म्हाइबा?”

20 थेरी मुबा म्हिला हुलसे येशूदा “एदा म्हडसे स्यापूजीम, खाइ एदा खाल्से साइबारी म्हाइबा मुला?” भिसी भिजी।

21 जमाहेन्से येशूसे थेनीगदेदा चुहड् भिसी सुड्जी, “डाइ गे गिक लमा एनीगदे तिग्दा उदेक म्हन्बा? 22 च्यागो, खतना लउ भिसी एनीगदेदा मोशासे ठिम सहोसी पिन्बा मुला। हिन्बाम थे ठिम मोशासे सहोबा आहिन, एनीगदेला आखे म्हेमेसेन सहोबा हिन्ना। थेतबासेलमा एनीगदेसे बल्पबा न्हबा धिनकुनुएनोन हाडला झागदेला खतना लमुला।* 23 य्हाडसे मोशासे पिन्बा ठिम आख्लागे भिसी बल्पबा न्हबा धिनरीएनोन खतना लमुला भिसम डाइ चा आखम्बा म्हि गिकदा खम्ना लमा एनीगदेसे तिग्दा डादा बोमो लबा? 24 एनीगदेसे महिला ली च्यासी निसाफ थालउ, तर ठीक लसी निसाफ लउ।”

तिग चुनोन ख्रीष्ट हिन्ना?

25 यरूशलेमग्याम खबा कोइ कोइ म्हिगदेसे चुहड् भिसी भिजी, “तिग यहूदी धर्मगुरुगदेसे साइबारी म्हाइबा म्हि चुनोन आहिन? 26 च्यागो, आलोङ्गान चुसे जम्मादान लोपबान मुला, तर चुदा थेनीगदेसे तिगै आपाङ्नी! डन्ना नेतागदेसेनोन चुनोन थार्बा पिन्बा ख्रीष्ट हिन्ना भिसी पक्कान था याड्जी कि तिग? 27 चु म्हि खाहड् लसी थार्बा पिन्बा ख्रीष्ट हिन्ना, तिग्दा भिसम चु म्हि खानडग्याम खबा हिन्ना भिबा ताम य्हाडदा था मुला। तर ख्रीष्ट फेपखबा धुइरी खानडग्याम फेपखला भिबा ताम खालैदान था आत।

28 थे धुइरी परमेश्वरला मन्दिररी लोपबान लमा येशूसे घेन काइरी चुहड् भिसी सुड्जी, “डा खानडग्याम खबा हिन्ना भिबादेन डा खाल हिन्ना भिबा ताम एनीगदेदा पक्कान था मुला। च्यागो, डा हाडनोन खबा आहिन, तर डादा खालैसे पुइखबा हिन्ना थे चा सत्य हिन्ना, एनीगदेसे थेदा डोसेबा आरे। 29 तर डाइ थेदा डोसेबा मुला। तिग्दा भिसम थेसे पुइखबासे लमा डा थेग्याम खबा हिन्ना।”

* 7:22 उत्प १७:१०; लेवी १२:३ * 7:23 यूह ५:९

30 चु ताम थेःसी थेनीगदेसे येशूदा चुड्बारी म्हाइजी। तर खालैसेन या आझाड्नी, तिग्दा भिसम येशूला धुइ तबा आरेमुबा।
31 थेरी मुबा ल्हानान म्हिगदेसे येशूदा विश्वास लजी। ओच्छे थेनीगदेसे, “थार्बा पिन्बा ख्रीष्ट फेप्खसी, तिग चु म्हिसे भन्दा अझ उदेकला गेगदे लला?” भिसी भिजी।

येशूदा चुड्बारी म्हाइबा

32 म्हिगदेसे येशूला बाररी खासखास खुसखुस ताम लबान लबा फरिसीगदेसे थेःजी। जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे येशूदा चुड्बाला लागिरी परमेश्वरला मन्दिर खुड्बा सिपाहीगदेदा पुइजी।

33 येशूसे म्हिगदेदा चुहड् भिसी सुड्जी, “तिगै धिनधोना डा एनीगदेदेन छ्यामनोन तला, जमाहेन्से डादा जुन्से पुइखबा मुला, डा थे मुबा ग्लारीन निला। 34 ओच्छे एनीगदेसे डादा म्हाइला, तर आस्याप। तिग्दा भिसम डा निबा ग्लारी एनीगदे खबारी आखम।”

35 चु ताम थेःसी यहूदी नेतागदेसे हाड हाड न्हडरी चुहड् भिसी भिजी, “चु म्हि खानड निबारी छ्याइजी? एनीगदेसे डादा आस्याप भिसी भिमुला। अर्गु यहुल्सारी ससा बडबड तसी चिबा यहूदीगदे मुबा ग्लारी निसी थे यहुल्साला ग्रीक ग्योइ पाड्बा म्हिगदेदा लोपबारी म्हाइजी कि तिग? 36 ‘एनीगदेसे डादा म्हाइला, तर आस्याप। तिग्दा भिसम डा निबा ग्लारी एनीगदे खबारीन आखम’ भिसी चु म्हिसे तिग ताम पाड्बा?”

जुकजुकधोनाला जुनी पिन्बा क्युइ

37 चाड जिन्बा धिनकुनु अथवा मुल धिनकुनु येशूसे म्हिगदेला डाच्छा राप्सी घेन काइरी चुहड् भिसी सुड्जी, “चुदे खालैदा क्युइ फुइबा मुसम डा मुबा ग्लारी खसी थुड्गो।* 38 परमेश्वरला बचनसे

* 7:37 लेवी २३:३६

पाङ्बा हङ्गनोन डादा विश्वास लबा म्हिला सेम न्हङ्ग्याम जुकजुकधोनाला जुनी पिन्बा क्युइ थोन्ना।”* 39 चु ताम चा येशूसे हाडदा विश्वास लबा म्हिगदेसे याङ्तोःबा परमेश्वरला आत्माला बारेरी सुङ्बा मुबा। परमेश्वरसे थें धुइधोना हाडला आत्मा पुइखबा आरेमुबा। तिग्दा भिसम थें धुइधोना येशूदा कुसरी टाँगब लबादेन स्वर्गरी घेन य्हालदेन शक्तिरी फेप्बा धुइ तबा आरेमुबा।

थें खाल?

40 येशूला ताम थेंःसी थेंरी मुबा कोइ कोइ म्हिगदेसे “चु म्हि पक्कान थेंनोन अगमवक्ता† हिनना” भिसी भिजी।*

41 ओच्छे कोइ कोइसे “चु थार्बा पिन्बा ख्रीष्ट हिनना” भिसी भिजी। तर कोइ कोइसे चुहङ्गु भिसी भिजी, “तिग गालील अञ्चलग्यामसेनोन थार्बा पिन्बा ग्ले फेप्वला? 42 परमेश्वरला बचनरी थार्बा पिन्बा ख्रीष्ट दाऊदला सन्तानग्याम दाऊदलान नाम्सा बेथलेहेमग्यामसेन खला भिसी पाङ्बा आरे?”* 43 चुहङ्गु लसी येशूसे लमा म्हिगदे हाड हाड न्हङ्गरीन आढिक्नी। 44 थेंनीगदे न्हङ्गला गाते म्हिगदेसे येशूदा चुङ्बारी म्हाइजी। तर थेंनीगदे खालैसेन या आझाङ्गी।

यहूदी धर्मगुरुगदेसे विश्वास आलबा

45 परमेश्वरला मन्दिर खुङ्बा सिपाहीगदे दोःसी खमाहेनसे परमेश्वरला मन्दिररी पूजा लबा मुल म्हिगदेदेन फरिसीगदेसे थेंनीगदेदा “खाइ, एनीगदेसे थेंदा तिग्दा आभवा?” भिसी भिजी।

* 7:38 यशै ५८:११; जक १४:८ † 7:40 “थेंनोन अगमवक्ता” भिबा चा यूहन्ना हिनना (यूहन्ना १:२१ सहीगो)। * 7:40 वयव १८:१५ * 7:42 २ शमू ७:१२; यर्मि २३:५-६; मीका ५:२; भजन ८९:३-४

46 जमाहेन्से थे सिपाहीगदेसे थेनीगदेदा “थे म्हिला ताम थे:सी डनी उदेक तजी। थेहड्बा ताम मी डन्से खाइमै थे:बा आरे” भिसी भिजी।

47 जमाहेन्से फरिसीगदेसे थेनीगदेदा चुहड् भिसी भिजी, “एनीगदेदाएनोन थेसे झुक्याब लजी कि तिग? 48 तिग यहूदी नेतागदेदेन फरिसीगदे खालैसे थेदा विश्वास लबा मुला? 49 तर परमेश्वरसे मोशादा पिन्बा ठिम आसेबा चु म्हिगदेसे परमेश्वरग्याम सजाय याड्ला।” 50 डाचछा म्हुनड तिरेम येशूदा हूप तबारी निबा थेनीगदे न्हडलान निकोदेमस भिबा म्हिसे चुहड् भिसी भिजी,* 51 “तिग य्हाडला ठिम अन्छार थे म्हिसे लबा तामदेन गे आघोनान य्हाडसे थेदा दोष उनबारी तला?”

52 तर स्यूहान्दोगदेसे थेदा “एएनोन गालील अञ्चलला हिन्ना? परमेश्वरला बचन ज्यना लसी पढब लउ। जमाहेन्से एसे गालीलग्याम खाइमै खालै अगमवक्ता आख भिबा ताम था याड्ला” भिसी भिजी। 53 जमाहेन्से थेनीगदे जम्मान हाड हाडला दिमरी निजी।

8

स्यूहान्दोदेन छ्याम ब्रेल्सी भ्रबा म्रिडम्हेमे

1 तर येशू चा जैतून भिबा गडरी फेपजी। 2 येशू न्हडगरदड स्यूहोरीन परमेश्वरला मन्दिररी फेपखजी। जमाहेन्से जम्मान म्हिगदे येशू मुबा ग्लारी खजी। ओच्छे येशू धन्छ्यासी जम्मान म्हिगदेदा लोपबारी छ्याइजी।

3 यहूदी धर्मगुरुगदेदेन फरिसीगदेसे स्यूहान्दोदेन छ्याम ब्रेल्सी चिबान लबा धुइरी स्यापबा म्रिडम्हेमेदा चुड्सी येशू मुबा ग्लारी भजी। ओच्छे जम्मालान डाचछा थे म्रिडम्हेमेदा राप्सी चिपुड्जी।

4 थेनीगदेसे येशूदा चुहड् भिसी भिजी, “गुरु, चु स्यूहान्दोदेन

* 7:50 यूह ३:१-२

छ्याम ब्रेल्बान लबा म्रिडम्हेमेदा चुड्सी डन्से हाड मुबा ग्लारी भसी खबा मुला। ⁵ यहाडला मोशासे ठिमरी चुहड्बा म्रिडम्हेमेदा युडबासे तोसी साइगो भिसी कुल्बा मुला। हाडसे चा चुला बारेरी तिग सुड्बा?”* ⁶ तर येशूदा दोष लम्याड्ला कि भिसी थेनीगदेसे चुहड् भिसी ड्योडबा मुबा।

येशूसे कू तसी या जुम्बीसे सरी भिबारी छ्याइजी। ⁷ थेनीगदेसे येशूदा ड्योडबाला ड्योडबान लमाहेन्से येशू राप्सी थेनीगदेदा “जुन म्हिसे खाइमै पाप लबा आरे थेसे डाच्छा चु म्रिडम्हेमेदा युडबासे तोड” भिसी सुड्जी। ⁸ जमाहेन्से येशूसे दोःसी कू तसी सरी भिजी।

⁹ चु ताम थेःसी थेरी मुबा जम्मान म्हिगदे घेनहेन्से जजाधोना गिक गिक लसी थेग्याम निजी। ओच्छे थेरी येशूदेन छ्याम थे म्रिडम्हेमे जे तजी। थे म्रिडम्हेमे चा अझ येशूला डाच्छापट्टि राप्सी चिबा मुबा। ¹⁰ जमाहेन्से येशू राप्सी थे म्रिडम्हेमेदा चुहड् भिसी सुड्जी, “खाइ, एदा दोष लबा म्हिगदे खानड निजी? तिग थेनीगदे खालैसेन एदा सजाय आपिन्नी?”

¹¹ जमाहेन्से थे म्रिडम्हेमेसे येशूदा “प्रभु, खालैसेन तिगै आलनी” भिसी भिमा, येशूसे थेदा “डाइएनोन एदा सजाय आपिन, दाहेन्से निउ, तर दोःसी पाप थालउ” भिसी सुड्जी।†

जम्बुलिडला य्हाल

¹² दोःसीनोन येशूसे म्हिगदेदा लोपबान, “जम्बुलिडला य्हाल डानोन हिन्ना। डादेन छ्याम भ्रबा म्हि खाइमै धोपधोपरी भ्रआतोः। तिग्दा भिसम थेसे जुनी पिन्बा य्हाल याड्ला” भिसी सुड्जी।*

¹³ जमाहेन्से फरिसीगदेसे येशूदा “एसे हाडलान बारेरी पाड्बान मुला, एसे पाड्बा ताम सत्य आहिन” भिसी भिजी।*

* 8:5 लेवी २०:१०; वयव २२:२२-२४ † 8:11 जम्मान भन्दा पुरानो ग्रीक बाइबलगदेरी ७:५३ पदहेन्से ८:११ पदधोनाला ताम भिबा आरे। * 8:12 मत्ती ५:१४; यूह ९:५ * 8:13 यूह ५:३१

14 येशूसे थेनीगदेदा चुहड् भिसी सुड्जी, “डाइ डालान बारेरी पाड्सैनोन डाइ पाड्बा ताम सत्य हिनना। तिग्दा भिसम डा खानडग्याम खबा हिनना, ओच्छे खानड निबान मुला भिबा ताम डादा था मुला। तर एनीगदेदा चु ताम था आरे। 15 एनीगदेसे मी महिला ज्ञान बुद्धिग्याम निसाफ लमुला। तर डाइ मी खालैला निसाफ आल। 16 चुदे डा हाडसेन निसाफ लतोःजी भिसम डाइ लबा निसाफ चा सत्य तला। तिग्दा भिसम डा गिक जे आरे, तर डादा पुइखबा आबाएनोन डादेन छ्याम मुला। 17 मोशासे पिन्बा एनीगदेला ठिमरी म्हि न्हीसे पाड्बा ताम चा सत्य तमुला भिसी भिबा मुला।* 18 हाडलान बारेरी सत्य ताम पाड्बा म्हि गिक चा डानोन हिनना, ओच्छे स्य्हान्दो चा डादा पुइखबा आबा हिनना।”

19 चु ताम थेःसी थेनीगदेसे येशूदा “एला आबा खानड मुला?” भिसी ड्योइमा, येशूसे थेनीगदेदा “एनीगदेसे डादाएनोन डोसेबा आरे, डाला आबादाएनोन डोसेबा आरे। चुदे एनीगदेसे डादा डोसेबा हिनसम डाला आबादाएनोन डोसेसेला मुबा” भिसी सुड्जी।

20 चु जम्मान ताम येशूसे परमेश्वरला मन्दिररी भेटी युबा ताड मुबा ग्लाग्याम लोपबान लबा धुइरी सुड्बा मुबा। तर थेनीगदे खालैसेन येशूदा आचुड्नी। तिग्दा भिसम अझ येशूला धुइ तबा आरेमुबा।

म्हिगदेसे येशूदा डोआसेबा

21 दोःसी येशूसे थेनीगदेदा “डा चुग्याम निनोन निला, ओच्छे एनीगदेसे डादा म्हाइला। तर एनीगदे हाडलान पापरी सिला। डा निबा ग्लारीनोन एनीगदे खबारी आखम” भिसी सुड्जी।

22 चु ताम थेःसी यहूदी नेतागदेसे “चु म्हि सिबारी म्हाइबा कि तिग? चुसे मी ‘डा निबा ग्लारी एनीगदे खबारी आखम भिसी भिमुला’ भिसी हाड हाड न्हडरी ताम लजी।”

* 8:17 वयव १९:१५; गन्ती ३५:३०

23 जमाहेन्से येशूसे थेनीगदेदा “एनीगदे मारग्याम खबा हिन्ना, डा तोरग्याम खबा हिन्ना। एनीगदे चुनोन जम्बुलिडला हिन्ना, तर डा चा चु जम्बुलिडला आहिन। 24 थेतबासेलमा ‘एनीगदे हाडलान पापरी सिला’ भिसी डाइ एनीगदेदा पाड्सी जिन्बा मुला। चुदे एनीगदेसे ‘डा थेनोन हिन्ना’† भिसी डादा विश्वास आलनी भिसम एनीगदे हाडलान पापरी सिला।”

25 जमाहेन्से थेनीगदेसे येशूदा “ए खाल हिन्ना?” भिसी ड्योइमा, येशूसे थेनीगदेदा चुहड् भिसी सुड्जी, “डा थेनोन हिन्ना, चु ताम डाइ एनीगदेदा डाच्छान पाड्बा मुला। 26 एनीगदेला बारेरी डाइ पाड्तो:बा तामदेन एनीगदेला निसाफ लतो:बा ताम ल्हानान मुला। तर डादा पुइखबा चा सत्य मुला, ओच्छे थेग्याम डाइ जुन ताम थे:जी थेनोन ताम डाइ जम्बुलिडला म्हिगदेदा पाड्बा मुला।”

27 येशूसे परमेश्वर आबाला बारेरी सुड्बान मुबा भिबा ताम थेनीगदेसे आघोनी। 28 थेतबासेलमा येशूसे थेनीगदेदा चुहड् भिसी सुड्जी, “एनीगदेसे परमेश्वरसे पुइखबा म्हिदा तोर थीमाहेन्से† जे डा थेनोन चीम भिबादेन डाइ डालान सेमग्याम ताम पाड्बा आहिन्बा चीम, तर परमेश्वर आबासे लोप्बा अन्छार जे पाड्बा चीम भिबा ताम एनीगदेसे था याड्ला। 29 ओच्छे डादा पुइखबा डादेन छ्यामनोन मुला, थेसे डादा खाइमै आख्लामुला। तिग्दा भिसम डाइ सदन थेदा सेम निबा गे जे लमुला।” 30 चु ताम थे:सी ल्हानान म्हिगदेसे येशूदा विश्वास लजी।

सत्यसे पापग्याम फेला

31 येशूसे हाडदा विश्वास लबा यहूदीगदेदा चुहड् भिसी सुड्जी, “एनीगदे डाइ लोप्बा अन्छार भ्रजी भिसम एनीगदे डाला पक्का

† 8:24 “डा थेनोन हिन्ना” भिबा चा परमेश्वरला बचनरी परमेश्वरला मिन हिन्ना।

† 8:28 “तोर थीमाहेन्से” भिबा चा येशूदा कुसरी टाँगब लबा हिन्ना।

चेला दोला। 32 ओच्छे सत्य तिग हिन्ना भिसी एनीगदेसे था याङ्ला, थेनोन सत्यसे एनीगदे खालैला तहरी चिआतोः।”

33 थेनीगदेसे येशूदा “डनी अब्राहामला सन्तान हिन्ना, दान्देथोना डनी खालैला नोकर दोबा आरे। हाडसे उन्दा स्यूहान्दोला तहग्याम फेला भिसी सुङ्बाला अर्थ चा तिग हिन्ना?” भिसी भिजी।*

34 जमाहेन्से येशूसे थेनीगदेदा चुहङ् भिसी सुङ्जी, “च्यागो, एनीगदेसे डाला ताम ड्यानगो, पाप लबागदे जम्मान पापला तहरी तला। 35 नोकर सदन मालिकला दिमरी आचि, तर झा चा सदन चिला। 36 थेतबासेलमा परमेश्वरला झासे एनीगदेदा फेजी भिसम एनीगदे पक्कान फेला। 37 एनीगदे अब्राहामला सन्तान हिन्ना भिसी डादा था मुला। तसैनोन एनीगदेसे डाइ पाङ्बा ताम नाबारी आखम्बासे लमा डादा साइबारी म्हाइबा मुला। 38 डा डाला आबादेन छ्याम मुबा धुइरी डाइ जुन ताम म्राङ्मुबा, थेनोन ताम डाइ एनीगदेदा पाङ्बा हिन्ना। तर एनीगदेसे चा एनीगदेला आबाग्याम तिग थेःबा मुला थेनोन लमुला।”

39 थेनीगदेसे येशूदा “डन्ना आबा चा अब्राहामनोन हिन्ना” भिसी भिमा, येशूसे थेनीगदेदा चुहङ् भिसी सुङ्जी, “एनीगदे पक्कान अब्राहामला सन्तान हिन्सम अब्राहामसे लबा हङ्बा गे एनीगदेसेनोन लसेला मुबा। 40 तर डाइ परमेश्वरग्याम थेःबा सत्य ताम एनीगदेदा पाङ्मा एनीगदेसे चा डादा साइबारी म्हाइजी। तर अब्राहामसे मी चुहङ्बा गे आलनी। 41 एनीगदेला आबासे जुन गे लबा मुबा, थेनोन गे एनीगदेसेनोन लबा मुला।”

जमाहेन्से थेनीगदेसे येशूदा “डनी स्यूहान्दोदेन छ्याम ब्रेल्सी भ्रमा न्हबा कोलागदे आहिन, तर परमेश्वरनोन डन्ना आबा हिन्ना” भिसी भिजी।

* 8:33 मती ३:९; लूका ३:८

42 येशूसे थेनीगदेदा चुहड् भिसी सुड्जी, “च्यागो, एनीगदेला आबा परमेश्वरनोन हिन्सम एनीगदेसे डादा माया लसेला मुबा। तिग्दा भिसम परमेश्वरसे पुडखबासे लमा डा दान्दे चुरी मुला। डा हाडला सुरसे खबा आहिन, तर परमेश्वरसेन डादा पुडखबा हिन्ना। 43 एनीगदेसे तिग्दा डाइ पाड्बा ताम आघोबा? तिग्दा भिसम एनीगदेसे डाला ताम नाआखम्नी। 44 एनीगदेला आबा शैतान हिन्ना, एनीगदेसे हाडला आबासे म्हन्बा अन्छारनोन गे लमुला। थेसे मी डाच्छाहेन्से म्हि साइबा मुबा, थे सत्यरी खाइमै भ्रबारी आखम। तिग्दा भिसम थेदेन छ्याम सत्य भिबा मुनोन आरे। थेसे सदन हाडला बानीबेहोर अन्छार लुसीला ताम पाड्मुला। थेतबासेलमा थे लुसीला ताम पाड्बा म्हि हिन्ना, थे जम्मान लुसीला तामला आबा हिन्ना। 45 तर एनीगदेसे डाला ताम विश्वास आलमुला। तिग्दा भिसम डाइ सत्य ताम पाड्मुला। 46 एनीगदे न्हडला खाल्से डादा पापी भिसी दोष लबारी खम्ला? डाइ सत्य ताम पाड्मा एनीगदेसे तिग्दा डादा विश्वास आलबा? 47 परमेश्वरला म्हिगदेसे परमेश्वरला ताम ड्यान्मुला। तर एनीगदे चा परमेश्वरला म्हि आहिन। थेतबासेलमा एनीगदेसे परमेश्वरला ताम आड्यान्मुला।”

अब्राहाम भन्दा येशू डाच्छा

48 यहूदी नेतागदेसे येशूदा “डन्से पाड्बा ताम ठीक हिन्ना। ए सामरी यहूलला हिन्ना, एदा म्हडसे स्याप्बा मुला” भिसी भिजी।

49 येशूसे थेनीगदेदा चुहड् भिसी सुड्जी, “डादा म्हडसे स्याप्बा आरे। डाइ डाला आबादा मान लबा मुला, तर एनीगदेसे डादा पेःना लमुला। 50 डाइ डादा मान लगै भिसी म्हन्बा आहिन, तर डादा मान लबादेन डाला लागिरी निसाफ लसी पिन्बा म्हि स्य्हान्दोन मुला। 51 थेतबासेलमा च्यागो, एनीगदेसे डाला ताम ड्यान्गो, चुदे खालै म्हिसे डाला ताम ड्यान्जी भिसम थे खाइमै आसि।”

52 यहूदीगदेसे येशूदा चुहड् भिसी भिजी, “एदा म्हडसे स्यापबान हिन्ना भिसी दाहेन्से डन्दा पक्का था तजी। तिग्दा भिसम अब्राहामदेन अगमवक्तागदे सिजी, तर एसे चा ‘खालै म्हिसे डाइ पाड्बा ताम ड्यान्जी भिसम थे खाइमै आसि’ भिसी भिमुला। 53 तिग ए डन्ना म्हमे अब्राहाम भन्दा घेन हिन्ना? थे सिजी, ओच्छे अगमवक्तागदे एनोन सिजी। एसे चा हाडदा खाल भिसी म्हन्बा?”

54 येशूसे थेनीगदेदा चुहड् भिसी सुड्जी, “डाइ हाडदा मान लगै भिसी म्हन्जी भिसम थे गे आखेल्बा ताम हिन्ना। तर डादा मान पिन्बा चा डालान आबा हिन्ना, डाला आबादान एनीगदेसे यहाडला परमेश्वर भिसी पाड्मुला। 55 तर एनीगदेसे थेदा डोसेबा आरे। डाइ चा थेदा ज्यना लसी डोसेबा मुला। चुदे डाइएनोन थेदा डोसेबा आरे भिसी भिजी भिसम डाएनोन एनीगदे हड्बान लुसीला ताम पाड्बा म्हि दोला। तर डाइ थेदा डोसेबा मुला, ओच्छे थेसे सुड्बा अन्छारनोन डाइ गे लबा मुला। 56 एनीगदेला म्हमे अब्राहामसेनोन डा खबा धिन च्याबारी ल्हानान सेम लबा मुबा। ओच्छे थेसे डा खबा धिन म्राड्सी जिन्बासे लमा ताड्जी।”

57 थेतबासेलमा यहूदीगदेसे येशूदा “एसे बोगल न्हीसे च्युइ दिड मी तबा आरे भिसम खाहड् लसी एसे अब्राहामदा म्राड्जी?” भिसी भिजी।

58 जमाहेन्से येशूसे थेनीगदेदा “च्यागो, एनीगदेसे डाला ताम ड्यान्गो, अब्राहाम न्हबा भन्दा डाच्छाहेन्सेन ‘डा थेनोन हिन्ना’ भिबा मुनोन मुबा” भिसी सुड्मैछ्याम, 59 थेनीगदेसे येशूदा तोबारी भिसी युड्बा दुइजी। तर येशू लासी परमेश्वरला मन्दिरला ग्यापग्याम सुटुक्क थोन्सी फेपजी।

9

मी आम्राड्बा म्हिसे म्राड्बा

1 थेग्याम फेपूबान लमा येशूसे न्हमान मी आम्राड्बा म्हि गिकदा स्यापूजी। 2 येशूला चेलागदेसे येशूदा “गुरु, खाल्ला पापसे लमा चु म्हि न्हमान काना न्हजी, चुलान पापसे लमा कि चुला आबा आमाला पापसे लमा चुहड् तबा हिन्ना?” भिसी ड्योइजी।

3 जमाहेन्से येशूसे थेनीगदेदा चुहड् भिसी सुड्जी, “थेला पापसे लमाएनोन आहिन, थेला आबा आमाला पापसे लमाएनोन आहिन। तर परमेश्वरला गे थेग्याम म्राड्गै भिसीन थे काना तबा हिन्ना। 4 धिनी मुबा धुइरीन य्हाडसे डादा पुइखबाला गे लतोःला। धोप तमाहेन्से खालैसेन गे लबारी आखम। 5 डा जम्बुलिडरी चितेधोना डानोन जम्बुलिडला य्हाल हिन्ना।”*

6 चुहड् सुड्माहेन्से येशूसे सरी थो स्वाजी, ओच्छे थोसे साप्रा ज्योपूसी थे काना महिला मीरी फोर्सी पिन्जी। 7 ओच्छे थेदा चुहड् भिसी सुड्जी, “सिलोआम भिबा घ्योइरी निसी ली खुउ।” सिलोआम भिबाला अर्थ चा पुइबा हिन्ना। ओच्छे थे, थे घ्योइरी निसी ली खुजी। जमाहेन्से थेसे म्राड्जी, ओच्छे दोःसी खजी। 8 थेला खिमजेमगदेदेन थेदा डाच्छा ह्रीसी चिबा म्राड्बा म्हिगदेसे “तिग चु थे ह्रीबा म्हि आहिन?” भिसी ड्योइजी। 9 कोइ कोइ म्हिसे थेदा म्राड्सी, “चु मी थेनोन ह्रीबा म्हि हिन्ना” भिसी भिबान मुबा। स्य्हान्दोगदेसे चा हिन्बाम थे हड्बान म्राड्बा चीम, तर थे म्हि “आहिन” भिसी भिजी।

तर थे म्हिसे “डा थेनोन हिन्ना” भिसी भिबाला भिबान मुबा।

10 थेनीगदेसे थेदा “दान्दे एसे खाहड् लसी म्राड्जी?” भिसी ड्योइजी।

11 जमाहेन्से थेसे थेनीगदेदा “येशू भिबा म्हि गिकसे साप्रा ज्योपूसी डाला मीरी फोर्सी डादा ‘सिलोआमरी निसी खुउ’ भिसी सुड्जी। ओच्छे निसी खुमाहेन्से डाइ म्राड्जी” भिसी भिजी।

* 9:5 मत्ती ५:१४; यूह ८:१२

12 थेनीगदेसे थेदा “थे म्हि खानड मुला?” भिसी ड्योइमा, थेसे “डादा था आरे” भिसी भिजी।

फरिसीगदेसे ड्योइबा छार्बा लबा

13 जमाहेन्से थेनीगदेसे डाच्छा काना मुबा म्हिदा फरिसीगदे मुबा ग्लारी भोर्जी। 14 येशूसे साप्रा ज्योप्सी थेला मीरी फोर्सी थेदा खमना लबा धिन चा बल्पबा न्हबा धिनकुनु मुबा। 15 फरिसीगदेसेनोन थेदा “एसे खाहड् लसी म्राड्जी?” भिसी ड्योइमा, थेसे थेनीगदेदा “येशूसे साप्रा ज्योप्सी डाला मीरी फोर्सी पिन्जी, ओच्छे डाइ खुमाहेन्से म्राड्जी” भिसी भिजी।

16 फरिसीगदे न्हडला कोइ कोइसे “थे म्हि परमेश्वरग्याम खबा आहिन। तिगदा भिसम थेसे बल्पबा न्हबा धिनदा आधड्मुला” भिसी भिजी। तर स्य्हान्दोगदेसे चा “पापी म्हिसे खाहड् लसी चुहड्बा उदेकला गे लबारी खम्ला?” भिसी भिजी। थेतबासेलमा थेनीगदे हाड हाड न्हडरी आढिकनी।

17 थेनीगदेसे दोःसीनोन थे काना म्हिदा “थे म्हिसे एला मी खमना लजी, दाहेन्से एसे चा थे म्हि खाल भिसी म्हनबा मुला” भिसी ड्योइमा, थेसे “थे म्हि अगमवक्ता हिनना” भिसी भिजी।

18 यहूदी नेतागदेसे थे पक्कान काना मुबा, ओच्छे दान्दे म्राड्खम्बा हिनना भिसी विश्वास लबारी आखमनी। थेतबासेलमा थेनीगदेसे थेला आबा आमादा ड्योइसी, 19 “चु एनीगदेलान झा हिनना? तिग चु न्हमान काना न्हबा हिनना? थेहड् भिसम दान्दे चा चुसे खाहड् लसी म्राड्जी?” भिसी ड्योइजी।

20 जमाहेन्से थेला आबा आमासे चुहड् भिसी भिजी, “हिनना, चु डन्नान झा हिनना, चु न्हमान काना मुबा। 21 तर चुला मी खाल्से खमना लसी म्राड्खम्जी भिबा ताम डन्दा था आरे। चु दिड छ्योसी जिन्बा म्हि हिनना, थेसे हाडला बारेरी हाडसेन पाड्खम्ला। थेतबासेलमा हाडनीसे थेदान ड्योइगो।” 22 यहूदी

नेतागदेदेन छ्याम लोड्सी थेनीगदेसे थेहड् भिसी पाड्बा हिन्ना। तिग्दा भिसम जुन म्हिसे येशूदा थार्बा पिन्बा ख्रीष्ट हिन्ना भिसी विश्वास लला थेदा यहूदीगदे हुप तबा दिमग्याम ते:तो:ला भिसी यहूदीगदेसे डाच्छान सल्लाह लसी जिन्बा मुबा।²³ थेतबासेलमान थेला आबा आमासे “चु दिड छ्योसी जिन्बा म्हि हिन्ना, चुदान ड्योइगो” भिसी पाड्जी।

²⁴ जमाहेन्से थेनीगदेसे दो:सीनोन थे काना म्हिदा ड्योइसी, “एसे सत्य ताम पाड्सी परमेश्वरदा मानदेन जयजयकार लउ, थे येशू चा पापी हिन्ना भिसी डन्दा था मुला” भिसी भिजी।

²⁵ थे म्हिसे थेनीगदेदा “थे पापी हिन्ना कि आहिन भिबा ताम मी डादा था आरे। तर डाच्छा डा काना मुबा, दान्दे डाइ म्राड्मुला भिबा ताम जे डादा था मुला” भिसी भिजी।

²⁶ जमाहेन्से थेनीगदेसे थेदा “थे म्हिसे एदा तिग लजी? खाहड् लसी थे म्हिसे एला मी खम्ना लजी?” भिसी ड्योइजी।

²⁷ थेसे थेनीगदेदा “डाइ हाडनीदा दोलोन पाड्सी जिन्जी, तर हाडनीसे वास्तान आलनी दान्दे दो:सी तिग्दा ड्योइबा, तिग हाडनीएनोन थेला चेला दोबारी म्हाइबा हिन्ना?” भिसी जोहाब पिन्जी।

²⁸ थेनीगदेसे थेदा खिसी लबान चुहड् भिजी, “ए गा थेला चेला हिन्ना, डनी मी मोशाला चेला हिन्ना।²⁹ मोशादेन छ्याम परमेश्वरसे ताम लबा डन्दा था मुला, तर चु म्हि चा खानडग्याम खजी थे ताम डन्दाएनोन था आरे।”

³⁰ जमाहेन्से थेसे थेनीगदेदा चुहड् भिसी भिजी, “चु खाहड्बा उदेकला ताम! येशूसे डाला मी खम्ना लजी। तर हाडनीसे चा येशू खानडग्याम फेपखजी भिबा ताम डन्दा था आरे।³¹ परमेश्वरसे पापी म्हिला ताम आड्यानमुला, तर थेदा मान लबादेन थेसे म्हन्बा अन्छार गे लबा म्हिला जे ताम ड्यानमुला भिसी य्हाड जम्मादान

था मुला। ³² जम्बुलिड छ्यामाहेन्से दान्देधोना खालै म्हिसे न्हमान काना मुबा म्हिला मी खम्ना लजी भिबा ताम थेःबा आरे। ³³ चु येशू परमेश्वरग्याम फेपखबा आहिन्सम येशूसे चुहड्बा तिगै गे लबारी आखम्सेला मुबा।”

³⁴ थेनीगदेसे थेदा “ए पापरी न्हसी पापरीन छर्बा म्हिसे डन्दा लोपबारी म्हाड्बा?” भिसी भिजी। ओच्छे थेनीगदेसे थेदा यहूदीगदे हुप तबा दिमग्याम तेःजी।

परमेश्वरदा डोआसेबा म्हि काना हड्बान हिन्ना

³⁵ यहूदीगदेसे थे काना म्हिदा यहूदीगदे हुप तबा दिमग्याम तेःजी भिबा ताम येशूसे थेःजी। ओच्छे थेदेन छ्याम हुप तसी येशूसे “तिग एसे परमेश्वरसे पुडखबा म्हिदा विश्वास लला?” भिसी ड्योड्जी।

³⁶ थेसे येशूदा “प्रभु, डाइ थेदा विश्वास लबारी थे खाल हिन्ना?” भिसी भिमा,

³⁷ येशूसे थेदा “थे म्हि एसे म्राड्सी जिन्बा मुला, दान्दे थे म्हि एदेन छ्याम ताम लबान मुला” भिसी सुड्जी।

³⁸ चु ताम थेःसी थेसे येशूदा फ्या लबान, “प्रभु, डाइ विश्वास लला” भिसी जयजयकार लजी।

³⁹ ओच्छे येशूसे, “कानागदेसे म्राड्गै, ओच्छे डा काना आहिन भिसी भिबा म्हिगदेसे चा थाम्राड्गै भिसी निसाफ लबाला लागिरीन डा चु जम्बुलिडरी खबा हिन्ना” भिसी सुड्जी।

⁴⁰ चु ताम थेःसी थेरी मुबा कोइ कोइ फरिसीगदेसे येशूदा “तिग डनीएनोन काना हिन्ना?” भिसी भिजी।

⁴¹ जमाहेन्से येशूसे थेनीगदेदा “बरु एनीगदे कानान मुबा हिन्सम पापला दोष लगब आतसेला मुबा, तर एनीगदेसे “डन्से म्राड्मुला” भिसी भिबासे लमा एनीगदेदा सदन पापला दोष तला” भिसी सुड्जी।

10

येशू ज्यबा गोठालो

¹ येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, ग्युला गोठेरी प्रापग्याम आवाङ्ना अर्गुपट्टिग्याम वाङ्बा म्हि चा य्होदेन डाँका हिन्ना। ² तर ग्युगदेला गोठालो चा प्रापग्याम वाङ्मुला। ³ गोठे खुड्बा म्हिसे गोठालोदा प्राप ठोड्सी पिन्ना। जमाहेन्से गोठालोसे ग्युगदेदा मिन किन्सी किन्सी ड्योइला। जमाहेन्से ग्युगदेसे गोठालोला काइ थेःला, ओच्छे गोठालोसे ग्युगदेदा मड्ग्यार भोर्ला। ⁴ ह्वाडला जम्मान ग्युगदे मड्ग्यार तेःसी जिन्माहेन्से गोठालो डाच्छा डाच्छा भ्रला, ओच्छे ग्युगदे चा गोठालोला लिच्छा लिच्छा भ्रला। तिग्दा भिसम ग्युगदेसे ह्वाडला गोठालोला काइ डोसेला। ⁵ डोआसेबा म्हिसे ड्योइजी भिसम ग्युगदे थे म्हिदेन छ्याम आनि। बरु थे महिला काइ डोआसेबासे लमा थेनीगदे लोड्सी यार्ला।”

⁶ येशूसे थेनीगदेदा चु उखान सुड्जी। तर थेनीगदेसे उखानना अर्थ आघोनी।

सत्य प्राप

⁷ थेतबासेलमा दोःसीनोन येशूसे थेनीगदेदा चुहड् भिसी सुड्जी, “च्यागो, एनीगदेसे डाला ताम ड्यान्गो, ग्युगदे वाङ्बा प्राप डानोन हिन्ना। ⁸ डा भन्दा डाच्छा खबागदे चा जम्मान य्होदेन डाँका हिन्ना, तर ग्युगदेसे थेनीगदेला ताम आड्यान्नी। ⁹ प्राप चा डानोन हिन्ना, चुदे खालै म्हि डाग्याम न्हडरी वाङ्जी भिसम थे जोगब तला। थेनीगदे गोठे न्हडरी निबा मड्ग्यार थोन्बा लला, ओच्छे पिड पिडबा छे याङ्बा पाडरी चम्याङ्ला।

¹⁰ “य्हो मी य्हो लबारी, साइबारी ओच्छे नाश लबारी भिसी जे खमुला। तर डा मी थेनीगदेसे पूरान जुनी याङ्गै भिसी खबा हिन्ना। ¹¹ ज्यबा गोठालो चा डानोन हिन्ना। ह्वाडला ग्युगदेदा

जोगब लबाला लागिरी ज्यबा गोठालो चा सिबारीन तयार तमुला।
 12 तर जुन म्हि ग्यु छबारी जे थान्ना ओच्छे थे साँच्चिलान गोठालो
 आहिन ओच्छे ग्युगदेएनोन थेला आहिन भिसम थेहड्बा म्हि
 फार्बा खबा म्राड्माहेन्से ग्युगदेदा ख्लासी यार्ला। ओच्छे फार्बासे
 ग्युगदेदा व्हाला, जमाहेन्से ग्युगदे ससा बडबड तला। 13 थेसे
 ग्युगदेदा तिगै वास्ता आलना यार्ला। तिग्दा भिसम थे टाडगा
 किन्सी गे लबा म्हि जे हिन्ना।

14-15 “ज्यबा गोठालो चा डानोन हिन्ना। आबासे डादा, डाइ
 आबादा डोसेबा हड् लसी डाइ डाला ग्युगदेदा डोसेमुला, ओच्छे
 ग्युगदेसेनोन डादा डोसेमुला। थेतबासेलमा डाइ डाला ग्युगदेला
 लागिरी हाडला ज्याननोन पिन्ना।* 16 डाला अर्गु ग्युगदेएनोन
 मुला, थेनीगदे चा चु गोठेला आहिन। डाइ थेनीगदेदाएनोन भतोःबा
 मुला, थेनीगदेसे डाला काइ थेःसी बगाल गिकनोन तला। ओच्छे
 थेनीगदेला गोठालोएनोन गिकनोन तला।

17 “डाइ डाला प्राण पिन्बा चा दोःसी किन्बाला लागिरी हिन्ना।
 थेतबासेलमा डाला आबासे डादा माया लबा हिन्ना। 18 खालैसे
 डाग्याम डाला प्राण किन्बारी आखम, तर डाइ डालान सेमसे
 डाला प्राण पिन्ना। डादा डाला प्राण पिन्बा अधिकारएनोन मुला,
 दोःसी किन्बा अधिकारएनोन मुला। डाला आबासे डादा कुल्बा
 तामएनोन चुनोन हिन्ना।”

19 चु ताम थेःसी दोःसीनोन यहूदीगदे हाड हाड न्हडरी
 आढिक्नी। 20 ल्हानान म्हिगदेसे येशूला बारेरी, “चु म्हडसे
 स्याप्सी म्योबा मुला। एनीगदेसे तिग्दा चुला ताम ड्यानबा?”
 भिसी हाड हाड न्हडरी पाड्बान मुबा।

21 तर स्य्हान्दो म्हिगदेसे चा “म्हडसे स्याप्बा म्हिसे चुहड्बा
 ताम लबारी आखम! तिग म्हडसे स्याप्बा म्हिसेनोन काना महिला

* 10:14-15 मत्ती ११:२७; लूका १०:२२

मी खम्ना लबारी खम्ला?” भिसी पाङ्बान मुबा।

यहूदीगदेसे येशूदा विश्वास आलबा

22 यरूशलेम शहररी परमेश्वरला मन्दिर अर्पण लबा चाड खबा मुबा। थे धुइ चा सेखरी मुबा। 23 येशू परमेश्वरला मन्दिरला सोलोमन भिबा दलानरी भ्रबान मुबा। 24 यहूदीगदे येशूला क्युर्सीन पोप तसी, “हाडसे डन्दा खाइमाधोना अलमल तना लसी थान्बा? चुदे हाड थार्बा पिन्बा ख्रीष्टनोन हिन्सम डन्दा सिधान सुङ्गो” भिसी भिजी।

25 जमाहेन्से येशूसे थेनीगदेदा चुहङ् भिसी सुङ्गी, “डाइ डाच्छान पाङ्सी जिन्बा मुला, तर एनीगदेसे विश्वास आलनी। डाइ डाला आबाग्याम अधिकार याङ्सी लबा गेग्यामसेन डा खाल हिन्ना भिसी उन्ना। 26 तर एनीगदेसे डादा विश्वास आलनी, तिग्दा भिसम एनीगदे डाला ग्युगदे आहिन। 27 डाला ग्युगदेसे डाला काइ डोसेमुला, ओच्छे डाइएनोन थेनीगदेदा डोसेमुला। थेनीगदे डादेन छ्याम भ्रमुला। 28 थेनीगदे खाइमै नाश आत। तिग्दा भिसम डाइ थेनीगदेदा जुकजुकधोनाला जुनी पिन्ना। ओच्छे खालैसेन थेनीगदेदा डाग्याम ब्यन्सी भोर्बारी आखम। 29 चुगदे डादा पिन्बा डाला आबा चा जम्मान भन्दा घेन मुला। थेग्यामसे मी झन खालैसेन चुगदेदा ब्यन्सी भोर्बारी आखम। 30 आबादेन डा गिकनोन हिन्ना।”

31 चु ताम थे:सी यहूदी नेतागदेसे दो:सीनोन येशूदा तोबारी भिसी युडबा दुइजी। 32 तर येशूसे थेनीगदेदा “आबासे कुल्बा जम्मान ज्यबा गेगदे डाइ एनीगदेला ओन्छाडरी लबा मुला। थे गेगदे न्हडला खजिबा गेला लागिरी एनीगदेसे डादा युडबासे तोबारी म्हाइबा?” भिसी सुङ्गी।

33 जमाहेन्से यहूदी नेतागदेसे येशूदा “एसे ज्यबा गे लबासे लमा डन्से एदा युडबासे तोबारी म्हाइबा आहिन। तर एसे परमेश्वरला

बिरोध लसी ताम लबासे लमान डन्से एदा युडबासे तोबारी छ्याइबा हिन्ना। ए म्हि तसीनोन हाडसे हाडदान परमेश्वर सहोबा?” भिसी भिजी।*

34 येशूसे थेनीगदेदा चुहड् भिसी सुड्जी, “एनीगदेला हाडलान ठिमरी ‘एनीगदे ल हिन्ना’ भिसी परमेश्वरसे सुड्बा ताम भिबा आरे?”* 35 जुन म्हिगदे मुबा ग्लारी परमेश्वरला बचन खजी परमेश्वरसे थेनीगदेन ल हिन्ना भिसी पाड्मा परमेश्वरला बचन न्होड्बारी आखमनी भिसम, 36 परमेश्वर आबासेन धम्सी चु जम्बुलिडरी पुड्खबा म्हिसे ‘डा परमेश्वरला झा हिन्ना’ भिसी पाड्मा खाहड् लसी डाइ परमेश्वरला बिरोध लबा तला? 37 चुदे डाइ डाला आबाला गे लबा आरे भिसम डादा विश्वास लआतोः। 38 तर चुदे डाइ डाला आबाला गे लसीनोन डादा विश्वास आल भिसम चु गेगदेदा मी विश्वास लउ। जमाहेनसे एनीगदेसे परमेश्वर आबा डादेन छ्याम डा परमेश्वर आबादेन छ्याम मुला भिबा ताम पक्कान था याड्ला।” 39 चु ताम थेःसी थेनीगदेसे दोःसीनोन येशूदा चुड्बारी म्हाइजी। तर येशू थेनीगदेला याग्याम स्योर्जी।

40 येशू दोःसीनोन यर्दन स्योडला क्यामसड फेप्सी धन्छ्याजी। थे ग्लारी डाच्छा यूहन्नासे बप्टिसमा पिन्मुबा।* 41 ल्हानान म्हिगदे येशू मुबा ग्लारी खजी। ओच्छे थेनीगदेसे, “यूहन्नासे मी तिगै उदेकला गे आलनी, तर यूहन्नासे येशूला बारेरी जुन जुन ताम पाड्मुबा थे जम्मान ताम सत्य चीम” भिसी भिजी। 42 ओच्छे थेरी ल्हानान म्हिगदेसे येशूदा विश्वास लजी।

11

लाजरस सिबा

* 10:33 लेवी २४:१६ * 10:34 भजन ८२:६ * 10:40 यूह १:२८

1 बेथानिया भिबा नाम्सारी लाजरस भिबा म्हि गिक आखम्बा मुबा। थेनोन नाम्सारी मरियमदेन थेला नाना मार्थाएनोन चिमुबा।*
 2 चुनोन मरियमसे तिरेम येशूला स्यहापरी अत्तर फोर्सी हाडलान क्रासे फ्यामुबा। आखम्बा लाजरस चा चुनोन नाना आडाला आले मुबा।* 3 मार्थादेन मरियमसे येशूदा “प्रभु, हाडसे माया लबा म्हि आखम्बा मुला” भिसी समाचार पुड्जी।

4 चु समाचार थे:सी येशूसे “लाजरस आखम्बा मुला, तसैनोन थे आसि। तर चुहड् तबा चा परमेश्वरला मानदेन जयजयकार तबाला लागिरी हिन्ना, ओच्छे चुग्यामसेन म्हिगदेसे परमेश्वरला झादाएनोन मानदेन जयजयकार लला” भिसी सुड्जी। 5 येशूसे मार्था, मरियमदेन लाजरसदा ल्हानान माया लमुबा। 6 तसैनोन लाजरस आखम्बा मुला भिबा ताम थे:सी येशू अझ हाड धन्छ्याबा ग्लारीन न्हीरेधोना धन्छ्याजी।

7 जमाहेन्से येशूसे हाडला चेलागदेदा “लु, दाहेन्से यहाड दो:सीनोन यहूदिया अञ्चलरी निड” भिसी सुड्जी।

8 चेलागदेसे येशूदा “गुरु, ओने जे हाडदा थेरी यहूदीगदेसे युडबासे तोबारी म्हाइमुबा, तिग दो:सीनोन हाड थेरीन फेपबारी म्हाइबा?” भिसी भिजी।

9 येशूसे थेनीगदेदा चुहड् भिसी सुड्जी, “तिग धिन गिकरी च्युक न्ही घण्टा आत? धिनीरी भ्रबा महिला काड आठोक। तिग्दा भिसम थेसे जम्बुलिडरी धिनीग्याम यहाल याड्ला। 10 तर म्हुनड भ्रबा महिला काड ठोक्ला। तिग्दा भिसम म्हुनड थेदेन छ्याम यहाल आत।”

11 जमाहेन्से येशूसे थेनीगदेदा “यहाडला ह्यो लाजरस म्हेर्बा मुला। तर डा थेदा छिड्बारी थेरी नितो:ला” भिसी सुड्जी।

* 11:1 लूका १०:३८-३९ * 11:2 यूह १२:३

12 चेलागदेसे येशूदा “प्रभु, थे म्हेर्बा जे हिन्सम थे खम्ला” भिसी भिजी। 13 येशूसे सुड्बा चा लाजरस सिसी जिन्जी भिसी सुड्बा, तर थेनीगदेसे चा लाजरस म्हेर्बा जे चीम भिसी म्हन्बा मुबा।

14 थेतबासेलमा येशूसे थेनीगदेदा सिधान सुड्जी, “लाजरस सिसी जिन्बा मुला। 15 तर एनीगदेसे विश्वास लगै भिसी डा थेरी तुरुन्तन आनिबा हिन्ना। थेतबासेलमा डा ताड्बा मुला। दाहेन्से भ्रउ, य्हाड थे मुबा ग्लारी निड” भिसी सुड्जी। 16 जमाहेन्से येशूला चेला दिदुमसां भिबा थोमासे स्यूहान्दो चेलागदेदा “लु, य्हाडएनोन गुरुदेन छ्याम निड, सितोःसै गुरुदेन छ्यामनोन सिला” भिसी भिजी।

सिबाग्याम सोना लबादेन जुनी पिन्बा येशू

17 येशू बेथानिया भिबा नाम्सारी धोखमा लाजरसदा धुर्सा न्हडरी थान्बा ब्लिरे तसी जिन्बा मुबा। 18 बेथानिया नाम्सा यरूशलेम शहरग्याम कोस गिक ते थारेड मुबा। 19 मार्थादेन मरियमला आले सिबासे लमा ल्हानान यहूदीगदे मार्थादेन मरियमदा समझब लबारी खबा मुबा। 20 येशू फेपूखवान मुला भिबा ताम थेःसी मार्था येशूदा स्यापबारी निजी। तर मरियम चा दिमरीन चिजी।

21 जमाहेन्से मार्थासे येशूदा स्याप्सी चुहड् भिजी, “प्रभु, हाड मुबा हिन्सम डाला आले आसिसेला मुबा। 22 तर दान्देनोन हाडसे परमेश्वरदेन छ्याम जुन सहे ह्रीसैनोन परमेश्वरसे हाडदा पिन्ना भिबा ताम डादा था मुला।”

23 येशूसे मार्थादा “एला आले दोःसी सोला” भिसी सुड्जी।

24 मार्थासे येशूदा “चु जम्बुलिड नाश तबा धुइरी जम्मान म्हि सिबाग्याम सोमा थेएनोन सोला भिबा ताम डादा था मुला” भिसी भिजी।

25 येशूसे थेदा चुहड् भिसी सुड्जी, “सिबाग्याम सोना लबादेन जुनी पिन्बा डानोन हिन्ना। डादा विश्वास लबा म्हि सिसैनोन

† 11:16 “दिदुमस” भिबा चा जौल्या हिन्ना।

सोला। 26 ओच्छे डादेन छ्याम भ्रबादेन डादा विश्वास लबा म्हि खाइमै आसि। तिग एसे चु ताम विश्वास लखम्ला?” भिसी सुड्जी।

27 मार्थासे येशूदा “हिन्ना प्रभु, डाइ हाडदा विश्वास लला, हाड परमेश्वरला झा जम्बुलिडरी फेपखबा थार्बा पिन्बा ख्रीष्ट हिन्ना” भिसी भिजी।

28 चुहड् भिसी मार्था निजी, ओच्छे हाडला आडा मरियमदा सुटुकक ड्योइसी, “गुरु धोखजी, एदा गुरुसे ड्योइबान मुला” भिसी भिजी। 29 चु ताम थे:मैछ्याम मरियम तुरुन्तन येशू मुबा ग्लारी निजी। 30 थे धुइधोना येशू नाम्सारी धोखबा आरेमुबा। तर येशू मार्थासे स्यापबा ग्लारीन मुबा। 31 थेन्ना दिमरी थेन्दा समझब लबारी खबा यहूदीगदेसे मरियम योना योना लसी निबा म्राड्जी। थे आलेला धुर्सारी क्राबारी निबा हिन्ना भिसी म्हनसी थेनीगदे मरियमला लिच्छा लिच्छा निजी।

32 मरियम येशू मुबा ग्लारी धोमाहेन्से येशूदा फ्या लबान, “प्रभु, हाड चुरी मुबा हिन्सम डाला आले आसिसेला मुबा” भिसी भिजी। 33 मरियम ओच्छे थेदेन छ्याम खबा जम्मान यहूदीगदे क्राबा म्राड्सी येशूदा ल्हानान दुख ड्हम्जी।

34 जमाहेन्से येशूसे थेनीगदेदा “एनीगदेसे थेदा खानड थान्बा मुला?” भिसी ड्योइमा, थेनीगदेसे येशूदा “प्रभु, फेपखसी स्हीगो” भिसी भिजी।

35 थे धुइरी येशूएनोन क्राजी। 36 थेतबासेलमा यहूदीगदेसे “च्यागो, येशूसे थेदा गाते माया लमुबा” भिसी भिजी।

37 तर कोइ कोइ म्हिसे चा “तिग काना म्हिला मी खम्ना लबा चु म्हिसे थेदा खम्ना लबारी आखम्नी?” भिसी भिजी।

येशूसे लाजरसदा सिबाग्याम सोना लबा

38 जमाहेन्से येशू दो:सीनोन ल्हानान दुख ड्हम्सी धुर्सारी फेपजी। थे धुर्सा चा ऊ हड्बा मुबा। थे धुर्साला म्रापरी युडबा

थान्मुबा। ³⁹ येशूसे थेनीगदेदा “धुर्साला म्नापरी थान्बा युड्बा तेःगो” भिसी सुड्मा, सिबा म्हिला नाना मारुथासे येशूदा “प्रभु दान्देधोना मी थे थाड खसी जिन्तला। तिग्दा भिसम थे सिबा बल्लिरे तसी जिन्जी” भिसी भिजी।

⁴⁰ येशूसे थेदा “एसे विश्वास लजी भिसम परमेश्वरला घेन यहालदेन शक्ति म्नाड्वा भिसी डाइ एदा पाड्बा आहिन?” भिसी सुड्जी।

⁴¹ थेनीगदेसे युड्बा लेःमाहेन्से स्वर्गपट्टि स्हीसी येशूसे चुहड् भिसी सुड्जी, “आबा, हाडदा धन्यवाद मुला। तिग्दा भिसम हाडसे डाला बिन्ती ड्यानजी। ⁴² हाडसे डाला ताम सदन ड्यानमुला भिबा ताम डादा था मुला। तसैनोन डादा हाडसे चु जम्बुलिडरी पुइखबा हिन्ना भिबा ताम चुरी मुबा म्हिगदेसे विश्वास लबारी खमगै भिसीन डाइ हाडदा चु ताम पाड्बा हिन्ना।”

⁴³ चुहड् सुड्सी जिन्माहेन्से येशूसे घेन काइरी “लाजरस, ए मडग्यार खउ” भिसी क्रिड्जी। ⁴⁴ जमाहेन्से सिबा लाजरस रेःसी मडग्यार खजी। अझन थेला थोबोहेन्से काडधोना खीबा मुबा। येशूसे थेरी मुबा म्हिगदेदा “थेदा खीबा क्वान बलसी थेदा निपुड्गो” भिसी सुड्जी।

येशूदा साइबारी म्हाइबा

मत्ती २६:१-५; मर्कूस १४:१-२; लूका २२:१-२

⁴⁵ येशूसे लबा चुहड्बा उदेकला गे म्नाड्सी मरियमदा हुप तबारी खबा ल्हानान यहूदीगदेसे येशूदा विश्वास लजी। ⁴⁶ तर थेनीगदे न्हडला कोइ कोइ चा फरिसीगदे मुबा ग्लारी निसी येशूसे लबा गेला बाररी पाड्जी।

⁴⁷ जमाहेन्से परमेश्वरला मन्दिररी पूजा लबा मुल म्हिगदेदेन फरिसीगदेसे जम्मान भन्दा घेन यहूदी सभाला म्हिगदेदा ड्योइसी चुहड् भिसी भिजी, “चु म्हिसे ल्हानान उदेकला गेगदे लमुला।

दाहेन्से य्हाडसे तिग लइ? ⁴⁸ चु म्हिदा तिगै आलना ओहडुनोन ख्लाजी भिसम जम्मान म्हिगदेसे चुदा विश्वास लला। ओच्छे रोमी सिपाहीगदे खसी य्हाडला परमेश्वरला मन्दिरदेन य्हाडला य्हुल नाश लला।”

⁴⁹ कैयाफा भिबा म्हि परमेश्वरला मन्दिररी पूजा लबा थे दिडला मुल म्हि मुबा। थेसे थेनीगदेदा चुहड् भिसी भिजी, “एनीगदेदा तिगै ताम था आरे। ⁵⁰ जम्मान य्हुल्सा नाश तबा भन्दा बरु जम्मान महिला लागिरी म्हि गिक सिबान एनीगदेला लागिरी ज्यबा तला भिसी एनीगदेसे घोबा आरे।”

⁵¹ चु ताम थेसे हाडला सेमग्याम पाड्बा आहिन मुबा। तर थे परमेश्वरला मन्दिररी पूजा लबा थे दिडला मुल म्हि तबासे लमा यहूदी य्हुलला लागिरी येशू सिनोन तोःला भिसी परमेश्वरला ताम पाड्बा मुबा। ⁵² ओच्छे थेसे चु ताम यहूदी य्हुलला लागिरी जे पाड्बा आहिन मुबा। तर ससा बडबड तसी चिबा परमेश्वरला जम्मान म्हिगदेदाएनोन गिक सहोबाला लागिरी थेसे चु ताम पाड्बा मुबा। ⁵³ थेतबासेलमा थे धिनहेन्से यहूदी नेतागदेसे येशूदा साइबारी सल्लाह लजी।

⁵⁴ जमाहेन्से यहूदीगदेला डाच्छा येशू दोःसी डाच्छाला हड् लसी आभनी। तर थे ग्लाग्याम तोडतोडबा ग्लाला डामरी मुबा एफ्राइम भिबा शहररी फेप्सी थेरीन चेलागदेदेन छ्याम धन्छ्याजी।

⁵⁵ यहूदीगदे मिश्र य्हुल्साग्याम फेसी खबा धिनदा ढन्सी धड्बा चाड खबारी छ्याइमुबा। थेतबासेलमा चाड खबा भन्दा डाच्छान हाड हाडदा चोखो सहोबाला लागिरी नाम्सा नाम्साग्याम ल्हानान म्हिगदे यरूशलेम शहररी निजी। ⁵⁶ थेनीगदेसे येशूदा जम्मान ग्लारी म्हाइजी, ओच्छे थेनीगदे जम्मान परमेश्वरला मन्दिररी हुप तबा धुइरी “एनीगदेदा खाहड्बा छोर्बा मुला, तिग थे चु चाडरी खला?” भिसी हाड हाड न्हडरी ताम लजी। ⁵⁷ परमेश्वरला मन्दिररी पूजा

लबा मुल म्हिगदेदेन फरिसीगदेसे चा येशूदा चुड्बाला लागिरी थे जुन ग्लारी मुसै था याड्बा म्हिसे “डन्दा पाड्गो” भिसी कुल्बा मुबा।

12

येशूदा अत्तर फोर्बा

मत्ती २६:६-१३; मर्कूस १४:३-९

1 मिश्र यूहल्साग्याम फेबा धिनदा ढन्सी धड्बा चाड खबा भन्दा ढुरे डाच्छा येशू लाजरसदा सिबाग्याम सोना लबा बेथानिया भिबा नाम्सारी धोखजी। 2 येशूला लागिरी थेनीगदेसे जमाकुनु ड्यसे थेरीन सोल सहोजी। मार्थासे चा जम्मादान क्योड्बान मुबा। येशूदेन छ्यामनोन चिबागदे न्हडरी गिक चा लाजरस मुबा। 3 थेनोन धुइरी मरियमसे जटामसी भिबा दोडला टाग्याम सहोबा महँगो खाल्ला ज्यबा बास्ना खबा अत्तर लिटर गडसल ते भसी येशूला स्यहापरी फोर्सी हाडलान क्रासे येशूला स्यहाप फ्याजी। ओच्छे दिम नाडनोन थे अत्तरला बास्ना खजी।* 4 तर येशूदा चुड्सी पिन्बारी म्हाडबा चेला यहूदा इस्करियोतसे चुहड् भिसी भिजी, 5 “चु अत्तर मी ग्यार्जा सोम म्हुइला डबलरी† चूड्सी थे टाडगा प्राडबोगदेदा पिन्सै तसेला।” 6 तर थेसे प्राडबोगदेदा वास्ता लसी चु ताम पाड्बा आहिन मुबा। तिग्दा भिसम थे यहो मुबा, ओच्छे टाडगाएनोन थेदेन छ्यामनोन थान्सी थेसेन यहो लमुबा।

7 येशूसे चुहड् भिसी सुड्जी, “थेदा तिगै थापाड्गो, डादा ल्हुबा धिनना लागिरी चुसे चुहड् लबा हिन्ना। 8 तिग्दा भिसम प्राडबो म्हिगदे मी एनीगदेदेन छ्याम सदन तला, तर डा चा एनीगदेदेन छ्याम सदन आत।”*

* 12:3 लूका ७:३७-३८ † 12:5 “ग्यार्जा सोम म्हुइला डबल” चा तिदिडला ज्याला मुबा। * 12:8 वयव १५:११

लाजरसदा साइबारी सल्लाह लबा

9 येशू बेथानिया भिबा नाम्सारी मुला भिबा था याड्सी ल्हानान यहूदीगदे थेरी खजी, थेनीगदे येशूदा च्याबारी जे खबा आहिन मुबा। तर येशूसे सिबाग्याम सोना लबा लाजरसदाएनोन च्याबारी खबा मुबा। 10 थेतबासेलमा परमेश्वरला मन्दिररी पूजा लबा मुल म्हिगदेसे लाजरसदाएनोन साइबारी सल्लाह लजी। 11 तिग्दा भिसम लाजरसदा सिबाग्याम सोना लबासे लमा ल्हानान यहूदीगदेसे थेनीगदेदा ख्लासी येशूदा विश्वास लबान मुबा।

येशू यरूशलेमरी फेप्बा

मत्ती २१:१-११; मर्कूस ११:१-११; लूका १९:२८-४०

12 न्हडगरदडसे मिश्र यहुल्साग्याम फेबा धिनदा ढन्सी धड्बा चाडरी खबा ल्हानान म्हिगदेसे येशू यरूशलेमरी फेप्खबान मुला भिबा ताम थे:जी। 13 जमाहेन्से खजूरला हांगागदे क्युडसी थोबान म्हिगदेसे

“थेला जयजयकार तगै,
परमप्रभुला मिनरी फेप्खबासे परमेश्वरग्याम मोलम याड्गै
इस्नाएलला ग्लेदा† परमेश्वरसे मोलम पिनगै”
भिसी क्रिड्बान येशूदा मान लबारी खजी।*

14 येशूसे गधाला कोला गिक स्यापजी ओच्छे थेनोन गधाला कोलाथोरी क्रे:सी फेप्खजी। परमेश्वरला बचनरीनोन चुहड् लसी भिबा मुला,*

15 “सियोनना† म्हिगदे, एनीगदे थालोड्गो।
च्यागो, एनीगदेला ग्ले गधाला कोलाथोरी क्रे:सी फेप्खबान
मुला।”*

† 12:13 “इस्नाएलला ग्ले” भिबा चा थार्बा पिनबा खीष्ट भिबा हिन्ना। * 12:13

भजन ११८:२५-२६ * 12:14 मत्ती २१:१-११; मर्कू ११:१-११; लूका १९:२८-४०

† 12:15 “सियोन” भिबा चा यरूशलेम शहरदा पाड्बा हिन्ना। * 12:15 जक ९:९

16 डाच्छा मी चु ताम येशूला चेलागदेसेनोन आघोनी। तर येशू सिबाग्याम सोसी स्वर्गरी घेन य्हालदेन शक्तिरी फेपमाहेन्से जे थेनीगदेसे येशूला बारेरी भिबा जम्मान ताम घोजी।

17 येशूसे धुर्सारी थान्बा लाजरसदा ड्योइसी सिबाग्याम सोना लबा धुइरी येशूदेन छ्यामनोन मुबा म्हिगदेसे येशूसे लबा गेला बारेरी पाइसी भ्रजी। 18 येशूसे चुह्इबा उदेकला गे लबा मुबा भिबा ताम थेःबासे लमाएनोन म्हिगदे येशूदा हुप तबारी निबा मुबा। 19 थेतबासेलमा फरिसीगदे हाड हाड न्हडरी “खाइ, य्हाडसे तिग लखम्जी। च्यागो, जम्बुलिडला जम्मान म्हिगदे थेदेन छ्याम भ्रबारी छ्याइजी” भिसी भिजी।

ग्रीक य्हलला म्हिगदेसे येशूदा म्हाइबा

20 कोइ कोइ ग्रीस य्हुल्साला म्हिगदे[†] मिश्र य्हुल्साग्याम फेबा धिनदा ढन्सी धड्बा चाडरी पूजा लबाला लागिरी यरूशलेम शहररी खबा मुबा। 21 थेनीगदे गालील अञ्चलला बेथसेदा भिबा नामसारी चिबा फिलिप मुबा ग्लारी निसी, “डनी येशूदेन छ्याम हुप तबा सेम मुला” भिसी बिनती लजी। 22 जमाहेन्से फिलिप निसी अन्द्रियासदा चु ताम पाइजी, ओच्छे थेनीनोन निसी येशूदा पाइजी।

23 येशूसे थेनीगदेदा चुह्इ भिसी सुइजी, “दाहेन्से परमेश्वरसे पुइखबा म्हिदा मान लबा धुइ खसी जिन्बा मुला। 24 च्यागो, एनीगदेसे डाला ताम ड्यान्गो, बु वारीरी ढवबा ग्वाला ब्लु आसिनी भिसम थे गिक जेन तला। तर थे सिजी भिसम फुइसी थेरी ल्हानान ग्वा रोला। 25 थेतबासेलमा जुन म्हिसे हाडला ज्यान जोगब लबा सेम लला थे म्हिसे जुकजुकधोनाला जुनी आयाइ। तर जुन म्हिसे जम्बुलिडरी मुमा हाडला ज्यानना वास्ता आलना डादेन छ्याम भ्रला, थेसे जुकजुकधोनाला जुनी सदन जोगब लसी

† 12:20 चु म्हिगदे चा यहूदीगदेसे हड्नोन परमेश्वरदा तेन्बा म्हि मुबा।

थान्ना।* 26 खालै म्हिसे डाला लागिरी गे लबा सेम लजी भिसम थे डादेन छ्याम भ्रतोःला। ओच्छे डा जुन ग्लारी चिला, डाला गे लबा म्हिएनोन डादेन छ्यामनोन तला। खालै म्हिसे डाला लागिरी गे लजी भिसम डाला आबासे थेला मान बढब लसी पिन्ना।

येशूसे ह्वाड सिबाला बारेरी सुड्बा

27 येशूसे चुहड् भिसी सुड्जी, “दान्दे डादा सेमरी ल्हानान दुख तबा मुला, डाइ तिग पाड्से? ‘आबा डादा चु दुखग्याम जोगब लउ’ भिसी पाड्बारी तला? आत, तिग्दा भिसम डा चु दुख नाबाला लागिरीन खबा हिन्ना। 28 आबा, ह्वाड जम्मान भन्दा घेन परमेश्वर हिन्ना भिबा ताम उन्गो।”

जमाहेनसे स्वर्गग्याम “डाइ डा जम्मान भन्दा घेन परमेश्वर हिन्ना भिबा ताम उन्सी जिन्बा मुला, चु ताम डाइ अझ उन्ना” भिबा काइ खजी।

29 चु ताम थेःसी थेरी मुबा म्हिगदेसे “चु मु गुर्बा हिन्ना” भिसी भिजी। तर स्यूहान्दोगदेसे चा “स्वर्गदूत थेदेन छ्याम ताम लबा हिन्ना” भिसी भिजी।

30 येशूसे थेनीगदेदा चुहड् भिसी सुड्जी, “स्वर्गग्याम खबा चु काइ डाला लागिरी आहिन, तर एनीगदेला लागिरी हिन्ना। 31 दाहेनसे चु धुइ चा जम्बुलिडरी मुबा म्हिगदेला निसाफ लबा धुइ हिन्ना, ओच्छे चु जम्बुलिडदा तहरी थान्बादां मडग्यार भ्याड्ला। 32 ओच्छे डादा जम्बुलिडग्याम तोर थीमाहेनसे जम्मान म्हिदा डाइ डा मुबा ग्लारी भला।” 33 येशूसे ह्वाड खाहड् लसी सिबान मुला भिबा ताम म्हिगदेसे घोगै भिसी चुहड् सुड्बा मुबा।

34 जमाहेनसे म्हिगदेसे येशूदा “थार्बा पिन्बा खीष्ट सदन सोला भिबा ताम डन्से ठिमग्याम थेःबा मुला। ह्वाडसे चा तिग्दा

* 12:25 मत्ती १०:३९; १६:२५; मर्कू ८:३५; लूका ९:२४; १७:३३ † 12:31 “जम्बुलिडदा तहरी थान्बा” चा शैतान हिन्ना। यूह १४:३०, १६:११ सहीगो।

‘परमेश्वरसे पुइखबा म्हिदा तोर थीनोन तोःला’† भिसी सुड्बा? परमेश्वरसे पुइखबा चु म्हि चा खाल हिन्ना?” भिसी ड्योइजी।*

35 येशूसे थेनीगदेदा चुहड् भिसी सुड्जी, “अझ छिन्नड य्हाल एनीगदेदेन छ्याम तला। थेतबासेलमा य्हाल एनीगदेदेन छ्याम मुबा धुइरीन हाड भ्रतोःबा ग्यामरी भ्रउ। आहिन्सम एनीगदेदा धोपधोपसे घप्ला, धोपधोपरी भ्रबा म्हिदा हाड खानड निबान मुला भिबा तामनोन था आत। 36 य्हाल एनीगदेदेन छ्याम मुबा धुइरी एनीगदेसे थेदा विश्वास लउ। थेहड् लजी भिसम एनीगदे य्हालला सन्तान दोला।” चु ताम सुड्सी जिन्माहेन्से येशू थे ग्याम फेप्सी थेनीगदेसे आम्राड्बा ग्लारी धन्छ्याजी।

यहूदीगदेसे येशूदा विश्वास आलबा

37 येशूसे यहूदीगदेलान ओन्छाडरी ल्हानान उदेकला गेगदे लबा मुबा। तसैनोन थेनीगदेसे येशूदा विश्वास आलनी। 38 यशैया अगमवक्तासे पाड्बा ताम पूरा तबारीन चुहड् तबा हिन्ना। यशैया अगमवक्तासे

“परमप्रभु, डन्से पाड्बा ताम खाल्से विश्वास लजी? ओच्छे हाडसे लबा शक्तिशाली गे खाल्से म्राड्जी?”

भिसी पाड्बा मुबा।*

39 थेनीगदेसे विश्वास लआखमनी, तिग्दा भिसम यशैया अगमवक्तासे दोःसी चुहड् भिसी पाड्बा मुला,

40 “प्रभुसे थेनीगदेला मी बन्द लसी पिन्बा मुला

ओच्छे थेनीगदेला सेम कोड्ना लबा मुला।

आहिन्सम थेनीगदेसे म्राड्सेला मुबा,

सेमहेन्सेन घोसेला मुबा,

† 12:34 येशूसे ‘परमेश्वरसे पुइखबा म्हिदा तोर थीनोन तोःला’ भिबा चा हाडदा कुसरी टाँगब लसी साइला भिसी सुड्बा हिन्ना। * 12:34 भजन ११०:४; यशै ९:७; इज

३७:२५; दानि ७:१४ * 12:38 यशै ५३:१

डापट्टि दोःसेला मुबा,

ओच्छे थेनीगदेदा डाइ खम्ना लसेला मुबा।”*

41 यशैया अगमवक्तासे येशूला घेन शक्ति म्राड्सी येशूला बारेरीन चु ताम पाड्बा मुबा।

42 तसैनोन ल्हानान यहूदी नेतागदेसे येशूदा विश्वास लजी। तर फरिसीगदेसे यहूदीगदे हुप तबा दिमरी वाड्बारी आपिन भिसी लोड्सी थेनीगदेसे चु ताम खालैदान आपाड्नी। 43 तिग्दा भिसम थेनीगदेसे परमेश्वरसे भन्दा म्हिगदेसे ज्यबा भिगै भिसी म्हन्मुबा।

येशू जम्बुलिडदा सोना लबारी फेप्खबा

44 येशूसे घेन काइरी चुहड् भिसी सुड्जी, “डादा विश्वास लबा म्हिगदेसे डादा जे आहिन, तर डादा पुइखबादाएनोन विश्वास लला। 45 ओच्छे डादा म्राड्बा म्हिसे डादा पुइखबादाएनोन म्राड्ला। 46 डादा विश्वास लबा म्हिगदे धोपधोपरी भ्रआतोःगै भिसीन डा जम्बुलिडरी य्हाल दोसी खबा मुला।

47 “डाला ताम थेःसीनोन डाइ पाड्बा अन्छार आभ्रबा म्हिगदेला निसाफ आल। तिग्दा भिसम डा जम्बुलिडला म्हिगदेला निसाफ लबारी खबा आहिन। तर जम्बुलिडला म्हिगदेदा थार्ना लबारी खबा हिन्ना। 48 तर डादेन डाला तामदा विश्वास आलबा म्हिगदेला निसाफ लबारी न्यायाधीश गिक मुला। थे न्यायाधीश चा डाइ पाड्बा तामनोन हिन्ना। थेसेन चु जम्बुलिड नाश तबा धुइरी थेनीगदेला निसाफ लला। 49 तिग्दा भिसम चु ताम डाइ डाला सेमग्याम पाड्बा आहिन, तर डादा पुइखबा आबासे कुल्बा अन्छारनोन डाइ पाड्बा हिन्ना। 50 डादा पुइखबा आबासे कुल्बा ताम ड्यान्बा म्हिदा जुकजुकधोनाला

* 12:40 यशै ६:१०

जुनी पिन्ना भिबा ताम डादा था मुला। थेतबासेलमा आबासे जुन ताम पाड्पुड्ला थे ताम जे डाइ पाड्बा मुला।”

13

येशूसे हाडला चेलागदेला काड खुबा

¹ मिश्र यूहलसाग्याम फेसी खबा धिनदा ढन्सी धड्बा चाड खबा भन्दा डाच्छान चु जम्बुलिड ख्लासी आबा मुबा ग्लारी निबा धुइ तसी जिन्जी भिबा ताम येशूसे था याड्सी जिन्बा मुबा। येशूसे जम्बुलिडरी मुबा हाडला चेलागदेदा ल्हानान माया लमुबा, ओच्छे थेनीगदेदा लिच्छाधोनान माया लजी।

² येशू हाडला चेलागदेदेन छ्याम ड्यसेला सोल छ्योइबान मुबा। थेनोन धुइरी येशूदा चुड्सी पिन्बा सेम शैतानसे सिमोनना झा यहूदा इसकरियोतदा खना लसी जिन्बा मुबा। ³ परमेश्वरसे जम्मान अधिकार हाडदा पिन्बा मुला भिबा ताम येशूदा था मुबा। ओच्छे परमेश्वरग्यामनोन खसी दोःसी परमेश्वर मुबा ग्लारी निबान मुला भिबा तामएनोन येशूदा था मुबा ⁴ सोल छ्योइमाहेन्से येशू सहेड्जी, ओच्छे हाडसे नान्बा घ क्यार थान्सी क्रेप्सरी गम्सा खीजी। ⁵ जमाहेन्से येशूसे ताड गिकरी क्युइ युजी, ओच्छे हाडला चेलागदेला काड खुसी हाडसे खीबा गम्सासे थेनीगदेला काड फ्याजी।

⁶ येशूसे सिमोन पत्रुसला काड खुबारी छ्याइमा सिमोन पत्रुससे “प्रभु तिग हाडसे डाला काड खुबारी छ्याइबा?” भिसी भिजी।

⁷ येशूसे थेदा “डाइ तिग लबान मुला, थे ताम एसे दान्दे आघो। तर चु ताम एसे लिच्छा घोला” भिसी सुड्जी।

⁸ पत्रुससे येशूदा “हाडसे डाला काड खाइमै खुबारी आत” भिसी भिमा, येशूसे थेदा “डाइ एला काड आखुनी भिसम ए डाला म्हि आदो” भिसी सुड्जी।

9 जमाहेन्से सिमोन पत्रुससे येशूदा “थेहड् भिसम प्रभु, डाला काड जे आहिन, तर डाला यादेन थोबोएनोन खुसी पिन्गो” भिसी भिजी।

10 जमाहेन्से येशूसे थेदा “नुहाब लसी जिन्बा म्हिसे काड जे खुतोःला। एनीगदे न्हडरी म्हि गिक बाहेक स्य्हान्दो जम्मान चोखो तसी जिन्बा मुला” भिसी सुड्जी। 11 तिगदा भिसम हाडदा खाल्से चुड्सी पिन्बारी छ्याइबा मुला भिबा ताम येशूदा था मुबा। थेतबासेलमान येशूसे “एनीगदे न्हडला गिक चा चोखो तबा आरे” भिसी सुड्बा मुबा।

12 थेनीगदेला काड खुसी जिन्माहेन्से हाडला घ नान्सी येशू दोःसी धन्छ्याजी। जमाहेन्से येशूसे थेनीगदेदा चुहड् भिसी सुड्जी, “डाइ तिगदा एनीगदेला काड खुजी भिबा ताम एनीगदेसे घोजी?*” 13 एनीगदेसे डादा ‘गुरुदेन प्रभु’ भिसी पाड्बा ताम सत्य हिनना, तिगदा भिसम डा एनीगदेला गुरुदेन प्रभुन हिनना। 14 चुदे डा प्रभुदेन गुरु तसीनोन डाइ एनीगदेला काड खुजी भिसम एनीगदेसेनोन गिकसेम गिकला काड खुतोःला। 15 डाइ लबा हड्दोनोन एनीगदेसेनोन लगै भिसीन डाइ चुहड् लसी उन्बा हिनना। एनीगदेसेनोन चुहड्दोनोन लउ। 16 थेतबासेलमा च्यागो, एनीगदेसे डाला ताम ड्यानगो, मालिक भन्दा नोकर घेन आत ओच्छे समाचार पुड्बा म्हि भन्दा समाचार भोर्बा म्हिएनोन खाइमै घेन आत।* 17 चुदे एनीगदेसे चु ताम घोसी चुनोन अन्छार लजी भिसम एनीगदेसे परमेश्वरग्याम मोलम याड्ला।

येशूसे हाडदा धोका पिन्बा चेलाला बारेरी सुड्बा

मत्ती २६:२०-२५; मर्कूस १४:१७-२१; लूका २२:२१-२३

18 “चु ताम डाइ एनीगदे जम्मालान बारेरी पाड्बा आहिन, डाइ धम्बागदेदा डाइ ज्यना लसी डोसेमुला। तर ‘डादेन छ्यामनोन

* 13:12 लूका २२:२७ * 13:16 मत्ती १०:२४; लूका ६:४०; यूह १५:२०

गेड चबा म्हिसे डादा धोका पिन्ना' भिसी परमेश्वरला बचनरी पाड्बा ताम पूरा तबाला लागिरीन चुहड् तबा हिन्ना।* 19 चु ताम तमाहेन्सेनोन एनीगदेसे डादा “डा थेनोन हिन्ना” भिसी विश्वास लबारी खम्गै भिसीन डाइ चु ताम एनीगदेदा डाच्छान पाड्बा हिन्ना। 20 थेतबासेलमा च्यागो, एनीगदेसे डाला ताम ड्यान्गो, डाइ पुड्बा म्हिगदेदा मान लबा म्हिसे डादाएनोन मान लला, ओच्छे डादा मान लबा म्हिसे डादा पुड्खबादाएनोन मान लला।”*

21 चु ताम सुड्सी जिन्माहेन्से ल्हानान दुख इहम्सी येशूसे चेलागदेदा “च्यागो, एनीगदेसे डाला ताम ड्यान्गो, एनीगदे न्हडलान गिकसे डादा म्हिगदेला यारी जिम्मा पिन्ना” भिसी सुड्जी।

22 येशूसे चु ताम खाल्ला बारेरी सुड्बा हिन्ना भिबा आघोबासे लमा चेलागदेसे हाड हाड न्हडरी गिकसेम गिकला लीरी च्याबारी छ्याइजी। 23 येशूसे ल्हानान माया लबा चेला चा येशूला डामरीन चिबा मुबा। 24 जमाहेन्से सिमोन पत्रुससे थेदा “येशूसे चु ताम खाल्ला बारेरी सुड्बा हिन्ना? ड्योइगो” भिसी मीला चाल लजी।

25 थे येशूला डामरी चिबान येशूदा “प्रभु, थे म्हि खाल हिन्ना?” भिसी ड्योइजी।

26 येशूसे थेदा “डाइ जुन म्हिदा गेड तुइसी पिन्ना, थे म्हि थेनोन हिन्ना” भिसी सुड्जी। ओच्छे येशूसे टोगल गिक गेड तुइसी सिमोन इस्करियोतला झा यहूदा इस्करियोतदा पिन्जी। 27 थे गेड किन्माहेन्से यहूदा इस्करियोत न्हडरी शैतान वाड्जी। जमाहेन्से येशूसे थेदा “एसे तिग लबारी छ्याइबा मुला, थे योनान लउ” भिसी सुड्जी। 28 तर येशूसे थेदा तिग्दा थेहड् भिसी सुड्बा हिन्ना भिसी थेरी चबारी चिबागदे खालैसेन आघोनी। 29 थेनीगदेला टाडगा यहूदा इस्करियोतसे थान्बासे लमा कोइ कोइसे चा येशूसे थेदा चाडला

* 13:18 भजन ४१:९ * 13:20 मत्ती १०:४०; मर्कू ९:३७; लूका ९:४८; १०:१६

लागिरी तोःबा स्हेगदे ग्लुउ भिसी सुङ्जीनम भिसी म्हन्जी। ओच्छे कोइ कोइसे चा येशूसे थेदा प्राडबोगदेदा तिगै पिन्गो भिसी सुङ्जीनम भिसी म्हन्जी। ³⁰ येशूसे पिन्बा गेड चमाहेन्से यहूदा इस्करियोत तुरुन्तन मडग्यार निजी। थे धुइरी धोप तसी जिन्बा मुबा।

येशूसे कुल्बा छार ताम

³¹ यहूदा इस्करियोत मडग्यार निमाहेन्से येशूसे चुहड् भिसी सुङ्जी, “दाहेन्से परमेश्वरसे पुइखबा म्हिसे घेन मान याड्बा मुला, ओच्छे थेग्याम परमेश्वरसेनोन घेन मान याड्बा मुला। ³² चुदे परमेश्वरसे पुइखबा म्हिग्याम परमेश्वरसे घेन मान याड्जी भिसम परमेश्वरसेनोन हाडसे पुइखबादा घेन मान पिन्ना। ओच्छे परमेश्वरसे चु गे योनान लला।

³³ “कोलागदे, डा एनीगदेदेन छ्याम छिन्नड जे तला। एनीगदेसे डादा म्हाइला, तर दाहेन्से डाइ यहूदीगदेदा पाड्बा ताम एनीगदेदाएनोन पाड्ला, ‘डा जुन ग्लारी निबान मुला, थेरी एनीगदे खबारी आखम।”*

³⁴ “दाहेन्से डाइ एनीगदेदा छार ताम गिक कुल्ला, एनीगदेसे गिकसेम गिकदा माया लउ। डाइ एनीगदेदा माया लबा हड् लसी एनीगदेसेनोन गिकसेम गिकदा माया लउ।” ³⁵ चुदे एनीगदेसे गिकसेम गिकदा माया लजी भिसम एनीगदे डाला चेला हिन्बा चीम भिसी जम्मासेन डोसेला।”

पत्रुससे येशूदा डोसेबा आरे भिसी पाड्ला भिसी येशूसे सुड्बा मत्ती २६:३१-३५; मर्कूस १४:२७-३१; लूका २२:३१-३४

* 13:33 यूह ७:३४ * 13:34 यूह १५:१२, १७; १ यूह ३:२३; २ यूह ५

36 सिमोन पत्रुससे येशूदा “प्रभु, ह्याड खानड फेप्वारी छ्याइबा?” भिसी ड्योइमा, येशूसे थेदा “डा निबा ग्लारी ए दान्दे डादेन छ्याम भ्रबारी आखम, तर लिच्छा चा भ्रला” भिसी सुड्जी।

37 पत्रुससे येशूदा “प्रभु, तिग्दा डा दान्देन ह्याडेन छ्याम भ्रबारी आखम? ह्याडला लागिरी डा सिबारीनोन तयार मुला” भिसी भिजी।

38 जमाहेन्से येशूसे थेदा “तिग एसे डाला लागिरी ह्याडला ज्याननोन पिन्खम्ला? च्यागो, एसे डाला ताम ड्यानगो, नागा क्राबा भन्दा डाच्छान एसे डादा डोसेबान आरे भिसी सोमरेमधोना पाड्ला” भिसी सुड्जी।

14

येशूसे चेलागदेदा समझब लबा

1 येशूसे ह्याडला चेलागदेदा चुहड् भिसी सुड्जी, “एनीगदेसे दुख थाम्हन्गो। एनीगदेसे परमेश्वरदा विश्वास लबा मुला, ओच्छे डादाएनोन विश्वास लउ। 2 डाला आबाला दिमरी चिबा ग्ला ल्हानान मुला, ओच्छे डा एनीगदेला लागिरी ग्ला सहोबारी निबान मुला। चुदे ग्ला आरेबा हिन्सम डाइ एनीगदेदा चु ताम पाड्नोन आपाड्सेला मुबा। 3 एनीगदेला लागिरी ग्ला सहोसी जिन्माहेन्से डा दोःसी खला, ओच्छे एनीगदे डादेन छ्यामनोन चिबाला लागिरी एनीगदेदाएनोन डा मुबा ग्लारीन भोर्ला। 4 डा निबारी छ्याइबा ग्याम एनीगदेदा थानोन मुला।”

येशू सत्य, ग्याम ओच्छे जुनी हिन्ना

5 थोमासे येशूदा “प्रभु, ह्याड खानड फेप्वान मुला भिबा ताम मी डन्दा था आरे भिसम ह्याड फेप्व ग्याम मी झन डन्से खाहड् लसी था याड्से?” भिसी भिजी।

6 येशूसे चुहड् भिसी सुड्जी, “परमेश्वर मुबा ग्लारी भोर्बा ग्याम, सत्य ओच्छे जुनी डानोन हिन्ना। डाग्याम बाहेक खालैनोन

परमेश्वर आबा मुबा ग्लारी निबारी आखम। 7 एनीगदेसे डादा डोसेबा हिन्सम डाला आबादाएनोन डोसेसेला मुबा। तर दाहेन्से एनीगदेसे डाला आबादा डोसेला, ओच्छे एनीगदेसे थेदा म्राड्सी जिन्बा मुला।

8 फिलिपसे येशूदा “प्रभु, डन्दा परमेश्वर आबा उन्सी पिन्गो, चुदे लजी भिसम तला” भिसी भिजी।

9 येशूसे थेदा चुहड् भिसी सुड्जी, “फिलिप, चुदे धिनधोना डा एनीगदेदेन छ्याम चिजी, तसैनोन एसे डादा डोसेबा आरे? डादा म्राड्बा म्हिसे परमेश्वर आबादाएनोन म्राड्सी जिन्बा मुला। तर डादा म्राड्सीनोन तिग्दा एसे डन्दा परमेश्वर आबादा उन्सी पिन्गो भिसी भिबा? 10 डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम एदा विश्वास आरे? जुन ताम डाइ एनीगदेदा पाड्बा मुला थे ताम डाइ डाला सेमग्याम पाड्बा आहिन। तर डादेन छ्याम गिक तबा आबासे हाडला गे डाग्याम लबान मुला। 11 डा आबादेन छ्याम गिक तबा मुला ओच्छे आबा डादेन छ्याम गिक तबा मुला भिबा ताम विश्वास लउ। आहिन्सम डाइ लबा गेगदे च्यासीन विश्वास लउ।

12 “च्यागो, एनीगदेसे डाला ताम ड्यान्गो, डादा विश्वास लबागदेसे डाइ लबा हड्बान गे लबारी खम्ला, ओच्छे थे भन्दा घेन घेन गेगदेएनोन लबारी खम्ला। तिग्दा भिसम डा परमेश्वर आबा मुबा ग्लारी निबान मुला। 13 एनीगदेसे डादेन छ्याम जुन सहे हीसैनोन डाग्याम परमेश्वर आबाला मान तगै भिसी डाइ एनीगदेदा पिन्ना। 14 एनीगदेसे डाला मिनरी जुन सहे हीसै डाइ एनीगदेदा पिन्ना।

परमेश्वरला आत्मा पुइखला भिसी लबा कबुल

15 “चुदे एनीगदेसे डादा माया लबा मुसम डाइ कुल्बा ताम एनीगदेसे ड्यान्ना। 16 ओच्छे डाइ परमेश्वर आबादेन छ्याम

बिन्ती लला, डाला साटोरी परमेश्वर आबासे एनीगदेदा ह्यो लबा आत्मा पुइखला। थे सदन एनीगदेदेन छ्याम धन्छ्याला। 17 थे आत्मासे एनीगदेदा परमेश्वरला बारेरी सत्य ताम घोना लला। तर थेदा जम्बुलिडला म्हिगदेसे विश्वास आल, तिग्दा भिसम जम्बुलिडला म्हिगदेसे थेदा न्ह म्राड्ला न्ह डोसेला। तर एनीगदेसे मी थेदा डोसेला, तिग्दा भिसम थे एनीगदेदेन छ्यामनोन मुला ओच्छे थे एनीगदे न्हडरी धन्छ्याला।

18 “डाइ एनीगदेदा टुहुरा सहोसी आथान, डा दोःसी एनीगदे मुबा ग्लारी खला। 19 छिन्नड लिच्छा जम्बुलिडला म्हिगदेसे डादा खाइमै आम्राड्, तर एनीगदेसे मी डादा म्राड्ला। तिग्दा भिसम डा सोबासे लमा एनीगदेएनोन सोला। 20 थे धिन खमाहेन्से खाहड् लसी एनीगदे डादेन छ्याम गिक तसी चिबा मुला, डाएनोन एनीगदेदेन छ्याम गिक तसी चिबा मुला, ओच्छे डा परमेश्वर आबादेन छ्याम गिक तसी चिबा मुला भिबा ताम एनीगदेसे था याड्ला। 21 जुन म्हिसे डाइ कुल्बा ताम सेमरी थान्सी थे अन्छार भ्रला थेसे डादा माया लला। डादा माया लबा म्हिदा परमेश्वर आबासेनोन माया लला, डाइएनोन थेदा माया लला ओच्छे डा हाडनोन थे मुबा ग्लारी खला।”

22 यहूदा इस्करियोत चा आहिन, तर स्य्हान्दो यहूदासे येशूदा “प्रभु, हाड तिग्दा डनी मुबा ग्लारी चा फेपखला, तर जम्बुलिडला स्य्हान्दो म्हिगदे मुबा ग्लारी चा आफेपख भिसी सुड्बा?” भिसी भिमा, 23 येशूसे थेदा चुहड् भिसी सुड्जी, “चुदे खालैसे डादा माया लमुला भिसम थेसे डाइ कुल्बा तामएनोन ड्यानमुला। ओच्छे थेदा डाला आबासेनोन माया लला, थेहड् लसीन डादेन डाला आबा थे मुबा ग्लारी खसी थेदेन छ्यामनोन चिला। 24 तर डादा माया आलबा म्हिगदेसे डाइ कुल्बा तामएनोन आड्यानमुला। चु ताम डाइ एनीगदेदा डाला सेमग्याम पाड्बा आहिन, तर डादा पुइखबा

परमेश्वर आबासेन सुड्बा हिन्ना।

25 “डा एनीगदेदेन छ्याम मुबा धुइरीन चु ताम डाइ एनीगदेदा पाड्बा मुला। 26 डाला साटोरी आबासे एनीगदेदा ह्यो लबारी पुइखबा थैला आत्मासे एनीगदेदा जम्मान ताम लोप्ला ओच्छे डाइ पाड्बा जम्मान तामएनोन एनीगदेदा ढन्ना लला।

27 “डा एनीगदेदा शान्ति पिन्सी निबान मुला। एनीगदेदा पिन्बा शान्ति चा डाला ह्याडलान शान्ति हिन्ना। चु शान्ति चा जम्बुलिडला म्हिगदेसे पाड्बा ह्युड्बा शान्ति आहिन। थेतबासेलमा दुख थाम्हनगो ओच्छे थालोड्गो।

28 “ ‘डा चुग्याम निबान मुला, तसैनोन डा एनीगदे मुबा ग्लारी दोःसी खला’ भिसी डाइ पाड्बा ताम एनीगदेसे थैःबा मुला। एनीगदेसे डादा पक्कान माया लबा हिन्सम डा परमेश्वर आबा मुबा ग्लारी निबारी छ्याइबा मुला भिबा ताम थैःसी एनीगदे ताड्सेला मुबा। तिग्दा भिसम डा भन्दा मी परमेश्वर आबान घ्रेन हिन्ना। 29 चु ताम पूरा तमाहेन्से एनीगदेसे डादा विश्वास लगै भिसी चु ताम पूरा तबा भन्दा डाच्छान डाइ एनीगदेदा पाड्सी जिन्बा मुला। 30 दाहेन्से डाइ एनीगदेदा चु भन्दा ल्हाना ताम आपाड्। तिग्दा भिसम चु जम्बुलिडदा तहरी थान्बा चा खबान मुला। तसैनोन थैदेन छ्याम डादा तिगै लबा शक्ति आरे।* 31 तर डाइ परमेश्वर आबादा माया लमुला भिबा ताम जम्बुलिडला म्हिगदेसे था याड्गै भिसीन परमेश्वर आबासे कुल्बा अन्छारनोन डाइ लबान मुला। दाहेन्से भ्रउ, य्हाड चुग्याम निइ।

15

येशू चा अडगुरला दोड

* 14:30 यूह १२:३१

1 “साँचचिलान अडगुर दोड चा डानोन हिन्ना, ओच्छे डाला आबा चा दोडदा सयार लबा म्हि हिन्ना। 2 थेसे डादेन छ्याम मुबा तिगै आरोबा हाँगा चा थासी भ्याड्ला। तर रोबा हाँगागदेदा चा अझ ल्हाना रोगै भिसी जोगदे घ्याम्सी ज्यना लसी सयार लला। 3 थेहड्ड लसीन एनीगदेला विश्वास अझ लहेगै भिसी डाइ पाड्बा चु बचनगदेसेन एनीगदेला सेम ज्यना लसी जिन्बा मुला। 4 एनीगदे डादेन छ्याम गिक तसी चिउ, डाएनोन एनीगदेदेन छ्याम गिक तसी चिला। हाँगा दोडग्याम फेजी भिसम थे हाँगारी तिगै आरो। थेहड्ड लसीन एनीगदेएनोन डाग्याम फेसी चिजी भिसम एनीगदेसेनोन तिगै लबारी आखम।

5 “अडगुरला दोड डानोन हिन्ना, एनीगदे चा हाँगागदे हिन्ना। चुदे खालै म्हि डादेन छ्याम गिक तसी चिजी भिसम डाएनोन थेदेन छ्याम गिक तसी चिला, ओच्छे थे विश्वासरी ल्हेसी ल्हानान ज्यबा गेगदे लला। तर डाग्याम फेसी चिजी भिसम एनीगदेसे तिगै लबारी आखम। 6 डादेन छ्याम गिक तसी आचिबागदेदा चा थे हाँगागदेदा भ्याड्बा हड्ड लसी भ्याड्ला, ओच्छे थे खर्ला। थेहड्डबा हाँगागदेदा म्हिगदेसे हुप लसी मेरी भ्याड्ला, जमाहेन्से थे मेफ्रा दोला। 7 चुदे एनीगदे डादेन छ्याम गिक तजी भिसम ओच्छे डाला बचन एनीगदेला सेम न्हडरी थान्जी भिसम एनीगदेदा तोःबा सहे हीमा पिन्ना। 8 चुदे एनीगदेसे ल्हानान ज्यबा गेगदे लसी डाला चेला दोसी उन्जी भिसम डाला आबाला मानदेन जयजयकार तला।

9 “डादा आबासे माया लबा हड्ड लसी डाइएनोन एनीगदेदा डाच्छाहेन्सेन माया लबा मुला। थेतबासेलमा एनीगदेसे डाला माया थाम्लेःगो। 10 डाला आबासे कुल्बा ताम ड्यान्बासे लमा आबाला माया सदन डादेन छ्याम मुला। थेहड्ड लसीन एनीगदेसेनोन डाइ कुल्बा ताम ड्यान्जी भिसम डाला माया सदन एनीगदेदेन छ्याम तला। 11 डाला सेम ताड्बा हड्ड लसी एनीगदेला सेमएनोन पूरान

ताङ्खमगै भिसीन डाइ एनीगदेदा चु ताम पाङ्बा हिन्ना।

12 “डाइ एनीगदेदा माया लबा हङ् लसी एनीगदेसेनोन हाड हाड न्हडरी गिकसेम गिकदा माया लउ भिसी डाइ चु ताम कुल्बा मुला।* 13 होला लागिरी हाडला ज्याननोन पिन्बा भन्दा घेन माया अर्गु तिगैनोन आरे। 14 चुदे एनीगदेसे डाइ कुल्बा ताम इयान्जी भिसम एनीगदे डाला हो हिन्ना। 15 दाहेन्से डाइ एनीगदेदा नोकर भिसी आपाङ्, तिग्दा भिसम मालिकसे तिग लबान मुला भिसी नोकरदा था आत। तर डाइ एनीगदेदा हो भिसी पाङ्बा मुला, तिग्दा भिसम डाला आबासे डादा सुङ्बा जम्मान ताम डाइ एनीगदेदा पाङ्सी जिन्बा मुला। 16 एनीगदेसे डादा धम्बा आहिन, तर एनीगदे सदन ज्यबा म्हि दोसी ज्यबा गे लगै भिसीन डाइ एनीगदेदा धम्बा हिन्ना। थेहङ् लसी एनीगदेसे डाला मिन किन्सी परमेश्वर आबादेन छ्याम हीजी भिसम एनीगदेसे हीबा सहे परमेश्वर आबासे पिन्ना। 17 थेतबासेलमा डाइ कुल्बा अन्छार एनीगदेसे गिकसेम गिकदा माया लउ।

चेलागदेदा हेला लबा

18 “चुदे एनीगदेदा जम्बुलिडला म्हिगदेसे हेला लजी भिसम एनीगदेदा भन्दा डाच्छा डादा हेला लबा हिन्ना भिसी घोउ। 19 चुदे एनीगदे जम्बुलिडला म्हि हिन्बा हिन्सम थेनीगदेसे एनीगदेदा हाडला म्हि म्हन्सी माया लसेला मुबा। तर एनीगदे चु जम्बुलिडला म्हि आहिन। एनीगदेदा डाइ चु जम्बुलिडग्याम धम्बा हिन्ना। थेतबासेलमा एनीगदेदा जम्बुलिडला म्हिगदेसे हेला लबा हिन्ना। 20 ‘नोकर मालिक भन्दा घेन आत’ भिसी डाइ पाङ्बा ताम एनीगदेसे थाम्ले:गो। थेनीगदेसे डादा दुख पिन्जी भिसम एनीगदेदाएनोन दुख पिन्ना। थेहङ् लसीन थेनीगदेसे डाइ कुल्बा ताम इयान्जी भिसम एनीगदेसे पाङ्बा तामएनोन इयान्ना।*

* 15:12 यूह १३:३४; १५:१७; १ यूह ३:२३; २ यूह ५ ६:४०; यूह १३:१६

* 15:20 मत्ती १०:२४; लूका

21 एनीगदे डाला म्हि तबासे लमा थेनीगदेसे एनीगदेदा ल्हानान दुख पिन्ना। तिग्दा भिसम थेनीगदेसे डादा पुइखबा परमेश्वर आबादा डोसेबा आरे। 22 चुदे डा आखबादेन डाइ थेनीगदेदा आपाड्बा हिन्सम थेनीगदेदा पापला दोष आतसेला मुबा। तर दाहेन्से थेनीगदेसे हाडला पापला लागिरी तिगै निउ लबा ग्ला आरे। 23 डादा हेला लबा म्हिसे डाला आबादाएनोन हेला लला। 24 खालैसेन लबारी आखम्बा गेगदे डाइ थेनीगदेला गुडरी आलबा हिन्सम थेनीगदेदा पापला दोष आतसेला मुबा। तर डाइ लबा उदेकला गेगदे म्राड्सीनोन थेनीगदेसे डादेन डाला आबादा हेला लबा मुला। 25 तर थेनीगदेला हाडलान ठिमरी 'थेनीगदेसे डादा थेहड्नोन हेला लला' भिसी भिबा ताम पूरा तबाला लागिरीन चुहड् तबा हिन्ना।*

26 "डाइ आबाग्याम सत्यला आत्मा एनीगदेदा हो लबाला लागिरी पुइखला। थे खसी थेसेन डाला बारेरी पाड्ला। 27 ओच्छे एनीगदे चा डाच्छाहेन्सेन डादेन छ्याम चिबासे लमा एनीगदेसेनोन डाला बारेरी पाड्ला।

16

1 "एनीगदेला विश्वास म्हासी थानिगै भिसी डाइ एनीगदेदा जम्मान ताम पाड्बा हिन्ना। 2 एनीगदेदा थेनीगदेसे यहूदीगदे हुप तबा दिमग्याम तेःला। ओच्छे एनीगदेदा साइबा म्हिगदेसे 'डन्से परमेश्वरदा तेन्बा मुला' भिसी म्हन्बा धुइएनोन खबान मुला। 3 थेनीगदेसे एनीगदेदा थेहड् लला, तिग्दा भिसम थेनीगदेसे परमेश्वर आबादा डोसेबा आरे ओच्छे डादाएनोन डोसेबा आरे। 4 च्यागो, थे जम्मान ताम तबा धुइरी एनीगदेसे 'चु जम्मान तामला बारेरी डादा प्रभुसे डाच्छान सुड्सी जिन्बा मुबा' भिबा ताम ढन्गै भिसी डाइ एनीगदेदा चु ताम पाड्बान मुला। दान्देधोना डा

* 15:25 भजन ३५:१९; ६९:४

एनीगदेदेन छ्यामनोन मुबासे लमा चु ताम डाइ डाच्छा एनीगदेदा आपाङ्नी।

परमेश्वरला आत्मासे लबा गे

⁵ दाहेनसे डा डादा पुइखबा परमेश्वर आबा मुबा ग्लारी निबान मुला। तर एनीगदे खालैसेन डादा 'ह्लाड खानड फेपबा?' भिसी आङ्गुयोइ। ⁶ तसैनोन डाइ चु जम्मान ताम पाङ्बासे लमा एनीगदेदा सेमरी ल्हानान सुर्दा तबा मुला। ⁷ तसैनोन डाइ एनीगदेदा सत्य ताम पाङ्बा मुला, डा चुग्याम निबान एनीगदेदा ज्यबा हिन्ना। तिग्दा भिसम डा चुग्याम आनिनी भिसम एनीगदेदा ह्यो लबा आत्मा एनीगदे मुबा ग्लारी आफेपख। तर डा निजी भिसम डाइ थेदा एनीगदे मुबा ग्लारी पुइखला। ⁸ थे फेपखमाहेनसे थेसे जम्बुलिडला म्हिगदेदा परमेश्वरदा सेम निबा गेला बारेरीदेन परमेश्वरसे लबा निसाफला बारेरी, गल्ती गेला बारेरी ओच्छे पापला बारेरी उन्ना। ⁹ डादा विश्वास आलबान पाप हिन्ना भिसी थेसे थेनीगदेदा घोना लला। ¹⁰ थेसे परमेश्वरदा सेम निबा गे तिग हिन्ना भिसी घोना लला। तिग्दा भिसम डा परमेश्वर आबा मुबा ग्लारी निबान मुला, ओच्छे एनीगदेसे डादा दोःसी आम्राङ्। ¹¹ थेसे परमेश्वरसे लबा निसाफ भिबा तिग हिन्ना भिसीएनोन थेनीगदेदा घोना लला। तिग्दा भिसम चु जम्बुलिडदा तहरी थान्बादा परमेश्वरसे निसाफ लसी जिन्बा मुला।

¹² "डाइ एनीगदेदा पाङ्तोःबा ताम मी ल्हानान मुबा। तर एनीगदेसे दान्दे चु भन्दा ल्हाना घोबारी आखम। ¹³ तर थे सत्यला आत्मा फेपखमाहेनसे सत्य ताम तिग हिन्ना भिसी थेसेन एनीगदेदा घोना लला। थेसे ह्लाडला सेमग्याम एनीगदेदा तिगै ताम आसुङ्, थेसे जुन ताम थेःला थेनोन ताम जे एनीगदेदा सुङ्ला। ओच्छे थेसेन लिच्छा तसेला तामगदेएनोन एनीगदेदा घोना लला। ¹⁴ थेसे डाला मानदेन जयजयकार लला, तिग्दा भिसम थेसे डाइ पाङ्बा

ताम थेःसी एनीगदेदा पाड्ला। 15 परमेश्वर आबादेन छ्याम मुबा जम्मान सहे जम्मान डालान हिन्ना। थेतबासेलमा डाइ पाड्बा जम्मान ताम 'सत्यला आत्मासे थेःसी एनीगदेदा घोना लला' भिसी पाड्बा हिन्ना।”

सुर्दा म्लेःसी ताड्म्याड्ला

16 येशूसे हाड्ला चेलागदेदा “छिन्नड लिच्छा एनीगदेसे डादा आम्राड्, तर दोःसी तिगै धिन लिच्छा मी एनीगदेसे डादा म्राड्ला” भिसी सुड्जी।

17 चु ताम थेःसी येशूला कोइ कोइ चेलागदेसे “थेसे यहाड्दा ‘छिन्नड लिच्छा एनीगदेसे डादा आम्राड् दोःसी छिन्नड लिच्छा मी एनीगदेसे डादा म्राड्ला’ भिबादेन ‘तिग्दा भिसम डा आबा मुबा ग्लारी निबान मुला’ भिसी सुड्बाला अर्थ चा तिग हिन्ना?” भिसी हाड हाड न्हडरी ताम लजी। 18 ओच्छे थेनीगदेसे दोःसी, “थेसे ‘छिन्नड लिच्छा’ भिसी सुड्बा तिग हिन्ना? थेसे सुड्बा ताम यहाड्दा था आरे” भिसी भिजी।

19 थेनीगदेसे चु तामला बारेरी ड्योइबा सेम लबा मुला भिसी था याड्सी येशूसे थेनीगदेदा चुहड् भिसी सुड्जी, “डाइ एनीगदेदा ‘छिन्नड लिच्छा एनीगदेसे डादा आम्राड् भिबादेन छिन्नड लिच्छा मी एनीगदेसे डादा म्राड्ला’ भिसी पाड्बा तामला बारेरी एनीगदेसे हाड हाड न्हडरी ताम लबा आहिन? 20 थेतबासेलमा च्यागो, एनीगदेसे डाला ताम ड्यानगो, एनीगदे क्राबा क्रिड्बा लला, तर जम्बुलिडला म्हिगदे चा ताड्ला। एनीगदेदा दुखदेन सुर्दा तला, तसैनोन एनीगदेला सुर्दा म्हासी दोःसी ताड्म्याड्ला। 21 कोला न्हबा धुडरी म्रिडम्हेमेदा ल्हानान दुख तमुला। तर कोला न्हमाहेनसे थेसे थे जम्मान दुख म्लेःमुला। तिग्दा भिसम जम्बुलिडरी कोला गिक न्हजी भिसी थे ल्हानान ताड्मुला। 22 थेहड् लसीन एनीगदेदा दान्दे दुख तबा मुला। तर डा दोःसी

एनीगदेदा हुप तबारी खमा एनीगदे सेमरी ल्हानान ताङ्म्याङ्ला। ओच्छे एनीगदेला ताङ्बा खालैसेन म्हाना लबारी आखम। ²³ थे धुइरी एनीगदेसे डादेन छ्याम तिगै ताम आङ्योइ। च्यागो, डाला मिनरी एनीगदेसे जुन सहे ह्रीला थे सहे एनीगदेदा परमेश्वर आबासे पिन्ना। ²⁴ दान्देधोना मी एनीगदेसे डाला मिनरी तिगै ह्रीबा आरे। ह्रीगो एनीगदेदा पिन्ना, ओच्छे एनीगदे पूरान ताङ्म्याङ्ला।

येशूसे जम्बुलिडला जम्मान नइबा तामदा ढाबा

²⁵ “दान्दे चा डाइ एनीगदेदा चु ताम उखानग्याम पाङ्बा मुला, तर धुइ तमाहेन्से परमेश्वरला बारेरी पाङ्मा चा उखान आपाङ्ना डाइ एनीगदेदा प्रसूटन घोना लला। ²⁶ थे धुइरी एनीगदे हाङसेन डाला मिनरी ह्रीला। तर डाइ एनीगदेला लागिरी परमेश्वर आबादेन छ्याम ह्रीसी पिन्नातोः। ²⁷ तिग्दा भिसम परमेश्वर आबा हाङसेन एनीगदेदा माया लबा मुला। तिग्दा भिसम एनीगदेसे डादा माया लबा मुला, ओच्छे डा परमेश्वरग्याम खबा हिन्ना भिसीएनोन विश्वास लबा मुला। ²⁸ डा परमेश्वर आबाग्यामसेन चु जम्बुलिडरी खबा हिन्ना, दान्दे दोःसी डा चु जम्बुलिडदा ख्लासी परमेश्वर आबा मुबा ग्लारी निबान मुला।”

²⁹ जमाहेन्से चेलागदेसे येशूदा चुहङ् भिसी भिजी, “दान्दे चा भिसम हाङसे डन्दा उखान आसुङ्ना प्रसूटन घोना लजी। ³⁰ दाहेन्से हाङदा जम्मान ताम था मुला भिबा ताम डन्से था याङ्जी। दाहेन्से खालैसे हाङदा ड्योइतोःबा ताम तिगै आरे। थेतबासेलमा हाङ परमेश्वरग्याम फेपखबा हिन्ना भिसी डन्से विश्वास लजी।”

³¹ येशूसे थेनीगदेदा चुहङ् भिसी सुङ्जी, “तिग दान्दे मी एनीगदेसे डादा विश्वास लबा मुला? ³² च्यागो, चुहङ्बा धुइएनोन खबान मुला, एनीगदे ससा बडबड तसी डा गिकदा जे ख्लासी हाङ हाङला दिमरी निला, पाङ्गोन तोःमा चु धुइ खसी जिन्बा मुला। तसैनोन थे धुइरी डा गिक जे आत, तिग्दा भिसम डाला आबा सदन डादेन

छ्याम मुला। ³³ एनीगदे डादेन छ्याम गिक तसी शान्ति याड्सी चिबारी खमगै भिसीन डाइ एनीगदेदा चु जम्मान ताम पाड्बा हिन्ना। जम्बुलिडरी एनीगदेदा ल्हानान दुख तला, तर एनीगदेसे आँट लउ, तिग्दा भिसम डाइ जम्बुलिडला जम्मान नइबा तामदा ढासी जिन्बा मुला।”

17

येशूला प्रार्थना

¹ चु जम्मान ताम सुड्सी जिन्माहेन्से येशूसे स्वर्गपट्टि सहीसी चुहड् भिसी प्रार्थना लजी, “परमेश्वर आबा, दाहेन्से धुइ तसी जिन्बा मुला। हाड गाते घेन मुला भिसी उन्बाला लागिरी हाडसे हाडला झा गाते घेन मुला भिसी उन्गो। ² हाडसे थेदा पिन्बा जम्मान म्हिगदेदा थेसे जुकजुकधोनाला जुनी पिन्खमगै भिसी हाडसे थेदा जम्बुलिडला जम्मान म्हिगदेथोरी शासन लबा अधिकार पिन्बा मुला। ³ हाड गिक जेन सत्य परमेश्वर हिन्ना भिसी डोसेबादेन हाडसे पुइखबा येशू ख्रीष्टदा डोसेबान जुकजुकधोनाला जुनी याड्बा हिन्ना। ⁴ हाडसे डादा जिम्मा पिन्बा गे पूरा लसी डाइ जम्बुलिडरी हाडदा मान लबा मुला। ⁵ परमेश्वर आबा, जम्बुलिड सहोबा भन्दा डाच्छा डा हाडदेन छ्याम मुबा धुइरी गाते घेन मानदेन जयजयकार मुबा। दाहेन्से थेहड् लसीन डादा हाडदेन छ्याम घेन सहोउ।

हाडला चेलागदेला लागिरी येशूसे लबा प्रार्थना

⁶ “हाडसे जम्बुलिडग्याम डादा पिन्बा जम्मान म्हिगदेदा डाइ हाड खाल हिन्ना भिसी डोसेना लबा मुला। थेनीगदे हाडलान म्हि मुबा, ओच्छे हाडसे डादा पिन्जी। थेनीगदे हाडला बचन अनछार भ्रबा मुला। ⁷ हाडसे डादा पिन्बा जम्मान ताम हाडग्यामसेन खबा हिन्ना भिसी दान्दे थेनीगदेसे था याड्सी जिन्बा मुला। ⁸ तिग्दा

भिसम हाडसे डादा पिन्बा बचन डाइ थेनीगदेदा लोप्बा मुला, ओच्छे थेनीगदे थे अन्छार भ्रबान मुला। डा हाडग्याम खबा हिन्ना भिसी थेनीगदेसे घोबा मुला, ओच्छे डादा हाडसे पुइखबा हिन्ना भिसीएनोन थेनीगदेसे विश्वास लबा मुला।

9 “डाइ थेनीगदेलान लागिरी प्रार्थना लबान मुला, जम्बुलिडला म्हिगदेला लागिरी चा आहिन। तर हाडसे पिन्बा म्हिगदेलान लागिरी प्रार्थना लबान मुला, तिग्दा भिसम थेनीगदे हाडलान हिन्ना। 10 डादेन छ्याम मुबा जम्मान हाडला हिन्ना, हाडदेन छ्याम मुबा जम्मान डाला हिन्ना। ओच्छे थेनीगदेग्याम डाला मानदेन जयजयकार तबा मुला।

11 “दाहेन्से डा हाड मुबा ग्लारी खबान मुला। ल्हानान धिनधोना डा चु जम्बुलिडरी आचि, तर चुगदे मी चु जम्बुलिडरीन चिला। थेतबासेलमा डाला आबा परमप्रभु परमेश्वर, हाडदेन डा गिक तबा हड् लसी चुगदेएनोन गिक तबाला लागिरी हाडसे डादा पिन्बा हाडला मिनग्याम थेनीगदेदा जोगब लसी थान्गो। 12 डा थेनीगदेदेन छ्याम मुबा धुइरी हाडसे डादा पिन्बा हाडला मिनग्याम डाइ थेनीगदेदा जोगब लसी थान्जी। नाश ततोःबा म्हि बाहेक स्य्हान्दो खालैदान डाइ नाश तआपुड्नी। तिग्दा भिसम परमेश्वरला बचनरी भिबा ताम पूरा तबाला लागिरीन चुहड् तबा हिन्ना।*

13 “तर दाहेन्से डा हाड मुबा ग्लारी खबान मुला। डाग्याम याड्बा ताड्बा थेनीगदेसे पूरान याड्गै भिसीन डाइ चु ताम जम्बुलिडरी मुबा धुइरीन पाड्बा मुला। 14 डा हाडसेन थेनीगदेदा हाडला बचन लोप्जी। तर थेनीगदेदा चु जम्बुलिडला म्हिगदेसे हेला लजी। तिग्दा भिसम डा चु जम्बुलिडला आहिन्बा हड् थेनीगदेएनोन चु जम्बुलिडला आहिन। 15 थेनीगदेदा चु

* 17:12 भजन ४१:९; १०९:४-८

जम्बुलिङ्ग्याम भोग्गो भिसी डाइ प्रार्थना आल, तर थेनीगदेदा शैतानग्याम जोगब लसी थान्गो। 16 डा चु जम्बुलिङ्गला आहिनबा हङ् थेनीगदेएनोन चु जम्बुलिङ्गला आहिन। 17 थेनीगदेदा सत्य बचनग्याम हाडदा तेन्बा चोखो म्हि स्होउ। तिग्दा भिसम हाडला बचन सत्य मुला। 18 हाडसे डादा जम्बुलिङ्गरी पुइखबा हङ् लसी डाइएनोन थेनीगदेदा जम्बुलिङ्गरी पुइबा मुला। 19 थेनीगदेसे हाडसे हाडदान पूरान चोखो थान्गै भिसी डाइनोन थेनीगदेला लागिरी हाडसे हाडदान चोखो स्होबा मुला।

हाडदा विश्वास लबागदे जम्मान गिक तसी चिगै भिसी येशूसे लबा प्रार्थना

20 “डाइ चुगदेला लागिरी जे आहिन, तर चुगदेला ताम थेःसी डादा विश्वास लबा म्हिगदेला लागिरीनोन प्रार्थना लला। 21 थेनीगदे जम्मान गिक तसी चिबारी खमगै। परमेश्वर आबा, हाड डादेन छ्याम ओच्छे डा हाडदेन छ्याम गिक तबा हङ् लसी थेनीगदेएनोन य्हाडदेन छ्याम गिक तबारी खमगै। ओच्छे डादा हाडसे पुइखबा हिन्ना भिसी जम्बुलिङ्गला म्हिगदेसे विश्वास लबारी खमगै। 22 य्हाड गिक तबा हङ् लसी थेनीगदेएनोन गिक तसी चिबारी खमगै भिसी हाडसे डादा मान याड्बा म्हि स्होबा हङ् लसी डाइएनोन थेनीगदेदा मान याड्बा म्हि स्होबा मुला। 23 डा थेनीगदेदेन छ्याम ओच्छे हाड डादेन छ्याम गिक तबा हङ् लसी थेनीगदेएनोन पूरान गिक तबारी खमगै। ओच्छे डादा हाडसेन पुइखबा हिन्ना भिबादेन हाडसे डादा माया लबा हङ् लसी हाडसे थेनीगदेदाएनोन माया लमुला भिसी जम्बुलिङ्गला जम्मान म्हिगदेसे था याड्गै।

24 “परमेश्वर आबा, हाडसे जम्बुलिङ्ग स्होबा भन्दा डाच्छाहेन्सेन डादा माया लसी य्हालदेन शक्ति पिन्बा मुला।

चु ताम म्राड्बाला लागिरी हाडसे डादा पिन्बा जम्मान म्हिगदे डादेन छ्याम तगै भिबा डाला सेम मुला।

25 “ठीक निसाफ लबा परमेश्वर आबा, हाडदा जम्बुलिडला म्हिगदेसे डोसेबा आरे, तर डाइ हाडदा डोसेबा मुला। ओच्छे हाडसेन डादा पुइखबा हिन्ना भिसी डाला चेलागदेसे था याड्बा मुला। 26 हाडसे डादा लबा माया थेनीगदेदेन छ्याम तगै, ओच्छे डा थेनीगदेदेन छ्याम तबारी खमगै भिसी डाइ थेनीगदेदा हाड खाल हिन्ना भिसी डोसेना लबा मुला। अझ हाड खाल हिन्ना भिसी डाइ थेनीगदेदा सदन पाड्ला।”

18

येशूदा चुड्बा

मत्ती २६:४७-५६; मर्कूस १४:४३-५०; लूका २२:४७-५३

1 प्रार्थना लसी जिन्माहेन्से येशू हाडला चेलागदेदेन छ्याम किद्रोन भिबा खोल्साला क्याम्सडपट्टि मुबा बगैँचारी फेपूजी। 2 थे ग्ला येशूदा चुड्सी पिन्बा यहूदादानोन था मुबा। तिग्दा भिसम येशू हाडला चेलागदेदेन छ्याम थे ग्लारी ल्हानान हड्बा फेपूमुबा। 3 थे धुइरी फरिसीगदेदेन परमेश्वरला मन्दिररी पूजा लबा मुल म्हिगदेसे पुइखबा परमेश्वरला मन्दिर खुड्बा सिपाहीदेन रोमी सिपाहीगदेदा भसी यहूदा येशू मुबा ग्लारी धोखजी। थेनीगदे हतियार थोसी नाडसलदेन मेदड म्रासी खबा मुबा।

4 हाडदा तबारी छ्याइबा जम्मान ताम था याड्सी थेनीगदेला डाच्छापट्टि फेपूसी येशूसे थेनीगदेदा “एनीगदेसे खाल्दा म्हाइबा?” भिसी ड्योइजी। 5 जमाहेन्से थेनीगदेसे “नासरतला येशूदा म्हाइबा” भिसी भिमा, येशूसे थेनीगदेदा “डा थेनोन हिन्ना” भिसी सुड्जी। येशूदा चुड्सी पिन्बा यहूदाएनोन थेनीगदेदेन छ्यामनोन रापूसी चिबा मुबा। 6 येशूसे थेनीगदेदा “डा थेनोन हिन्ना” भिसी सुड्बा

थे:मैछ्याम थेनीगदे ग्यापपट्टि ले:मा जम्मान हिल्जी। ⁷ दो:सी येशूसे थेनीगदेदा “एनीगदेसे खाल्दा म्हाइबान मुला?” भिसी सुड्मा, थेनीगदेसे “नासरतला येशूदा म्हाइबा” भिसी भिजी। ⁸ येशूसे थेनीगदेदा “डा थेनोन हिनना भिसी डाइ एनीगदेदा दोलोन पाड्सी जिन्जी। थेतबासेलमा एनीगदेसे डादान म्हाइबा हिनसम चु म्हिगदेदा चा निपुड्गो” भिसी सुड्जी। ⁹ “हाडसे डादा पिन्बा म्हिगदे डाइ गिकनोन नाश तपुड्बा आरे” भिसी येशूसे डाच्छान सुड्बा ताम चुहड् लसी पूरा तजी।

¹⁰ सिमोन पत्रुससे हाडदेन छ्याम मुबा तरवार ते:सी परमेश्वरला मन्दिररी पूजा लबा मुल म्हिला नोकरदा ताम्मा दाहिनेपट्टिला नाब्यड च्वाट्टन थाजी। थेला मिन चा माल्खस मुबा।

¹¹ येशूसे पत्रुसदा “एला तरवार स्युबारी झाड्गो। तिग परमेश्वर आबासे नापुड्बा दुख डाइ थानागो?” भिसी सुड्जी।*

येशूदा हन्नास मुबा ग्लारी भोर्बा

¹² जमाहेन्से रोमी सिपाहीगदेदेन थेनीगदेला कपूतान ओच्छे यहूदीगदेसे पुड्बा परमेश्वरला मन्दिर खुड्बा सिपाहीगदेसे येशूदा चुड्सी खीजी। ¹³ ओच्छे डाच्छा थेनीगदेसे येशूदा कैयाफाला केन हन्नास मुबा ग्लारी भोर्जी। कैयाफा चा परमेश्वरला मन्दिररी पूजा लबा थे दिडला मुल म्हि मुबा। ¹⁴ चुनोन कैयाफासे “जम्मान म्हिगदेला लागिरी म्हि गिक सिबा चा ज्यबा हिनना” भिसी यहूदी नेतागदेदा सल्लाह पिन्बा मुबा।*

पत्रुससे येशूदा डोसेबा आरे भिसी लुसीला ताम पाड्बा

मत्ती २६:६९-७०; मर्कूस १४:६६-६८; लूका २२:५५-५७

¹⁵ सिमोन पत्रुसदेन स्य्हान्दो चेला गिक चा येशूदेन छ्याम छ्याम निजी। थे स्य्हान्दो चेलासे चा परमेश्वरला मन्दिररी पूजा

* 18:11 मत्ती २६:३९; मर्कू १४:३६; लूका २२:४२ * 18:14 यूह ११:४९-५०

लबा मुल म्हिदा ज्यना लसी डोसेमुबा। थेतबासेलमा थे येशूदेन छ्यामनोन परमेश्वरला मन्दिररी पूजा लबा मुल म्हिला दिमला खाडगारी निजी। 16 तर पत्रुस चा म्प्रापरीन राप्सी चिबा मुबा। थेतबासेलमा परमेश्वरला मन्दिररी पूजा लबा मुल म्हिदा डोसेबा थे स्यहानदो चेला मडग्यार निसी म्प्रापरी चिबा म्प्रिडम्हेमेदा पाड्सी पत्रुसदा न्हडरी भजी।

17 जमाहेन्से म्प्रापरी चिबा थे म्प्रिडम्हेमेसे पत्रुसदा “तिग एएनोन थे म्हिला चेला आहिन?” भिसी भिमा, पत्रुससे थेदा “डा आहिन” भिसी भिजी।

18 खड्बासे लमा थेरी नोकरगदेदेन पालेगदे मे दूसी चिबा मुबा। पत्रुसएनोन निसी थेनीगदेदेन छ्यामनोन मे दूबारी छ्याइजी।

परमेश्वरला मन्दिररी पूजा लबा मुल म्हिसे येशूदा ड्योइबा छार्बा लबा

मत्ती २६:५९-६६; मर्कूस १४:५५-६४; लूका २२:६६-७१

19 परमेश्वरला मन्दिररी पूजा लबा मुल म्हिसे येशूदा थेला चेलागदेदेन छ्याम थेसे लोप्बा तामला बारेरी ड्योइबा छार्बा लजी। 20 येशूसे थेदा चुहड् भिसी सुड्जी, “डाइ जम्मालान डाच्छा लोप्बा मुला। डाइ सदन यहूदीगदे हुप तबा दिमदेन परमेश्वरला मन्दिररी खबा जम्मान यहूदीगदेला डाच्छा लोप्बा मुला। डाइ खालैसे था आयाड्ना लसी तिगै ताम पाड्बा आरे। 21 डादा तिगदा ड्योइबा? डाइ लोप्बा ताम थे:बागदेदा ड्योइगो। डाइ तिग पाड्जी, तिग लोप्जी भिबा थेनीगदेदान था मुला।”

22 येशूसे चुहड् सुड्मा येशूला डामरी राप्सी चिबा परमेश्वरला मन्दिरला सिपाही गिकसे येशूदा तोबान, “परमेश्वरला मन्दिररी पूजा लबा मुल म्हिदेन छ्याम चुहड् लसी ताम लबारी तला?” भिसी भिजी।

23 येशूसे थेदा “डाइ पाङ्बा ताम ठीक आहिन्सम आहिन भिसी पाङ्गो। चुदे डाइ पाङ्बा ताम ठीक हिन्सम तिग्दा डादा तोबा?” भिसी सुङ्जी। 24 जमाहेन्से हन्नाससे येशूदा आब्लानान परमेश्वरला मन्दिररी पूजा लबा मुल म्हि कैयाफा मुबा ग्लारी पुङ्जी।

दोःसीनोन पत्रुससे येशूदा डोसेबा आरे भिसी लुसीला ताम पाङ्बा

मत्ती २६:७१-७५; मर्कूस १४:६९-७२; लूका २२:५८-६२

25 सिमोन पत्रुसएनोन राप्सी मे दूसी चिबा धुइरी थेरी मुबा म्हिगदेसे थेदा “एएनोन येशूलान चेला आहिन?” भिसी ड्योइमा, थेसे थेनीगदेदा “आहिन, डाइ थेदा डोसेबान आरे” भिसी लुसीला ताम पाङ्जी। 26 पत्रुससे नाब्यड थासी पिन्बा नोकरला हाडलान म्हिएनोन थेरी मे दूसी चिबा मुबा। थेएनोन परमेश्वरला मन्दिररी पूजा लबा मुल महिला नोकर मुबा। थेसे पत्रुसदा “डाइ एदा थे म्हिदेन छ्यामनोन बगैचारी म्हाङ्बा आहिन?” भिसी भिमा, 27 पत्रुससे दोःसीनोन आहिन, भिसी जोहाब पिन्जी। जोहाब पिन्मैछ्याम नागा क्राजी।

येशूदा पिलातस मुबा ग्लारी भोर्बा

मत्ती २७:१-२, ११-१४; मर्कूस १५:१-५; लूका २३:१-५

28 थेनीगदेसे येशूदा स्यहोरीन कैयाफाला दिमग्याम रोमी अञ्चलाधीशला दरबाररी भोर्जी। तर हाड अशुद्ध तसी मिश्र यहुल्साग्याम फेसी खबा धिनदा ढन्सी धङ्बा चाडरी तिगै चबा सहे चबारी आम्याङ् भिसी थेनीगदे चा लोङ्सी दरबार न्हडरी आवाङ्नी।† 29 थेतबासेलमा रोमी हाकिम पिलातस मङ्ग्यार खजी। ओचछे थेसे थेनीगदेदा “एनीगदेसे चु महिला तिग दोष

† 18:28 यहूदीगदेला ठिम अन्छार यहूदीगदे अर्गु यहूलला म्हिगदेला दिमरी वाङ्जी भिसम अशुद्ध तमुबा।

स्यापूजी?” भिसी ड्योइमा, ³⁰ थेनीगदेसे थेदा “चुदे चु महिला दोष आस्यापूबा हिन्सम डन्से चु म्हिदा हाड मुबा ग्लारी आभसेला” भिसी भिजी।

³¹ पिलातससे थेनीगदेदा “चु म्हिदा एनीगदेसेन भोगो, ओच्छे एनीगदेला हाडलान ठिम अन्छार चु महिला निसाफ लउ” भिसी भिजी।

जमाहेन्से यहूदीगदेसे थेदा “खालै म्हिदा साइबाला सजाय पिन्बा डन्ना लागिरी ठीक आरे” भिसी भिजी। ³² हाड खाहड लसी सितोःला भिसी येशूसेन सुड्बा ताम पूरा तबाला लागिरीन चुहड तबा मुबा।*

³³ दरबार न्हडरी निसी पिलातससे येशूदा ड्योइजी, ओच्छे थेसे येशूदा “तिग ए यहूदीगदेला ग्ले हिन्ना?” भिसी ड्योइजी।

³⁴ येशूसे पिलातसदा “चु ताम हाडसे हाडलान सेमग्याम सुड्बा हिन्ना कि स्य्हान्दो खालै म्हिसे हाडदा डाला बारेरी पाड्बासे लमा चु ताम ड्योइबा हिन्ना?” भिसी सुड्जी।

³⁵ पिलातससे येशूदा “तिग डा यहूदी हिन्ना? एलान यहूलला म्हिगदेदेन परमेश्वरला मन्दिररी पूजा लबा मुल म्हिगदेसे एदा चुरी भवा हिन्ना। एसे तिग लजी?” भिसी भिजी।

³⁶ येशूसे पिलातसदा “डाइ शासन लबा चु जम्बुलिडरी आहिन। चुदे डाइ चु जम्बुलिडरी शासन लबा हिन्सम डादा यहूदीगदेला याग्याम जोगब लबारी डाला म्हिगदे थेनीगदेदेन छ्याम छेसेला मुबा। तर डाइ शासन लबा चुरी आहिन” भिसी सुड्जी।

³⁷ पिलातससे येशूदा “थेहड् भिसम ए ग्लेनोन हिन्ना?” भिसी ड्योइमा, येशूसे पिलातसदा “डा ग्ले हिन्ना भिसी मी हाडसेन सुड्बा मुला। डा ग्ले दोबाला लागिरी न्हबा हिन्ना, ओच्छे चुनोन सत्य ताम घोना लबाला लागिरी डा चु जम्बुलिडरी खबा हिन्ना।

* 18:32 यूह ३:१४; १२:३२

थेतबासेलमा जुन म्हि सत्यला लिच्छा भ्रला थेसे डाला ताम ड्यानना” भिसी सुड्जी।

38 पिलातससे येशूदा “खाहड्बा सत्य ताम हिन्ना?” भिसी ड्योड्जी।

चु तामगदे ड्योड्मैछ्याम पिलातस मडग्यार यहूदीगदे मुबा ग्लारी निसी चुहड् भिसी भिजी, “डाइ चु म्हिला तिगै दोष आस्यापनी। 39 तर मिश्र यहूल्साग्याम फेसी खबा धिनदा ढन्सी धड्बा चाडला धुइरी डाइ एनीगदेला लागिरी म्हि गिकदा ख्लासी पिन्तो:मुबा। थेतबासेलमा डाइ चु यहूदीगदेला ग्लेदा ख्लासी पिन्गै भिसी एनीगदेसे म्हन्बा मुला?”

40 तर थेनीगदेसे “चु म्हिदा आहिन, तर बारब्बादा ख्लासी पिन्गो” भिसी क्रिड्बान भिजी। बारब्बासे चा आन्दोलन लसी म्हि साइबा मुबा।

19

येशूदा सिबाला सजाय पिन्बा

मत्ती २७:१५-३१; मर्कुस १५:६-२०; लूका २३:१३-२५

1 जमाहेन्से पिलातससे येशूदा भोर्सी कोर्से तोउ भिसी रोमी सिपाहीगदेदा कुल्जी। 2 कोर्से तोमाहेन्से सिपाहीगदेसे पुजुला फेटा सहोसी येशूदा थोइसी पिन्जी, ओच्छे ग्लेसे क्वान्बा हड्बान वाला वाला पिड्गै छोनना क्वानएनोन क्वान्सी पिन्जी। 3 ओच्छे येशूला डामरी खसी, “लास्सो यहूदीगदेला ग्ले, फ्याफुल्ला” भिसी येशूदा खिसी लबान ग्रम्बारी तोबारी छ्याइजी।

4 पिलातस दो:सी मडग्यार खसी थेरी मुबा म्हिगदेदा “च्यागो, डाइ चु म्हिदा सजाय पिन्बा तिगै दोष आस्यापनी। चु ताम एनीगदेदा था तगै भिसी डाइ थेदा मडग्यार भबा मुला” भिसी भिजी।

5 येशू पुजुला फेटादेन वाला वाला पिड्गै छोनना क्वान क्वान्सीन

मडग्यार फेपूखजी। जमाहेन्से पिलातससे थेनीगदेदा “लु, च्यागो, चु म्हिदा!” भिसी भिजी।

6 परमेश्वरला मन्दिररी पूजा लबा मुल म्हिगदेदेन सिपाहीगदेसे येशूदा म्राड्मैछ्याम “चुदा कुसरी टाँगब लसी साइगो, कुसरी साइगो!” भिसी क्रिड्बाला क्रिड्बान लजी। जमाहेन्से पिलातससे थेनीगदेदा “चु म्हिदा एनीगदेसेन भोर्सी कुसरी टाँगब लउ, तिग्दा भिसम चु म्हिदा सजाय पिन्तोःबा तिगै दोष डाइ आस्यापनी” भिसी भिजी।

7 यहूदीगदेसे थेदा “डन्ना ठिम गिक मुला थे ठिम अन्छार चुदा साइनोन तोःला। तिग्दा भिसम चुसे हाडसे हाडदान परमेश्वरला झा सहोबा मुला” भिसी भिजी।

8 चु ताम थेःसी पिलातस झन लोड्जी। 9 पिलातससे दोःसी दरबार न्हडरी वाड्सी येशूदा “ए खानडला हिन्ना?” भिसी ड्योइजी। तर येशूसे थेदा तिगै जोहाब आपिन्नी। 10 थेतबासेलमा पिलातससे येशूदा “तिग ए डादेन छ्याम ताम आपाड्? एदा ख्लासी पिन्बा अधिकार डादा मुला, ओच्छे एदा कुसरी टाँगब लसी साइबा अधिकारएनोन डादा मुला भिसी एदा था आरे?” भिसी भिजी।

11 येशूसे थेदा “चु अधिकार परमेश्वरसे आपिन्बा हिन्सम हाडसे डादा तिगै लबारी आखम्बसेला मुबा। थेतबासेलमा डादा हाडला जिम्मारी पिन्बा म्हिदा झन ल्हाना पापला दोष तला” भिसी सुड्जी।

12 चु ताम थेःसी पिलातससे झन येशूदा ख्लाबारी म्हाइजी। तर यहूदीगदेसे क्रिड्बान चुहड् भिसी भिजी, “चुदे हाडसे चु म्हिदा खलाजी भिसम हाड रोमी ग्याल्बो कैसरला म्हि आहिन। जुन म्हिसे हाडसे हाडदान ग्ले हिन्ना भिसी पाड्ला थे म्हिसे रोमी ग्याल्बो कैसरला बिरोध लबा हिन्ना।”

13 चु ताम थे:सी पिलातससे येशूदा मडग्यार भजी ओच्छे पिलातस युडबा तीबा खाडगारी निसाफ लबा ठिरी चिजी। थे युडबा तीबा खाडगादा हिब्रू ग्योइरी गबबथा भिसी भिमुला। 14 थे धुइरी ओस्पन धिनना बाह बजब तसी जिन्बा मुबा। थे धिन चा मिश्र यहुल्साग्याम फेसी खबा धिनदा ढन्सी धड्बा चाड धड्बारी तयार लबा धिन मुबा। पिलातससे यहूदीगदेदा “च्यागो, एनीगदेला ग्ले” भिसी भिजी।

15 तर थेनीगदेसे “चुदा क्रुसरी टांगब लसी साइबारी भोर्नोन तो:ला” भिसी क्रिड्बाला क्रिड्बान लजी।

जमाहेन्से पिलातससे थेनीगदेदा “थेहड् भिसम डाइ एनीगदेला ग्लेदा क्रुसरी टांगब लसी साइगो?” भिसी भिमा, परमेश्वरला मन्दिररी पूजा लबा मुल म्हिगदेसे “रोमी ग्याल्बो कैसर बाहेक डन्ना स्य्हान्दो खालै ग्ले आरे” भिसी भिजी।

16 थेतबासेलमा चु ताम थे:सी पिलातससे येशूदा क्रुसरी टांगब लसी साइगो भिसी थेनीगदेदा जिम्मा लसी पिन्जी। जमाहेन्से येशूला जिम्मा सिपाहीगदेसे किन्जी।

येशूदा क्रुसरी साइबा

मत्ती २७:३२-४४; मर्कुस १५:२१-३२; लूका २३:२६-४३

17 येशूसे हाडला क्रुस हाडसेन पुइसी, “खप्परला ग्ला” भिबा ग्लारी फेपजी, चु ग्लादा हिब्रू ग्योइरी गलगथा भिमुबा। 18 थेरी धोमाहेन्से थेनीगदेसे येशूदा क्रुसरी टांगब लजी, ओच्छे यहो न्हीदाएनोन गिकदा येशूला दाहिनेपट्टि गिकदा देब्रेपट्टि क्रुसरी टांगब लजी। येशूदा चा गुडरी थान्जी।

19 पिलातससे “नासरतला येशू, यहूदीगदेला ग्ले” भिसी भिबा ताम येशूला थोबो भन्दा फिरी क्रुसरी ठोक्पुड्जी। 20 चु ताम ल्हानान यहूदीगदेसे पढब लजी। तिग्दा भिसम येशूदा क्रुसरी टांगब

लसी साइबा ग्ला शहरला डामरीन मुबा। चु ताम हिब्रू, ल्याटिनदेन ग्रीक ग्योइरी भ्रिबा मुबा। ²¹ परमेश्वरला मन्दिररी पूजा लबा यहूदीगदेला मुल म्हिगदेसे पिलातसदा “यहूदीगदेला ग्ले’ भिसी आहिन, तर चुसे डा यहूदीगदेला ग्ले हिन्ना भिजी भिसी भ्रिउ” भिसी भिजी।

²² पिलातससे थेनीगदेदा “डाइ जुन ताम भ्रिसै, भ्रिसी जिन्जी, तजी” भिसी भिजी।

²³ येशूदा क्रुसरी टांगब लमाहेन्से सिपाहीगदेसे येशूला क्वान भो बलि लसी हाड हाड न्हडरी भो लजी। ओच्छे थेनीगदेसे येशूसे न्हडरी क्वान्बा क्वानएनोन किन्जी, तर थे क्वान चा आढुपना तोरहेन्से मारधोनान रासी सहोबा मुबा। ²⁴ थेतबासेलमा थेनीगदेसे “चु चा आढेगे, तर खाल्दा परब तबा चीम चिट्टा युसी च्यागे” भिसी हाड हाड न्हडरी ताम लजी। बचनरी भ्रिबा ताम पूरा तबाला लागिरीन चुहड् तबा मुबा। बचनरी

“थेनीगदेसे डाला क्वान हाड हाड न्हडरी भो लजी,
ओच्छे डाला क्वान किन्बाला लागिरी चा चिट्टा युजी”*

भिसी भ्रिबा मुबा।

थेतबासेलमा सिपाहीगदेसे चु गे लजी।*

²⁵ येशूला आमादेन येशूला आमाला आडा ओच्छे क्लोपासला म्रिड मरियमदेन मरियम मग्दलिनी येशूला क्रुसला डामरी राप्सी चिबा मुबा। ²⁶ येशूसे हाडला आमादेन हाडसे माया लबा चेला डामरी राप्सी चिबा म्राड्सी आमादा “आमा च्यागो, दाहेन्से चु हाडला झा हिन्ना” भिसी सुड्जी। ²⁷ ओच्छे येशूसे थे चेलादाएनोन “च्यागो, दाहेन्से थे एला आमा हिन्ना” भिसी सुड्जी। जमाकुनुहेन्से थे चेलासे येशूला आमा मरियमदा हाडला दिमरी भोर्जी।

* 19:24 भजन २२:१८ * 19:24 भजन २२:१८

येशू सिबा

मत्ती २७:४५-५६; मर्कूस १५:३३-४१; लूका २३:४४-४९

28 “दाहेन्से डाइ लतोःबा गे जिन्जी” भिसी येशूसे था याड्सी बचनरी भिबा जम्मान ताम पूरा तगै भिसी येशूसे “डादा क्युइ फुइजी” भिसी सुइजी।* 29 थेरी अडगुरला कम्बा निडगु मुबा ताड गिक मुबा। थेतबासेलमा सिपाहीगदेसे हिसप भिबा दोडला हाँगारी क्वानगेन खीसी थें निडगुरी ब्लुम्सी येशूदा ख्वाजी। 30 अडगुरला निडगु सोल्माहेन्से येशूसे “दाहेन्से डाला गे जिन्जी” भिसी थोबो कु लजी। जमाहेन्से येशूला सा निजी।

येशूला राइरी भालासे भ्लोबा

31 थें धिन चा मिश्र यहुल्साग्याम फेसी खबा धिनदा ढन्सी धड्बा चाड धड्बारी तयार लबा धिन मुबा। चु धिन चा यहूदीगदेसे ब्लप्बा न्हबा धिनना डाच्छाकुनु मुबा। न्हडगरदड मिश्र यहुल्साग्याम फेसी खबा धिनदा ढन्सी धड्बा चाड धड्बा धिन परब तबासे लमा जमाकुनुला ब्लप्बा न्हबा धिन चा थेनीगदेला लागिरी मुल धिन मुबा। थेतबासेलमा थें मुल धिनकुनु कुसरी खालैलान लास आतगै भिसी यहूदीगदेसे हाड हाड न्हडरी सल्लाह लजी। ओच्छे थेनीगदे पिलातस मुबा ग्लारी निसी, “सिबाला सजाय पिन्बा म्हिगदे योनान सिगै भिसी थेनीगदेला काड क्युइसी कुसग्याम मार तेःपुङ्गो” भिसी बिनती लजी। 32 जमाहेन्से सिपाहीगदे खसी डाच्छा येशूदेन छ्यामनोन कुसरी टाँगब लबा म्हि न्हीला काड क्युइजी। 33 येशूलाएनोन स्यहाप क्युइबारी छ्याइमा थेनीगदेसे येशू डाच्छान सिसी जिन्बा म्राड्जी। थेतबासेलमा थेनीगदेसे येशूला स्यहाप आक्युइनी। 34 तर सिपाही गिकसे येशूला राइरी भालासे भ्लोमा येशूला राइग्याम कादेन क्युइ थोन्जी। 35 एनीगदेसेनोन विश्वास लखमगै भिसी चु म्राड्बा म्हिसे

* 19:28 भजन ६९:२१

जसतो तबा म्राड्बा मुबा थेहड्बान पाड्बा मुला। चु ताम सत्य हिनना भिबा थेदा था मुला। ³⁶ “थेला नखु गिकनोन आक्युड” भिसी बचनरी भिबा ताम पूरा तबाला लागिरीन चुहड् तबा हिनना।* ³⁷ दोःसी बचनना अर्गु ग्लारी “जुन म्हिदा थेनीगदेसे भ्लोला, थेनोन म्हिदा थेनीगदेसे च्याला” भिसी भिबा मुला।*

येशूदा धुर्सारी थान्बा

मत्ती २७:५७-६१; मर्कूस १५:४२-४७; लूका २३:५०-५६

³⁸ यहूदीगदेदेन छ्याम लोड्सी स्य्हान्दोसे था आयाड्ना येशूदा विश्वास लबा अरिमाथिया भिबा शहरला योसेफ भिबा चेला गिक मुबा। थेसे पिलातसदेन छ्याम येशूला लास हीजी, जमाहेन्से पिलातससे थेदा “तला, भोर्गो” भिसी भिजी। जमाहेन्से थे निसी येशूला लास क्रुसग्याम मार तेःसी भोर्जी। ³⁹ ओच्छे डाच्छा म्हुनड येशू मुबा ग्लारी निबा निकोदेमसएनोन बोगल गिकसे च्युक सोम किलो ते मूर्देन घ्युकुमारी दोड्सी सहोबा ज्यबा बास्ना खबा अत्तर भसी खजी।* ⁴⁰ चुहड् लसी थेनीगदेसे यहूदीगदेला ठिम अन्छार येशूला लासरी थे बास्ना खबा अत्तर फोर्सी मलमलला क्वानरी रिल्जी। ⁴¹ येशूदा क्रुसरी टांगब लबा ग्लाला डामरी बगैँचा गिक मुबा। थे बगैँचारी खालैलान लास आथान्बा छार धुर्सा गिक मुबा। ⁴² यहूदीगदेसे ब्लप्बा न्हबा धिनना डाच्छाकुनुला धिन तबासे लमा थेनीगदेसे येशूला लास थे डामरीन मुबा धुर्सारी थान्जी।

20

येशू धुर्सारी आरेबा

मत्ती २८:१-८; मर्कूस १६:१-८; लूका २४:१-१२

* 19:36 प्रस्था १२:४६; गन्ती १:१२; भजन ३४:२० * 19:37 जक १२:१०

* 19:39 यूह ३:१-२

1 आइतवार स्यहोरीन मरियम मग्दलिनी† येशूला लास थान्बा धुर्सारी निजी। धुर्सारी धोसी च्यामा थेसे धुर्साला प्रापरी मुबा युड्बा लेःसी जिन्बा प्राङ्जी। 2 जमाहेन्से थे थेग्याम यार्बान सिमोन पत्रुसदेन येसूसे माया लबा चेला मुबा ग्लारी निसी, “थेनीगदेसे य्हाडला प्रभुदा धुर्साग्याम भोर्जीम! तर खानड भोर्सी थान्जी भिबा डन्दा था आरे” भिसी भिजी।

3 जमाहेन्से तुरुन्तन पत्रुसदेन थे चेला यार्बान धुर्सारी निजी। 4 थेन्नी छ्याम छ्यामनोन यार्सी निमा पत्रुसदा ख्लासी थे स्यहान्दो चेला चा धुर्सारी डाच्छा धोजी। 5 धुर्साला प्रापग्याम योइ तसी च्यामा थेसे डाच्छा येसूदा बेरब लबा क्वान जे प्राङ्जी, तर थे धुर्सा न्हडरी आवाङ्नी। 6 सिमोन पत्रुसएनोन थे चेलाला लिच्छा लिच्छा खसी धुर्सा न्हडरी वाङ्सी च्याजी। थेसेनोन थेरी येसूदा बेरब लबा मलमलला क्वान जे प्राङ्जी। 7 येसूला थोबोरी बेरब लबा क्वान चा मलमलला क्वानदेन छ्याम अरेबा। तर जजाकी क्याथाडपट्टि भसी पटट्याब लसी थान्बा मुबा। 8 जमाहेन्से पत्रुस भन्दा डाच्छा धोखबा चेलाएनोन धुर्सा न्हडरी वाङ्सी च्याजी। चु प्राङ्माहेन्से थेसे येसू सिबाग्याम सोजीम भिसी विश्वास लजी। 9 तिग्दा भिसम येसू सिबाग्याम दोःसी सोनोन तोःला भिसी बचनरी भिबा ताम थेनीगदेसे दान्देधोना घोबा आरेबा। 10 जमाहेन्से थे चेला न्ही हाडला दिमरी निजी।

येसू मरियम मग्दलिनी मुबा ग्लारी फेप्खबा

मत्ती २८:९-१०; मर्कुस १६:९-११

11 तर मरियम मग्दलिनी चा क्राबान धुर्साला डामरी राप्सी चिबा मुबा। क्राबान थेसे धुर्सा न्हडरी योइ तसी च्यामा, 12 येसूला लास थान्बा ग्लारी तार क्वान क्वान्बा स्वर्गदूत न्हीदा प्राङ्जी, गिक

† 20:1 मत्ती, मर्कुसदेन लुकारी च्यामा स्यहान्दो भ्रिडम्हेमे न्हीएनोन मुला, तर चु पदरी चा स्यहान्दो भ्रिडम्हेमे न्हीला मिन पाङ्बा आरे।

येशूला थोबोपट्टि गिक स्य्हापपट्टि मुबा। ¹³ थे स्वर्गदूत न्हीसे थेदा “माइ, ए तिग्दा क्राबा?” भिसी ड्योइमा, थेसे थेनीगदेदा “म्हिंगदेसे डाला प्रभुदा भोजीम, थे म्हिंगदेसे प्रभुदा खानड भोर्सी थान्जी भिबा डादा था आरे” भिसी भिजी।

¹⁴ चुहड् भिसी थेसे ग्यापपट्टि च्यामा येशू राप्सी स्य्हूबा म्राड्जी। तर थेसे येशून हिनना भिसी डोआसेनी।

¹⁵ येशूसे थेदा “माइ, ए तिग्दा क्राबा? एसे खाल्दा म्हाइबा?” भिसी सुड्मा, थेसे येशूदा बगैचारी म्हेन्दो क्वबा म्हि मुनम भिसी, “ज्योज्यो, हाडसे येशूदा चुग्याम भोर्बा हिनसम खानड थान्बा मुला डादा सुड्गो, डाइ थेदा भोर्ला” भिसी भिजी।

¹⁶ येशूसे थेदा “मरियम!” भिसी ड्योइमा, फ्लिक दोःसी थेसे येशूदा, हिब्रू ग्योइरी “रब्बोनी” भिसी भिजी। “रब्बोनी” भिबा चा “डाला गुरु” भिबा हिनना।

¹⁷ येशूसे थेदा “डादा चुड्सी थाथान्गो, तिग्दा भिसम डा दान्देधोना आबा मुबा ग्लारी निबा आरे। तर ए डाला ज्योज्यो आले नाना आडागदे मुबा ग्लारी निसी थेनीगदेदा ‘डाला आबादेन एनीगदेला आबा ओच्छे डाला परमेश्वरदेन एनीगदेला परमेश्वर मुबा ग्लारी डा निबान मुला’ भिसी पाड्सी पिन्गो” भिसी सुड्जी।

¹⁸ जमाहेन्से मरियम मग्दलिनी चेलागदे मुबा ग्लारी निसी, “डाइ प्रभुदा म्राड्जी” भिसी भिजी। ओच्छे येशूसे थेदा सुड्बा ताम थेनीगदेदाएनोन पाड्सी पिन्जी।

येशू चेलागदे मुबा ग्लारी फेप्खबा

मत्ती २८:१६-२०; मर्कुस १६:१४-१८; लूका २४:३६-४९

¹⁹ थेनोन धिनकुनु ड्यसे येशूला चेलागदे यहूदी नेतागदेदेन छ्याम लोड्सी प्राप हुड्सी चिबा मुबा। थे धुइरीन येशू थेनीगदे मुबा ग्लारी फेप्खसी थेनीगदेला गुडरी राप्सी धनछ्याजी। ओच्छे येशूसे थेनीगदेदा “एनीगदेदा शान्ति तगै” भिसी सुड्जी। ²⁰ चुहड्

सुड्माहेन्से येशूसे थेनीगदेदा हाडला यादेन राइ उन्जी। प्रभुदा म्राड्सी थेनीगदे ल्हानान ताड्जी।

21 जमाहेन्से येशूसे दोःसीनोन थेनीगदेदा “एनीगदेदा शान्ति तगै! डाला आबासे डादा पुइखबा हड् लसी डाइएनोन एनीगदेदा पुइबान मुला” भिसी सुड्जी। 22 जमाहेन्से येशूसे थेनीगदेदा फू लसी चुहड् भिसी सुड्जी, “परमेश्वरला आत्मा किन्गो। 23 जुन म्हिला पाप एनीगदेसे माफ लला, थेनीगदेसे माफ याड्ला, ओच्छे जुन म्हिला पाप एनीगदेसे माफ आल, थेनीगदेसे माफ आयाड्।”*

येशू थोमा मुबा ग्लारी फेपखबा

24 येशू फेपखबा धुइरी च्युक न्ही चेलागदे न्हडरी दिदुमस भिबा थोमा चा थेनीगदेदेन छ्याम आरेमुबा। 25 थेतबासेलमा स्यहान्दो चेलागदेसे थेदा “डन्से प्रभुदा म्राड्जी” भिसी भिजी। तर थेसे थेनीगदेदा “येशूला यारी खिल ठोक्बाला पोर आम्राड्तेधोना, ओच्छे थे पोरदेन राइला पोररी डाला या जुम्बी आझाड्तेधोना डाइ विश्वास आल” भिसी भिजी।

26 साता गिक लिच्छाएनोन चेलागदे दिमरीन म्राप हुड्सी चिबा मुबा। जमा चा थोमाएनोन थेनीगदेदेन छ्यामनोन मुबा। तर येशू थेनीगदे मुबा ग्लारी फेपखसी थेनीगदेला गुडरी राप्सी धन्छ्याजी, ओच्छे “एनीगदेदा शान्ति तगै!” भिसी सुड्जी। 27 जमाहेन्से येशूसे हाडला छ्या उन्बान थोमादा “एला या जुम्बी चुरी थान्गो, ओच्छे डाला या च्यागो। ओच्छे एला यासे डाला राइरी थुर्सी च्यागो। एसे शङ्का थालउ, तर विश्वास लउ” भिसी सुड्जी।

28 थेनोन धुइरी थोमासे येशूदा “डाला प्रभुदेन परमेश्वर!” भिसी भिजी।

* 20:23 मत्ती १६:१९; १८:१८

29 येशूसे थेदा “एसे डादा म्हाड्बासे लमा विश्वास लबा आहिन? तर जुन म्हिसे डादा आम्राड्सैनोन विश्वास लला, थेसे गाते ल्हानान मोलम याड्ला” भिसी सुड्जी।

30 येशूसे ह्याडला चेलागदेला डाच्छा ल्हानान उदेकला गेदेन शक्तिशाली गेगदे लबा मुबा, थे तामगदे चु किताबरी भिबा आरे। 31 तर एनीगदेसे येशू परमेश्वरला झा थार्बा पिन्बा ख्रीष्ट हिनना भिसी विश्वास लगै भिसीन चु किताब भिबा हिनना। थेदा विश्वास लसी एनीगदेसे जुकजुकधोनाला जुनी याड्गै।

21

येशू ह्याडला चेला निस मुबा ग्लारी फेपखबा

1 जमाहेन्से येशू दोःसी गालील अञ्चलला तिबेरियास भिबा समुन्द्रला कुनीरी ह्याडला चेलागदे मुबा ग्लारी फेपखजी। चुह्ण्ड लसी येशू थेनीगदे मुबा ग्लारी फेपखजी। 2 थेरी सिमोन पत्रुस, दिदुमस भिबा थोमा, गालील अञ्चलला काना भिबा शहरला नथानेलदेन जब्दियाला झा न्ही, ओच्छे स्य्हान्दो चेला न्ही पोप तसी चिबा मुबा। 3 सिमोन पत्रुससे ह्याडला ह्योगदेदा “दाहेन्से डा मी तार्डा साइबारी निला” भिसी भिमा, थेला ह्योगदेसे “डनीएनोन एदेन छ्यामनोन निला” भिसी भिजी। जमाहेन्से थेनीगदे दौंगारी क्रेःजी। तर थेनीगदेसे म्हुन गिकरी तार्डा गिकनोन चुड्बारी आखम्नी।*

4 य्हाल तबारी छ्याइबा धुइरी येशू समुन्द्रला कुनीरी राप्सी धन्छ्याबा मुबा। तर चेलागदेसे येशून हिनना भिसी डोआसेनी। 5 येशूसे थेनीगदेदा “कोलागदे, एनीगदेदेन छ्याम तार्डा मुला?” भिसी ड्योइमा, थेनीगदेसे “आरे” भिसी भिजी। 6 येशूसे थेनीगदेदा “एनीगदेसे दौंगाला दाहिनेपट्टि घ्याड रोपगो तार्डा स्याप्ला” भिसी सुड्जी। थेनीगदेसे येशूसे सुड्बा ग्लारी घ्याड रोपमा ल्हानान

* 21:3 लूका ५:५

तार्डा स्यापबासे लमा घ्याडनोन छेड्बारी आखमनी।* 7 येशूसे माया लबा चेलासे पत्रुसदा “थे मी प्रभु गा चीम” भिसी भिजी। “थे मी प्रभु गा चीम” भिबा थे:सी सिमोन पत्रुस हाडला क्वान क्रेप्सरी खीसी समुन्द्ररी वाड्जी। तिग्दा भिसम थेसे क्वान स्युबा मुबा। 8 तर स्यहान्दो चेलागदे चा दोंगारीन चिसी तार्डासे प्लिड्बा घ्याड छेड्बान समुन्द्रला कुनीरी खजी। समुन्द्रला कुनीग्याम थेनीगदे ल्हाना थारेड आरेमुबा, ओस्पन ग्यार्जा गिक मिटर ते जे थारेड मुबा। 9 समुन्द्रला कुनीरी धोखमाहेन्से थेनीगदेसे मेभुप्रारी तार्डा म्राड्जी ओच्छे गेडएनोन म्राड्जी।

10 येशूसे थेनीगदेदा “एनीगदेसे भर्खर चुड्बा तार्डा जजाकी भउ” भिसी सुड्जी।

11 जमाहेन्से सिमोन पत्रुस दोंगारी क्रे:सी घेन घेन तार्डासे प्लिड्बा घ्याड छेड्बान पाखारी भजी। थेरी ग्यार्जा गिकसे बोगल न्हीसे च्युक सोम तार्डा मुबा। ओते ल्हाना मुसैनोन घ्याड चा आढेनी। 12 येशूसे थेनीगदेदा “चबारी खउ” भिसी सुड्जी। तर चेलागदे खालैसेन येशूदा “हाड खाल हिन्ना?” भिसी ड्योड्बा सेम आलनी। तिग्दा भिसम येशू प्रभु हिन्ना भिसी थेनीगदेसे डोसेसी जिन्बा मुबा। 13 येशू फेप्खसी थेनीगदेदा गेडदेन तार्डा पिन्जी। 14 येशूदा सिबाग्याम सोना लमाहेन्से हाडला चेलागदे मुबा ग्लारी फेप्खबा चु सोमरेमला पालरी मुबा।

येशूदेन पत्रुस

15 थेनीगदेसे चसी जिन्माहेन्से येशूसे सिमोन पत्रुसदा “यूहन्नाला झा सिमोन, तिग एसे डादा चुगदेसे भन्दा ल्हाना माया लला?” भिसी सुड्जी।

जमाहेन्से पत्रुससे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा

* 21:6 लूका ५:६

“थेहड् भिसम एसे डाला ग्युला कोलागदेदा† ज्यना लसी छउ”
भिसी सुड्जी।

16 येशूसे दोःसी, “यूहन्नाला झा सिमोन, तिग एसे डादा माया लला?” भिसी सुड्जी।

जमाहेन्से थेसे येशूदा “हिन्ना प्रभु, डाइ हाडदा माया लमुला भिबा ताम हाडदान था मुला” भिसी भिमा, येशूसे थेदा “थेहड् भिसम एसे डाला ग्युगदेदा ज्यना लसी च्यागो” भिसी सुड्जी।

17 येशूसे दोःसीनोन थेदा “यूहन्नाला झा सिमोन, तिग एसे डादा माया लला?” भिसी सुड्जी।

येशूसे चुहड् लसी सोमरेमधोना “तिग एसे डादा माया लला?” भिसी सुड्बासे लमा ल्हानान आज्यना इहम्सी पत्रुससे येशूदा “प्रभु, हाडदा जम्मान ताम था मुला। डाइ हाडदा माया लमुला भिबा तामएनोन हाडदा था मुला” भिसी भिजी।

जमाहेन्से येशूसे थेदा चुहड् भिसी सुड्जी, “थेहड् भिसम एसे डाला ग्युगदेदा ज्यना लसी छउ। 18 एसे डाला ताम इयान्गो, ए भ्योन मुबा धुडरी एसे हाडला केः हाडसेन खीमुबा, ओच्छे जुन ग्लारी निबा सेम लमुबा थेरीन निमुबा। तर खेपूबा दोमाहेन्से एसे तिगै लबारी आखम, एदा स्यहान्दो म्हिसे केः खीसी पिन्ना ओच्छे जुन ग्लारी एदा निआम्हन थेरीन एदा भोर्ला” भिसी सुड्जी। 19 चु ताम चा परमेश्वरदा मान लबादेन जयजयकार लबारी पत्रुस खाहड् लसी सितोःला भिसी येशूसे सुड्बा हिन्ना। चु ताम सुड्सी जिनमाहेन्से येशूसे पत्रुसदा “ए डादेन छ्याम भ्रउ” भिसी सुड्जी।†

येशूसे माया लबा चेला

† 21:15 “ग्युला कोलागदे” भिबा चा येशूदा विश्वास लबा म्हिगदे हिन्ना। † 21:19 ल्हाना हड्बा बाइबल विद्वानगदेसे पत्रुसदा बोगल गिकसे च्युइ दिड लिच्छा थोबो ग्युरो लसी क्रुसरी टाँगब लसी साइजी भिसी पाड्बा मुला।

20 पत्रुससे ग्याप दोःसी च्यामा येशूसे माया लबा चेला लिच्छा लिच्छा खबान लबा म्राड्जी। चुनोन चेलासे भोज चबा धुइरी येशूला डामरी चिसी, “प्रभु, हाडदा चुड्सी पिन्बा म्हि खाल हिन्ना?” भिसी ड्योइबा मुबा।* 21 थेदा म्राड्सी पत्रुससे येशूदा “चुला चा तिग तला?” भिसी ड्योइजी।

22 जमाहेनसे येशूसे पत्रुसदा “डा आखतेधोना थेसे डादा भ्रान्सी चिइ भिबा डाला सेम मुसैनोन एदा तिग्दा तोःजी? ए चा डादेन छ्याम भ्रउ” भिसी सुड्जी। 23 थेतबासेलमा थे चेला आसिनम भिबा ताम स्य्हानदो चेलागदेसे था याड्जी। येशूसे मी थे आसि भिसी सुड्बा आरेमुबा, तर “डा आखतेधोना थेसे डादा भ्रान्सी चिइ भिबा डाला सेम मुसैनोन एदा तिग्दा तोःजी?” भिसी जे सुड्बा मुबा।

24 चुनोन चेलासे चु जम्मान ताम पाड्बा हिन्ना, ओच्छे थेसेन चु ताम भ्रिबा हिन्ना। थेसे पाड्बा तामदेन भ्रिबा ताम सत्य मुला भिसी डन्दा था मुला।

25 येशूसे अर्गुएनोन ल्हानान गेगदे लबा मुला। थे जम्मान गेला बारेरी भ्रिबा हिन्सम चु किताबगदे जम्बुलिड नाडनोन आवाड्सेला मुबा भिसी डाइ म्हन्मुला।

* 21:20 यूह १३:२५

परमेश्वरला बचन छार कबुल New Testament in Tamang, Eastern

Copyright © 2011 Eastern Tamang Language Team

Language: Eastern Tamang (Tamang, Eastern)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2011, Wycliffe Bible Translators, Inc. and Eastern Tamang Language Team.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937221221

The New Testament

in Tamang, Eastern

© 2011, Wycliffe Bible Translators, Inc. and Eastern Tamang Language Team.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

Updates

eBible.org

PDF generated using Haiola and XeLaTeX on 3 Jul 2018 from source files dated 14 Jun 2018

75fec6d5-7473-5018-a7c0-dd9740a83748